


**डॉ. अमरेन्द्र ग्रंथावली**  
**अंगिका बालगीत समग्र**

**संपादक : अभिनंदन**



डॉ. अमरेन्द्र ग्रंथावली—खंड १

---

अंगिका बालगीत समग्र

डॉ. अमरेन्द्र ग्रंथावली (खंड-१)  
(अंगिका बालगीत समग्र)

संकलन/सम्पादन  
अभिनंदन



समीक्षा प्रकाशन  
दिल्ली/मुजफ्फरपुर

**ISBN : ६७८.८१.८७८५५.६३.७**

**प्रथम संस्करण**  
जनवरी २०२१

**सर्वाधिकार ©**  
संपादकाधीन

**प्रकाशक**

**समीक्षा प्रकाशन**

जे. के. मार्केट, छोटी कल्याणी

मुजफ्फरपुर (बिहार)-८४२ ००१

फोन : ०६३३४२७६६५७, ०६६०५२६२८०१

E-mail : samikshaprakashan@yahoo.com

www. samikshaprakashan.blogspot.com

**दिल्ली कार्यालय**

आर-२७, रीता ब्लॉक

विकास मार्ग, शकरपुर, दिल्ली-६२

फोन : ०६६११४७८६६८

**शब्द-संयोजन**

सतीश कुमार

**मुद्रक**

बी.के. ऑफसेट,

शाहदरा, दिल्ली।

**मूल्य**

५००.०० (पाँच सौ रुपये)

---

**Dr. Amrendra Granthawali (Part-1)**

Edited by Abhinandan

Rs.500/-

## पुस्तक आरो पृष्ठ

❖ ढोल बजै छै ढम्मक ढम (पृष्ठ ११ सें ३७)

- विनती/१३ • मुर्गा/१४ • मछली/१४ • छाता/१४ • कौआ/१४
- नाना रों घोर/१६ • जाड़/१६ • महाकवि सुमन सूरु/१७
- बकरी/१७ • दीवाली/१८ • नया युनियन/१६ • विनती/२०
- लारूहों/२१ • भोर/२२ • चाँद/२२ • गाँधी बाबा/२३ • थुलथुल बाबा/२३
- बादल/२४ • रेल/२५ • ढोल/२५ • सीख/२६ • वर्ण कविता—१/२७
- वर्ण कविता—२/२७ • नाम बताव/२८
- बोली/२६ • शिक्षा/३० • भालू/३१ • पुरुष पंचांग/३१ • हाथी/३२
- फक्कड़दा रों पाठ/३२ • मामा/३४ • ऊँट/३५ • डोमनदा/३५
- जोड़/३६ • टुनमा रों अंगदेश/३६

❖ बुतरू के तुतरू (पृष्ठ ३८ सें ५५)

- विनती/४० • नानी सें गुहार/४० • बारह बच्चा रों घोर/४१
- पियक्कड़ मामा/४१ • दमड़ी दाढ़ी/४२ • पछतावा/४३ • गर्मी/४३
- बादल आरो बुतरू/४४ • लल्लू लाल//४५ • होली/४५
- बरसा/४६ • शैतानी रों फौल/४६ • अंगिका/४७ • जाड़/४७
- तोहरों घोर/४८ • दादी/४८ • बुतरू आरो विनती/४६ • बगुला जी/४६
- लालच रों फौल/५० • सीख/५१ • भोकसी बिल्ली/५१
- ननिहर/५२ • संदेश/५२ • नशाखोरी के फौल/५३ • पढ़बैय्यै बनतै लाट/५३
- चिन्ता/५४ • साफड़ी/५४ • विश्वास गीत/५५

❖ बाजै बीन, बजावै तीन (पृष्ठ ५६ सें ७५)

- मूसों आरो मामा/५८ • बड़का मामा/५८ • मन्तरिया मामा/५८
- मट्टीखोर मामा/५८ • बुझौवल/५६ • केकी करै/६० • समझ/६०
- मामा रों हाल/६० • कैलू के करनी/६१ • मामा/६१ • करनी रों फौल/६२
- काका आरो बुतरू/६२ • मामा रों खेल/६२ • पियक्कड़ छोटका मामा/६३
- मामा/६३ • माघी धूप/६३ • पाँच मुकरी/६४ • बाजै बीन/६४ • जिनखेल/६५ • नानी/६६ • लोरी/६७
- जंगल-जान—जहान (बाल गीति नाट्य)/६८

❖ एक छड़ी पर अण्डा नाचै (पृष्ठ ७५ सँ ६८)

❖ तुक्तक मुक्तक (पृष्ठ ६६ सँ ११५)

- सिल-सिलोटी/१०१ ● ओला/१०१ ● बतासा/१०२
- झगड़ू-तगड़ू/१०२ ● करनी के फौल/१०२ ● पानी में आम/१०३
- कोसी मैया/१०३ ● धुइयाँ के कुइयाँ/१०३ ● तखनी बुझिएं/१०४
- बड़की बात/१०४ ● पूस में कद्दू/१०४ ● मोती दाँत/१०५
- बात बूझों/१०५ ● बज्जड़ छींक/१०५ ● झोड़-झकासों/१०६
- नाना/१०६ ● घड़ी/१०६ ● गट्टा/१०७ ● खड़ाम/१०७
- बगरो/१०७ ● पेड़ा/१०८ ● घोड़ा रे/१०८ ● पैसा/१०८ ● गुरु
- जी गेलौ/१०६ ● समझें बात/१०६ ● किंछा/६ ● हल्ला-गुल्ला/११०
- सींग/११० ● चिड़ियां/१११ ● दुनियां/१११ ● ऊ की छेकै/१११
- बेंग आरो मछली/११२ ● बिल्ली आरो मूसों/११२ ● सेवा रों
- फौल/११३ ● खोटा-चूँटी/११३ ● मंतर/११३ ● हवा/११४ ● दाँत/११४
- नाना रों टीक/११४ ● रुइया आरो मछली/११५ ● उल्लू के
- पट्टा/११५ ● मौर-मसाला/११५

❖ पाँच तिया पनरों (पृष्ठ ११६ सँ १२४)

- गुड़बा-गुड़िया/११८ ● गाय दुधारी/११६ ● भारत माय/११६
- गाछ-बिरिछ/१२० ● निछलों बात/१२० ● वैशाख/१२०
- गदहा/१२१ ● बंदर मामा/१२१ ● भूल/१२२ ● रात/१२२
- मौसाजी/१२२ ● झिन्नुक आरो दादी/१२३ ● काम नै देतौ
- गोइयाँ/१२३ ● बात बताव/१२४ ● डायनासोर/१२४

❖ घटोत्कच खण्ड-काव्य (पृष्ठ १२५ सँ १३६)

❖ पंचामृत (पृष्ठ १३७ सँ १८०)

## अंगिका बालगीत समग्र लेली

मनों में तें यही छेलै कि पिताजी रों खाली अंगिकाहै बालगीत नै, हिन्दियो में लिखलौ बालगीत मिलैयै कें समग्र निकाललौ जाय, मतरकि हिनकों लिखलौ हिन्दी बालगीत बहुत खोजला के बादो तीन-चार ठो सें बेसी नै मिलें पारलै । हौ ई सब छेकै,

### मम्मी जी

एक हमारी मम्मी जी,  
सबकी प्यारी मम्मी जी ।  
शैतानी मैं लाख करूँ,  
दे ना गारी मम्मी जी ।  
सबकी करती, सबकी सहती,  
भली-बिचारी मम्मी जी ।  
मैं न पढ़ूँ, तो दुःख करती है,  
दुःख की मारी मम्मी जी ।  
घर में दादी बनी अगाड़ी,  
और पिछाड़ी मम्मी जी ।  
मम्मी के संग जब भी खेलूँ,  
पहले हारी मम्मी जी ।  
मैं छुप बैठा खटिया नीचे,  
चढ़ी अटारी मम्मी जी ।  
शैतानी अब नहीं करूँगा,  
शॉरी-शॉरी मम्मी जी !

### मूसामल

चार दिनों से मूसामल,  
ले आता था अपना दल ।  
चावल-गेहूँ जी भर खाता,  
बाकी ढोकर बिल ले जाता ।  
साहू जी का बोरा खाली,  
बोरे में देखी सौ जाली ।  
चितित्त साहू भागे दिल्ली,

ले आये अंगरेजी बिल्ली ।  
 मुसकल लाया जा केरल से,  
 दो जंगली कुत्ते जंगल से ।  
 झाड़ू लाया सिक्किम जाकर,  
 और गये फिर वो पोरबन्दर ।  
 पोरबन्दर से भाला लाया,  
 बिल पर पहरेदार लगाया ।  
 और गये फिर खुद बाजार,  
 लाया ढो कर मूसामार ।  
 मूसामार मिलाया गुड़ में,  
 फिर आटा को डाला उसमें ।  
 गोली क्या, गोला ले साहू,  
 दौड़ रहे थे बन कर राहू ।  
 बाहर में था सबका गश्त,  
 बिल में बैठा मूसा मस्त ।

### चंदा

चंदा गोरा गोरा;  
 जैसे दूध कटोरा ।  
 दूध भरा गुब्बारा,  
 समझ ईंट दे मारा ।  
 चंदा गिरा ना टूटा,  
 मेरा ही सर फूटा ।

### अब्दुल कलाम

ए. पी. जे. तो लम्बा नाम,  
 अच्छा राष्ट्रध्यक्ष कलाम ।  
 भारत का किस्मत-निर्माता;  
 भरी जेठ में सर पर छाता ।  
 शक्ति का जो राजमहल है,  
 मन से जो कि ताजमहल है ।  
 प्रेमभरा जो ऊपर तक,  
 दुखिया का दुख भीतर तक ।



भाग्य-विधाता बच्चों का,  
 आया है दिन अच्छों का।  
 लाओ विकसित भारत को,  
 दूर भगाओ आफत को।  
 देश बने फिर वही गुरु;  
 जैसा था यह शुरु-शुरु।  
 डॉक्टर राष्ट्राध्यक्ष कलाम,  
 नमस्कार, जोहार, सलाम!

आरो हिन्दी बालगीत सब तें तित्तिर-बित्तिर होय चुकलौं छै, तें खाली अंगिकाहै बालगीत पर बात आवी कें रही जाय छेलै।

यहू में एक दिक्कत बुझावें लागलै कि समग्र में “करिया झुम्मर खेलै छी” के गीत की बालगीत में आवै छै? शंका-निवारण लेली हम्मैं बालमनोविज्ञान के जानकार प्रशांत सिन्हा (अप्पू दा) सें पूछलियै, तें हुनी कहलकै कि ऊ संग्रह के ज्यादातर गीत तें किशोरे लेली लिखलौं गेलौं छै, गीत के ओरी में अंगिका के फेकड़ा राखीकें तें कवि यही सिद्धो करै लें चाहलें छै, अपवाद के एक दू गीत मिली जाय, तें अलग बात छै। दादा के बात सें साफ संकेत पैहैं हम्मैं “करिया झुम्मर खेलै छी के गीतो समग्र में शामिल करै के निश्चय करी लेलियै। चूँकि ई संग्रह के बेसी गीत किशोरे वास्तें छै, यै लेली हम्मैं ई संग्रह के आखिर में राखी देलें छियै, कैनहैंकि ‘पंचामृत’ के बालकाव्य रूपक ‘करिया झुम्मर खेलै छी’ सें बेसी किशोरे लेली लागै छै।

दिक्कत यहू छेलै कि पिताजी जे बालगीत लिखै छै, वैमें हिनी विराम चिन्हों सें बचैलें चाहै छै, खाली जरूरत के हिसाबों सें पूर्ण विराम आकि कहीं-कहीं अर्द्ध विरामे रों चिन्ह लगाय दै छै, मतरकि ‘पंचामृत’ के बाल काव्य रूपक एकरा सें भिन्न मिललै, जहाँ जरूरत के हिसाबों सें आरो-आरो विराम चिन्हो प्रयुक्त छै, तें हम्मैं पिताजी सें कहैलियै, सब्भे संग्रह के बालगीतों में जरूरतवाला विराम चिन्ह लगाय दौ नी ताकि बच्चा बच्चाहै सें विराम चिन्ह के समुचित प्रयोग के बारे में जानें लागै। शायत हुनका है बात ठीक बुझैलो होतै, तें एक्के दिनों में बैठलों-बैठलों सब संग्रह के बालगीतों कें विराम चिन्हों सें बान्ही देलकै, मनौं के विरुद्ध जैतें हुएँ, हुनी कहलो छेलै कि ज्यादा विराम चिन्हों के प्रयोग

बच्चा कें उलझाय दै छै। जे हुएँ, हम्में खुश छी कि आबें समग्र में एकरूपता आवी गेलों छै। यहाँ यहू बताय दै लें चाहै छियै कि ‘करिया झुम्मर खेलै छी’ में जत्तें गीत पहिले सें छेलै, वैसैं बेसी यहाँ गीत छै। पिताजी के फेकड़ा कें आधार बनाय कें रचलों गीत तें आरो-आरो संग्रह-पत्रिका अखबार में प्रकाशित छेलै या बाद में होलै, जे हौ संग्रह में नै छै। हम्में हौ सब गीतों कें यही संग्रह में शामिल करी लेलें छियै, साथे-साथ एकाध गीत, जे पहिले सें ई संग्रह में छेलै, ओकरा हटाय देलें छियै, जे खाली फेकड़ा बचाय के खयालों सें रचलों बुझैलै। ई गीत छेकै ‘अथरो-बिथरो नीमा गेलै नीम तोड़ें’। ई गीत खाली यै वास्तें लिखलों गेलों छै कि परिवार के अधिकांश बच्चा के नाम आवी जाय आरो ऊ सब पढ़ी कें खुश हो जाय।

जे हुएँ, ई सब कविता कें एक पुस्तक में निकालै के पीछू हमरों कुछ मोह रहलों छै, हमरे नै, हमरों घोर भरीके, कैन्हेंकि ई सब गीत (खाली ‘पंचामृत’ छोड़ी कें), पिताजीं हमरे सिनी वास्तें तें लिखलें छेलै आरो हमरा सिनी यही कवितासिनी पढ़ी-बोली कें बचपन के सुख लेलें छियै, जे बाद में समाज के बच्चोलेली ओतलै रुचिपूर्ण सिद्ध होलै, तें ई सिनी कविता कें बचाना हमरो दायित्वो बनै छेलै, है प्रयास खाली पितृऋण सें मुक्तिये पावै लेली नै छेकै। समग्र में एक आरो बालकाव्य-रूपक राखलें छियै जे नै तें कहीं छपलों छै, नै कहीं मंचित होलों छै, जेकरों शीर्षक छेकै—‘पाला पर रौद’। एक बात आरो, संग्रह रों कवितासिनी में कुछ-कुछ बदलाव छै, ऊ पिताजी के करलों छेकै।

समग्र निकालै में छोटी बहिन वसुंधरा के बड़ों सहयोग रहलों छै, होनाकें घोर भरी के बड़ों के आर्शीवाद नै होतियै, तें हम्में ई काम नै करें पारतियै। जबें समग्र कें देखतै, तें बड़ी बहन प्रियंवदा, मंझली बहिन कनुप्रिया आरो बड़ों भाय कुमार संभव कें कत्तें खुशी होतै, ऊ हम्मूओ जानी रहलों छियै, कैन्हें कि अधिकांश संग्रह तें हम्मी भाय-बहिन कें समर्पित छै।

—अभिनंदन

सम्पर्क : F ब्लॉक, प्लॉट नं.५११६, फ्लैट नं.१४ देव दीपावली, ३० नवंबर २०२०  
राजेन्द्रपार्क, गुरुग्राम-१२२००१ (हरियाणा)

मोबाइल-६६७१२६५८३३

ढोल बजै छै ढम्मक ढम



प्रथम प्रकाशन

जनवरी १९९४

प्रकाशक

समय साहित्य सम्मेलन, पुनसिया, बाँका (बिहार)

नूनू बाबू सिनी,  
आय तक अंगिका में जे लिखलें गेलै, ऊ बड़के लेली  
ज्यादा। हम्मैं समझै छियै, कि है सब देखी-सुनी तोरा  
सिनी मने मन कुढ़तें होभौ, मजकि आबें कुढ़वों आकि  
रुसवों छोड़ों। गैवों-हाँसवों सब्भे शुरू करों, 'ढोल बजै  
छै ढम्मक ढम' रों साथे-साथ।

तोरो बड़ों भाय

## विनती

हे भगवान, हे भगवान!  
रखियो बच्चो केरो मान!

उमिर बढ़ै ज्यों जीरें-जीरें,  
ज्ञान बढ़ैय्यो धीरें-धीरें,  
माय-बाबू रों साथ समाज  
जोगियो हिनको पगड़ी-ताज;  
देव पुरैय्यो ई अरमान!  
हे भगवान, हे भगवान !

गोय्यां-गोब्रु रहै नै रुष्ट,  
माँते खैते रहि जाय दुष्ट,  
हमरा गाँधी-बोष बनैय्यो,  
देश-धरम रों राह दिखैय्यो;  
देशे वास्तें छूटै प्राण!  
हे भगवान, हे भगवान!

## मुर्गा

मुर्गा बाँग लगावै छै,  
भोरे भोर जगावै छै।

जेन्हें भोरकवा उगलों कि,  
चंदा-तारा डुबलों कि,  
पहरेदारों रं जोरों सें  
कुकड़ू कूँ सुनावै छै।  
मुर्गा बाँग लगावै छै,  
भोरे भोर जगावै छै।

पनसोखा रं पखना छै,  
मूड़ी उपरे रखना छै,  
भोर सुहावै जेहनों सर पर  
लौकेट होने सुहावै छै!  
मुर्गा बाँग लगावै छै,  
भोरे भोर जगावै छै।

## मछली

मछली रानी छलमल-छल,  
जत्तें उछलै ओत्तै जल।

चोय्याँ चमचम पन्नी रं,  
चानी केरों चौवन्नी रं,  
गजगज तारा झुक्कों फूल,  
पीठीं छाती चाट्ठों शूल;  
तोहरों वास्तें पोखरी जेहनों,  
होने बोहों खल-खल-खल।

केना चलै छों एत्तें तेज?  
कहाँ सुतै छों, कथी के सेज?  
जलो में गरमी लगै छों की;  
पंखे रं डोलौं दुमड़ी?  
के सिखलैलकौं तैरै लें ई?  
करवा आदत अदल-बदल!

## छाता

कारों-कारों छाता छै,  
सबके प्यारों छाता छै।  
गर्मी लें, बरसातों लें;  
जेना हँकारों छाता छै।  
जहाँ मिलौं पड़पड़िया धूप,  
वहीं पुकारों 'छाता छै ?'  
ऊ की भिंजतै बरसा में,  
जेकरा ठारों छाता छै।  
छत्तीस ठों कें त्राण वहीं,  
जहाँ अठारों छाता छै।  
छतरी नै बीहा करतै,  
भले कुमारों छाता छै ।

## कौआ

कौआ हो कक्का काँव-काँव,  
आरो कहीं नै तें हमरै कन ठाँव!  
केना कें सूझै छौं, इतनी टा आँख?  
हमरे चूलों रं छौं तोहरो तें पाँख,  
लंबा ठो देहों में चुटकी भर मूड़ी,  
तिरगैलें चोंच रहों लुचकै लें पूड़ी।  
केना देह संभलै छौं, काठी रं पाँव?  
कौआ हो कक्का काँव-काँव।

गगलौ, तें केना कें काकी बुलावौ,  
दूध-भात तोरा लें कैन्हें जुटावौ?  
हम्मैं हड़कम्प रहौं देखथैं बस तोरा,  
घुसकी जाँव माय लुग लै दूध के कटोरा।  
ताके में रहै छौं, केना कें खाँव,  
कौआ हो कक्का काँव-काँव ।

## नाना रों घोर

दै नै कभी लेमनचूस छै,  
मौसी बड़ी ही कंजूस छै ।  
मौसा गप्पे हाँकै छै,  
दू सेर चूड़ा फाँकै छै ।  
मामो रहै छै हरदम नील,  
मामी केरों अंटी ढील ।  
पैलें सौ ठो रुप्पा छै,  
फुप्फा फुली केँ कुप्पा छै ।  
केकरो नै केकरौ सें मेल,  
नाना रों घर लागै जेल ।

## जाड़

दलदल दलकै हमरों हाड़,  
सुइये रं चूभै छै जाड़ ।  
कँपकँप काँपै दोनों ठोर,  
कस्सी बान्हलौं गाँती जोर ।  
ओढ़ना ओढ़ों, वही रजाय,  
बुतरु वास्तें जाड़ कसाय ।  
कनकन्नोँ राते रं भोर,  
गुरुओ जी सें जाड़ कठोर ।  
रौदा उगै नै खेलौं खेल,  
बुतरु वास्तें जाड़ा जेल ।  
गल्लोँ जाय छै हमरों हाड़,  
कहिया जैभा तोहें जाड़ ?



## महाकवि सुमन सूरु

सादा-सीधा भेष दिखै,  
कविता, खिस्सा, लेख लिखै ।  
बकबक करै नै, चुप्पे मौन,  
भरलौं भादौं, सुखलौं सौन ।  
सुमन कवि के बड़ा अमोल ?  
एक सुरौं में 'सूरु' बोल ।

### बकरी

उर्र बकरिया आवी जो;  
में-में करी कें गावी जो!  
देह तोरौं भोकनों-भोकनों,  
बाल तोरौं चिकनों-चिकनों,  
लम्बा कान डुलावै छैं!  
केकरा तोहें बुलावै छैं?  
आँख कमल रौं कोढ़ी रं,  
सींग माथा पर बोढ़ी रं,  
सींग कें कैन्हें डुलावै छैं?  
हमरा तोहें डरावै छैं?  
है नै समझैं कि डरवौ,  
पीठी पर हम्मों चढ़वौ,  
पूँछ तोरौं छौ फुदुर-फुदुर,  
बकरी हिन्नैं टुघुर-टुघुर!

## दिवाली

फेनु दिवाली ऐलों छै,  
माय नें घोर सजैलों छै।  
जगमग-जगमग दीया छै,  
जेना मणि के कीया छै।  
घुर, घुर, घुर, घुरघुरिया छै,  
छुर, छुर, छुर, छुरछुरिया छै।  
पड़, पड़, पड़, पड़, फटाक-फटाक,  
छुटै पड़ाका झटाक-झटाक।  
लुक्का-पाती बड़का लें,  
टिकरी-मिट्ठों लड़का लें।  
बाहर भेलै दलिद्दर आय,  
भीतर ढुकलै लक्ष्मी माय!  
सौंसे दुनियाँ झक-झक-झक,  
उलुवाँ देखै टक-टक-टक।  
डरहै अन्हार नुकैलों छै,  
फेनु दिवाली ऐलों छै।

## नया युनियन

पापा हमरों बात सुनों  
एक युनियन नया बनाना छै,  
पप्पू ओकरों लीडर होतै  
नारो खूब लगाना छै।  
संझकी रोजे भाषण होतै,  
पापा सबटा बात सुनों;  
मम्मी रों तानाशाही नै  
चलतै; तोहूँ हाथ मुनों!  
कैन्हें दूध पिलैतै मम्मी  
जों बुतरू नै चाहै छै,  
जत्तें सहलै जाय छै बुतरू  
ओत्तें सब्भैं साहै छै।  
दिनभर पढ़वे-लिखवे के ही  
पापा-मम्मी शोर करै,  
ई अधिकार कैन्हों सद्दोखिन  
बुतरू कें ही बोर करै।  
नारा नया लगैतै सब्भैं  
परचो-पोस्टर भी बंटतै,  
रूल मुताबिक बच्चा हरदम्म  
पापाओ सें नै डँटतै।  
भोरे-साँझे अपनों साथें  
बच्चौ कें घुम्मावें होतै,  
खाली पेन्सिल-स्लेटे नै  
गुल्ली-लूडो भी लावें होतै।

बुतरू पास करै तें खाली  
चुम्मा पापा-मम्मी दै,  
पास करै पर पैसा-कुल्फी  
पापा दै नै मम्मी दै।  
कल सें पैकेट मार्टन, टॉफी  
लेमनचुस के लानें होतै,  
ऐतनै नै सब बुतरू केरों  
भीतरी मन कें जानें होतै!  
झूठमूठ गुरु जी के डंडा  
कब तक बच्चा खैथें रहतै,  
बच्चा कुछ समझें नै समझें  
दिन भर लेशन देखें रहतै!  
खाक परीक्षा-फल होतै की  
अच्छा, बोलों बच्चा के,  
गार्जन के कनमोचरा-थप्पड़  
कोन अंत छै गच्चा के!  
बुतरू पर है जौर-जुलुम कें  
जेना हुएँ रुकवाना छै,  
पापा हमरों बात सुनों  
एक युनियन नया बनाना छै।  
देखी लेलियै ई रस्ता कें  
छोड़ी कोय नै चारा छै,  
सब जोर जुलुम के टक्कर में  
संघर्ष आबें नारा छै।

## विनती

बाबू पोथी लानी दा,  
पेन्सिल एक ठों कीनी दा!  
हम्मू अ, आ, ई पढ़वै,  
इस्कूली में नै लड़वै।  
खल्ली खूब घुमैवै तें  
अ, आ जानी जैवै तें?  
खोड़ा लिखवें केना कें,  
दीदी लिखै छै जेना कें,  
हम्मू पढ़वै-लिखवै, तें  
पाठ बिहानै रटवै, तें  
बड़का आदमी बनवै नी?  
साहब हेनों दिखवै नी?  
दादा सें तोहें बोली कें  
कही दहौं सब खोली कें,  
दीदी लें जे लानै छै,  
माँगियै मुक्का तानै छै,  
हमरो पोथी लानी दा,  
पेन्सिल एकठों कीनी दा!

## लार्हों

हमरों माय, गाय माय,  
कहना छै तोहरा कुछ आय!  
की होतै कुछ जरो छिपाय,  
हमरा सब छौं पाँच भाय।  
पाँचों में हम्मी छोटों,  
जेना मटर में राय-गोटों।  
हमरों की औकात छै,  
भैय्या के की बात छै!  
हिन्नें दूध दुहावै छै,  
हुन्नें सेँ सब आवै छै।  
कोय गारथैं, कोय गरम-गरम,  
पीये गटगट, करै हजम।  
जब तक आवौं टुघुर-टुघुर,  
पीते देखौं टुकुर-टुकुर।  
देतै कहाँ? चिढ़ाबै छै,  
गुस्सा केन्हों बढ़ावै छै!  
जानथैं छै, येँ करतै की ?  
टानी लै छै दूध-दही।  
हमरों माय, गाय माय,  
कहना छै तोरा कुछ आय!  
सबके माय कहावै छों,  
कल्ले तोहें सुहावै छों!

मैय्यो सेँ तोहें उच्चों,  
पूँछों तोरों नै बुच्चों!  
गोरों-गोरों देह केहनों,  
सुद्धी छों हमरे जेहनों!  
सबटा दूध दुहाय दै छौ,  
है नै, लेरु पिलाय दै छौ।  
हमरौ तें तोहें मानथै छौ,  
हालो सबटा जानथै छों;  
चुरु भरी नै दूध मिलै,  
खाय वक्ती नै जीभ हिलै।  
मैय्यो उल्टे डाँटे छै,  
बड़कै में सब बाँटे छै।  
आबें एक ठों तोहरे आस,  
यही विचारी ऐलौं पास।  
लेरु जरा हटावों नी,  
हिन्नौ दूध बढ़ावौ नी!  
देखों, बाटी आनलें छी,  
पानी में रोटी सानलें छी।  
रोटी दूध सेँ सानी जा,  
एतना टा तोहें मानी जा।  
तोहरे किरिया, जाँ जैभौं,  
घुरी-फिरी केँ नै ऐभौं।

## भोर

सूरज उगलै, सूरज उगलै,  
सबसें पैहलें चिड़ियाँ जगलै ।  
ऐंगनों-छत पर चहकै छै,  
फूल भोररकी मँहकै छै ।  
चूँ-चूँ-चीं-चीं करै छै कत्तें,  
इस्कूली में बच्चा जत्तें ।  
ठंडा-ठंडा हवा बहै छै,  
नींद बेचारी आँख मलै छै ।  
रात अन्हरिया भागलै कब्भै,  
बूढ़ों-बुतरु जगलै सब्भै ।  
भीती पर मैना फुदकै,  
देहरी तांय उछली आवै ।  
बच्चा कें कोय्यो नै मारै,  
सुग्गा भोरे-भोर उचारै ।

## चाँद

चंदा मामा, आरे आवों;  
नदिया किनारे आवों!  
पानी में नहैवों दोनों,  
गीत खुशी रों गैवों दोनों ।  
तोहरों गोरों-गोरों देह,  
धूल सें होतौं कारों देह ।  
यही डरें नै आवै छों?  
पन्द्रह रोज सतावै छों?  
चंदा मामा आवों नी,  
किस्सा कोय सुनावों नी ।  
माय के देलौं रोटी कें,  
दूध सें भरलौं बाटी कें,  
बड़ी छिपाय कें रखलें छी,  
अभियो तक नै खेलें छी,  
चंदा मामा आवी जा,  
आरो दूर नै भागी जा!  
आवों, खैवों रोटी कें,  
दूधों आधों बाँटी कें ।  
मिली-जुली कें साथों में,  
हाँसवों-खेलवों रातों में!

## गाँधी बाबा

अंगरेजों लें बड़का आँधी,  
सबसे बड़ों महात्मा गाँधी।  
गाँधी पीन्है एक लँगोटी,  
गाँधी जी रों बड़के लाठी।  
गाँधी जी रों चश्मा गोल,  
सौसें देह तें झोलगा झोल।  
गाँधी जी रों बन्दर तीन,  
अलगे-अलग बजावै बीन।  
बच्चा कहै—नै सोना-चाँदी,  
सबसे बड़ों महात्मा गाँधी।

## थुलथुल बाबा

एत्ते केना मोटावै छै?  
थुलथुल बाबा आवै छै।  
माथों दूध के चुक्का रं,  
केकरो-केकरो हुक्का रं;  
पेट भोजों के हड़िया रं,  
माथों लगै छै कुड़िया रं;  
मिनिर-मिनिर कुछ गावै छै,  
थुलथुल बाबा आवै छै।  
गोड़ उठै छै थुबुक-थुबुक,  
चिड़ियै नाँखी फुदुक-फुदुक,  
पिन्हलें छेलै नया खड़ाम,  
बाबा गिरलै चित्त धड़ाम।  
कुरल्लों जाय नेंगचावै छै,  
थुलथुल बाबा आवै छै।

## बादल

ताक धिनक धिन, ताक धिनक धिन,  
मुन्नी ऐलै बरसा रों दिन!  
हाथी बनी कें बादल आवै,  
सूँढों सें सबके नहलावै;  
उजरोँ-कारों ढलमल ढल छै,  
लगै पहाड़े रँ बादल छै;  
बुली-बुली कें सबरोँ ऐंगन,  
बरसावै पानी सददोखिन!

ताक धिनक धिन, ताक धिनक धिन!  
की समुद्र छै ई बादल में?  
खेत टटैलों डुबलै जल में!  
खलखल नद्दी की रं उमड़ै,  
रही-रही कें बादल घुमड़ै।  
कारों मेघ में ठनका लागै,  
धुआँ बीच में जेना आगिन!  
ताक धिनक धिन, ताक धिनक धिन!



## रेल

छुक-छुक करते आवै रेल ।  
की रं हन-हन करलें आवै,  
धुइयाँ सें सब भरलें आवै;  
रस्ता सें उतरै नै हेट,  
एक्के मूँ छै, सोलह पेट;  
सत्तर गोड़ों सें करै छै खेल,  
छुक-छुक करते आवै रेल ।  
कर्रों-कर्रों देह-हाथ एकरों,  
कोयला सें मूँ भरलों जेकरों;  
पानी पीयै छै सौ-सौ घैलों,  
राकसे रं चिकरै उमतैलों;  
तहियो लोगों सें हेकरा मेल,  
छुक-छुक करते आवै रेल ।

## ढोल

कत्तों मारों कम, कम, कम,  
ढोल बजै छै ढम्मक-ढम ।  
नाँचें नै तोंय; थम, थम, थम,  
ढोल बजै छै ढम्मक-ढम ।  
सुनथैं भागी गेलै जम,  
ढोल बजै छै ढम्मक-ढम ।  
पैसा खोलों खेल खतम,  
ढोल बजै छै ढम्मक-ढम ।  
ढम्मक-ढम, ढम्मक-ढम,  
मिलथैं पैसा बम-बम-बम ।

## सीख

एक्को रोटी मिलै जों कम,  
काका रों मूँ तम-तम तम,  
ढम्मक-ढम!

कत्तो अच्छा आलूदम,  
पेट बचाय केँ कम्मे कम,  
ढम्मक-ढम ।

हम्मै खैलौं दू चमचम;  
एकरै में फूलै छै दम;  
ढम्मक-ढम ।

टानी केँ पेटू बेदम,  
पेटू केँ लै गेलै जम;  
ढम्मक-ढम ।

ढम्मक-ढम, ढम्मक-ढम,  
खा कम्मे कम, ढम्मक-ढम ।

## वर्ण कविता—१

अ से अमरूद ठुरी छौ,  
गुस्सैलों छें गुरी छौ?  
आ से आम तें मीट्ठों छै,  
लेकिन खैलों जुट्ठों छै।  
इ से इमली खट्टा थू,  
उल्लू रों सब पट्टा ऊ ।

## वर्ण कविता—२

प से पगड़ी गोल-मटोल,  
लागै छै माथा पर ढोल।  
फ से फूल सुहावै छै,  
गुम्मां भौरा गावै छै।  
ब से बकरी, बानर, बाघ,  
सब जीवों में सिंहे घाघ।  
भ से भाला, भालू, भैंस,  
कभियो सहै नै केकरो तैस।  
सुन रे मूसों चूँ-चूँ-चूँ,  
म से मुर्गा—कुकडू-कूँ।

## नाम बताव

हल्ला-गुल्ला करें नैं घौल,  
उत्तर देलैं नै; लागतौ धौल,  
पनरह खेल रों नाम बताव!

खोखा, ताश, कबड्डी तीन,  
पोलो, जूडो, खेल महीन;  
कुश्ती, चौपड़, किरकेट आठ,  
शतरंजों रों अलगे ठाठ;  
बैटमिन्टन, टेनिस, घरघोट,  
फुटबौलों में कहीं नै खोट;  
हॉकी आरो भौलीबौल,  
आबें केना देवें धौल?

पनरों नदी रों नाम ठो बोल,  
नै तें कहवौ ही भुसगोल,  
जल्दी-जल्दी नाम बताव!

गंगा, बोल्गा, नाइजर तीन,  
नील, अमेजन, सी, सालवीन;  
डेनीपर, डेन्यूब, कांगो, डोन,  
मिसिप, मिसौरी, यमुना, सोन;  
पनरो ब्रह्मपुत्रों कें गिन,  
मिली-जुली सब भाय-बहिन!

दै देलियो नी उत्तर बोल,  
हम्मी देवौ तोरा धौल,  
कहवैं की हमरा भुसगोल।

## बोली

उल्लू तें घुघुआवै छै,  
मुर्गा बाँग लगावै छै।  
हिनहिनावै घोड़ा छै,  
गड़-गड़-गड़-गड़ सौदा छै।  
मूसों करै छै चूँ-चूँ-चूँ,  
कुत्ता भूकै भूँ-भूँ-भूँ।  
भले कबूतर गुटरू-गूँ,  
कुत्ता बच्चा कूँ-कूँ-कूँ।  
बेंग सिनी टरवि छै,  
बाघ मतुर गुरवि छै।  
सिंह दहाड़ै बड़ा गजब,  
झिंंगुर झन-झन जेना अजब।  
गदहा रेंकै रेंकले जाय,  
बकरी संग भेंड़ा मिमियाय।  
सुग्गा रटै छै टें-टें-टें,  
बत्तख जेना कें-कें-कें।  
बैल डकारै, गाय रंभावै,  
मक्खी भिन-भिन करलें आवै।  
चिग्घाड़ै हाथी की जोर,  
कूजै वन-वन बत्तख-मोर।  
कानै गीदड़, साँप फुँकारै,  
कौआ काँव-काँव गल्लों चीरै।  
बिल्ली मौसी बोलै म्याऊँ,  
नै पूड़ी, तें मूसे खाँव।

## शिक्षा

धाक धिनक धिन, धिन-धिन-धिन,  
चुप मत बैठें, गिनती गिन!  
एक्काँ, दूक्काँ, तिनकाँ, चौक्काँ,  
पचकाँ, छक्काँ, फेरू सतकाँ,  
अठकाँ, नौक्काँ आरो दसकाँ,  
दसकाँ सेँ लै केँ तोंय बिसकाँ ।  
नै पढ़ला सेँ लै जैतौं जिन,  
धाक धिनक धिन, धिन-धिन-धिन ।  
गिन ऊँगली पर सोमवार केँ,  
मंगल आरो बुद्धवार केँ;  
ऊँगली पर गिन वीरवार केँ,  
शुक्र-शनी, आदित्यवार केँ;  
एक्को ठो नै भुलैयौं दिन!  
धाक धिनक धिन, धिन-धिन-धिन ।

## भालू

भालू गुड-गुड, गुड-गुड-गुड ।  
जहिया सँ घूमी ऐलों छै  
लंदन आरो हॉलीवुड,  
बात करै नै केकरौ सँ भी  
खाली बोलै—  
सी केन कुड,  
ही केन कुड,  
भालू गुड-गुड, गुड-गुड-गुड ।  
चश्मा सदा चढ़ैले राखै,  
हाथों में छोटका इस्टिक,  
झबरो-झबरो लातों सँ वै  
ढेपों कें मारै छै किक;  
खोलै नै टाई कें कभियो  
या माथों सँ अपनों हुड ।  
भालू गुड-गुड, गुड-गुड-गुड ।

## पुरुष पंचांग

लाल बहादुर लाल जय,  
सुनथैं दुश्मन खावै भय ।  
लौह पुरुष सरदार पटेल,  
पलना जिनकों वास्तें जेल ।  
भगत सिंह रं वीर शहीद,  
दूसरों अब्दुल एक हमीद ।  
पर दुखिया रों एक्के आस,  
दाढ़ीवाला बाबा मार्क्स ।

## हाथी

टुकटुम-टुकटुम हाथी राम,  
तोरोँ सवारी बिना लगाम ।  
सूँढ़ लटकलौँ अजगर रं,  
चमड़ौँ तोरोँ पत्थर रं,  
दाँत दुधे रं चम-चम-चम,  
खाना मॉन भरी; नै कम,  
पर टुकनी रं आँखे जाम,  
टुकटुम-टुकटुम हाथी राम ।  
पेट छेकौँ कि छेकौँ पहाड़?  
गोड़ छेकौँ या गाछे ताड़?  
लगौँ डमोलौँ तोरोँ कान,  
तोरोँ मालिक बस पिलवान ।  
सब बुतरू रौँ तोरा सलाम!  
टुकटुम-टुकटुम हाथी राम ।

## फक्कड़दा रौँ पाठ

अक्कड़ सक्कड़ लक्कड़ दा,  
गुरु जी बनलै फक्कड़ दा ।  
चैतौँ संग बैशाख पढ़ावै,  
ई दोनौँ पर जेठ चढ़ावै,  
जेठौँ पर आषाढ़ बतावै,  
जै पर सावन-भादौँ लावै,  
आसिन, कातिक तुरत गिनै छै,  
अगहन बादे पूस तनै छै,  
हेकरोँ बाद जे आवै माघ,  
लागै जेनां ऐलै बाघ,



फागुन जेकरा नाच नचावै,  
फगुवो केँ नचवैलेँ आवै,  
बुतरू केँ कुछ भार नै लागै,  
हेनै पढ़ावै गप्पड़ दा।  
अक्कड़ सक्कड़ लक्कड़ दा,  
गुरु जी बनलै फक्कड़ दा।

बारों महीना, ऋतुओ छों,  
पढ़ चों, छों, जों, पों, फों, बों,  
गर्मी पीछू वर्षा दौड़ै,  
जेकरों टांग शरदजी तोड़ै,  
तहियो कोमल बड़ा शरद,  
सब मीट्रों में जेना शहद,  
गोय्याँ एकरों एक हेमन्त,  
पीछू-पीछू राखै तन्त।  
बचलै शिशिर, बसन्त सुनों,  
दू में अच्छा कौन? चुनों!  
बच्चा केँ लटकैलेँ राखै,  
बच्चा बोलै गप्पड़ दा।  
अक्कड़ सक्कड़ लक्कड़ दा,  
गुरु जी बनलै फक्कड़ दा।

## मामा

मामा बड़ा ही सुन्दर है।  
जगथैं शोर मचावै छै,  
धम-धम करलें आवै छै,  
खाय लें खोजै रही-रही,  
दूँदूँ दिन भर दूध-दही,  
कुछ नै कुछ मिलिये ही जाय छै,  
किस्मत केरों सिकन्दर छै,  
मामा बड़ा ही सुन्दर छै।

खाय केँ निकली डकरै छै,  
सब पर रही-रही चिकरै छै,  
चिकने-चिकने खाली खाय,  
छिपली-छिपली दूध-मलाय,  
जौन घरों में खोआ-पेड़ा  
समझों मामा अन्दर छै,  
मामा बड़ा ही सुन्दर छै।

मामा मानें चप-चप-चप,  
रसगुल्ला सब गप-गप-गप,  
पूड़ी-कचौड़ी हप-हप-हप,  
जिब्बा दिन भर लप-लप-लप,  
हम्में कुछ माँगियै तें बोलै—  
ई तें बड़ा छुलुन्दर छै,  
मामा बड़ा ही सुन्दर छै।

## डोमनदा

दूगो पैसा चा-चा-चा,  
डोमन दा सें खुश बच्चा।  
डोमनदा रों कोन निशान?  
हाथ में बौकड़ी, मूँ में पान,  
बात-बात पर हा-हा-हा,  
खलखल हाँसै डोमनदा।

## ऊँट

दूसरों हुनकों कोन निशान?  
तनिया टा नै शान-गुमान,  
सा सा रे रे ग म पा,  
कवि-आलोचक डोमन दा।

तेसरों हुनकों कोन निशान?  
सौ गो पोथी हुनकों जान,  
चलै बुतरुवे रं पा-पा,  
दू मन भारी डोमन दा।

ऊँट-ऊँट उठले ही जाय,  
रेगिस्ताने में दिखलाय।  
पीठी पर पहाड़ छै,  
सर्दी लगै नै जाड़ छै।  
पानी पियै नै कै-कै दिन,  
एक, दू, तीन, चार, पाँच, छों गिन।  
गर्दन बगुला रं उच्चों,  
पूँछ मतुर बुच्चों-बुच्चों।  
बालू पर की करै कमाल,  
मलकी-मलकी चलै छै चाल।  
नै तिनसुकिया, नै धुलियान,  
ई जहाज बालू रों यान।  
सूप डंगावों या कोय टीन,  
भागथौं नै ई, भेद महीन।\*  
जौनें कहतै भेद महीन,  
गिनें नै पड़तै एक, दू, तीन।

(\*प्राचीन समय में ऊँट सेना में शामिल छेलै, आरो जे भाला, तलवारों सें नै डरलै, ऊ भला सूप या टीन डंगैला सें केना डरें पारें।)

## जोड़


एक+दू = तीन,  
अच्छा नै रीन।  
दू+तीन = पाँच,  
ऐंगना में नाँच।  
पाँच+तीन = आठ,  
पढ़लै पर ठाठ।  
जे गिनतै दस-दस,  
भात खैतै गस-गस।

## टुनमा रों अंग देश

अंग देश रों टुनमा वासी,  
जेकरोँ वास्तै अंगे काशी।  
वीर कर्ण रों देश यही,  
टुनमा उछलै कही-कही।  
एकरोँ नदी ले मन में खोसी,  
चानन, गंगा, आरो कोसी।  
जानवे तोहें देर-सबेर,  
अंग देश रों महिमा ढेर।  
मौसा-मौसी यही कहै,  
ऋष्योश्रृंगी यहीं रहै।  
पूज्य वासूओ कें नै भूल,  
झुलवा पर तोहें कत्तों झूल।  
विक्रमशील हौ विद्यापीठ,  
अभियो गिरी खड़ा छै ढीठ।  
पढ़ी-लिखी कें अपनों ज्ञान,  
मंदारे रं उच्चों तान।

चन्दनवाला, बिहुलामाय,  
 सब बुतरू पर हुएँ सहाय ।  
 टुनमा खाय केँ एक अनरसा,  
 घूमी ऐलै लगे सहरसा;  
 भागलपुर सेँ मधेपुरा,  
 दिखलै कोय नै एक बुरा;  
 ई खुल्लै तभिये जाय पोल,  
 तुरत पहुँचलै जबेँ सुपोल ।  
 साहेबगंज में साहब पाँच,  
 बदमाशों रों करै छै जाँच ।  
 देवघर, दुमका, गोड्डा तीन,  
 घुमतेँ-घुमतेँ ऐलै नीन ।  
 बेगूसराय ठहरलै जाय,  
 एक पुलिस सेँ धक्का खाय,  
 लेलकै कटिहारों में होश,  
 फेनू चली केँ छों-छों कोस,  
 आय पूर्णिया एलों छै,  
 मछली खाय मुटैलों छै ।  
 किसनगंज में लगलें लू,  
 ऐलै अररिया झाँपलें मुँ;  
 भले खगड़िया परसू जाय,  
 बाँके में ऊ रहतै आय;  
 कल जैतै मुंगेर किला,  
 आरो जमुई नया जिला,  
 अंग देश रों यही भुगोल,  
 आपनों भाषा 'आंगी' बोल ।

# बुतरु के तुतरु



प्रथम प्रकाशन  
दिसम्बर १९९९

प्रकाशक  
अंगिका संसद, भागलपुर (बिहार)

सब बुतरूसिनी,  
नया शताब्दी में, तोरासिनी के हाथों में फेनू एकटा नया  
बाल कविता-संग्रह सौंपी रहलौ छियौं, होने मीटूँ-मीटूँ  
कविता केँ, जेन्हों कि तोरासिनी केँ १९९४ में 'ढोल  
बजै छै ढम्मक ढम' में बाँधी केँ सौंपलें छेलियौं।

तोरासिनी जत्तें गदगद होय केँ 'ढोल बजै छै  
ढम्मक ढम' केँ स्वीकार करलौ कि ई दोसरो संग्रह  
तैयार करै में हमरा एन्हे खुशी होलौ छै, जत्तें कि  
पहिलो दाफी नै होलौ होतै।

हमरा खुब्बे विश्वास छै कि ई बाल कविता-संग्रह  
तोरासिनी केँ ओतन्हें सुख देथौं, जत्तें कि बजतें ढोलक  
के ढम्मक-ढम नें देलें छेलौं। लिखियौं, केन्हों लागलौं।

## विनती

हे भगवान, हे भगवान,  
माँगों तोरा सें ई दान—  
पोथी पर सें हटै नै ध्यान,  
सागर नाँखी उमड़ें ज्ञान!  
गलत काम सें पकड़ौं कान,  
बाबू-माय के राखौं मान!  
बनों जगत के सूरज-चान,  
भारतमाय के राखौं शान!

## नानी सें गुहार

नानी, नानी, पानी दे,  
गंदा छौ तें छानी दे!  
भोरे दूध पिलैलौं कर,  
राती लोरी गैलौं कर,  
हमरे साथ नहैलौं कर,  
हमरे साथें खेलौं कर,  
चूलो चोटी बान्ही दे,  
भात-दाल सब रान्ही दे!

की बोलै छैं—गिनती गिन?  
सुनथैं माथों भिन-भिन-भिन!  
खेलभौ, रात हुवें कि दिन,  
की करभैं होय्ये आगिन।  
पुल्ली-डंडा लानी दे,  
ऐंगन्हैं खच्चो खानी दे!



## बारह बच्चा रों घोर

अक्कड़-बक्कड़ दू गो भाय,  
दोनों भाय कें चिन्ता खाय।

एक भाय कें छौं गो पूत,  
माथा पर बनलौं छै भूत।

दूजा कें छौं बेटी हाय,  
बैठली-बैठली खाली खाय।

बारो वीर लड़का छै,  
घोर लगै कि लंका छै।

दोनों बाप विभीषण रं,  
बच्चा सब खरदूषण रं।

केकरौ लंघी, केकरौ थाप,  
दिन भर रहै गरजथैं बाप।

घोर लगै छै मूसो-बिल,  
या मारथों में खचखच ढिल।

## पियक्कड़ मामा

मंटू मामा पीबी ताड़ी  
हाँकेँ लागलै मोटर गाड़ी।  
दायाँ-बायाँ सब कुछ छोड़ी,  
बीचे बीच सें किल्ला तोड़ी  
हैंडिल रही-रही घूमै छै,  
मंटू मामा झूमै छै।  
हैंडिल गेलै बगदी कें  
आरो गाड़ी कबदी कें  
तनटा जे दायाँ झुकलै,  
बीच गढ़ैया में दुकलै।  
गाड़ी भेलै चित्त-चितांग,  
टुटलै मामा के दू टाँग,  
मूँ में घुसलै कीचड़-कादों,  
भर-भर गोबर केरों लादों।  
मामा बोलै गों-गों-गों,  
हुन्नेँ मोटर पों-पों-पों।  
मोटर ऊपर बनलै गामा,  
चक्का नीचेँ पिचका मामा।

## दमड़ी दाढ़ी

अंतर-मंतर, घोंघा-साड़ी,  
आँख की देखें फाड़ी-फाड़ी;  
है ले देलियौ पैसा गाड़ी,  
हिम्मत छौ तें लहैं उखाड़ी;  
अंतर-मंतर, घोंघा-साड़ी,  
भाँसी जाय बाबा रों दाढ़ी ।

दाढ़ी-दमड़ी एक समान,  
निकलै नै, निकली जाय जान,  
दाढ़ी लागै जंगल-झाड़ी,  
वैमें मूँ बंगाल रों खाड़ी ।

बाबा खेलकै एक सुपाड़ी,  
फसलै, लेलकै दाँत उखाड़ी,  
देलकै सौंसे मुँह बिगाड़ी ।  
अंतर-मंतर, घोंघा-साड़ी,  
जान लेबैया दमड़ी-दाढ़ी ।

## पछतावा

एक्का एक आरु एक दाँही दस,  
खाली सिलोटी पर खल्ली घस।  
दू अठी सोल्लह, दू दुनी चार,  
खोआ केँ देखथैं बस मुँहों में लार।  
तीन पँचे पन्द्रह, तीन दाँही तीस,  
पढ़है में मारै छै माथों में टीस।  
चार चौके सोल्लह, चार दुनी आठ,  
चोरी-डकैती सेँ बनलों छै लाट।  
पाँच तिया पन्द्रह, पाँच चौके बीस,  
फेल होलै बुतरु; नै देभों फीस।  
छछौक छत्तीस, छों पंचे तीस,  
सबैं तें बच्चै पर झाड़ै छै रीस।  
सात दाँही सत्तर, सात एकां सात,  
सोटा लै घूमै छै गुरुजी हाथ।  
अठी-अठी चौंसठ, आठ एकाँ आठ,  
घोर गेलै चटिया गुरुजी घाट।  
नों चौके छत्तीस, नों एकाँ नों,  
नै पढ़भौ, नै लिखभौ। खेलभौ जों!  
दस चौके चालीस, दस पँचे पचास,  
नै पढ़लां, नै लिखलां, छीलै छी घास!

## गर्मी

जे रड के ई जेठ छै,  
धरती मटियामेट छै।  
कुइयाँ छै ई हालों में,  
पानी छै पातालों में।  
झुलसी गेलै लू सेँ दिन,  
लू तें लागै छै आगिन।  
धूल जरै छै रुइया रं,  
नदी सुखी केँ सुइया रं।  
वॉन कटैलै जहिया सेँ,  
ई गर्मी छै तहिया सेँ।  
फेनू जे ऐतै बैशाख,  
धरती होय केँ रहतै राख।

## बादल आरो बुतरू

बुतरू :

“नद्दी-नद्दी पानी दे,  
नै तें मछली रानी दे!”

नद्दी :

“कहाँ सें देभौ पानी कें,  
चमचम मछली रानी कें,  
आबें मेघ नै आवै छै,  
पानी कें बरसावै छै,  
बादल कें जाय विनती कर—  
नद्दी कें पानी सें भर।”

बुतरू :

“बादल-बादल पानी दे,  
नै तें बिजली रानी दे!

बादल :

“कहाँ सें देभौ पानी कें,  
चमचम बिजली रानी कें,  
जंगल नै तें छाया दै,  
खड़ा हुऐ लें पाया दै,  
गरम हवा ठडैतै नै,  
बादल भी तें ऐतै नै।”

बुतरू :

“जंगल मेघ कें छाया दें,  
खड़ा हुऐ लें पाया दें।”

जंगल :

“कहाँ सें देभौ छाया कें,  
खड़ा हुऐ लें पाया कें,  
जंगल तें सब कटी गेलौ,  
करखाना में बँटी गेलौ,  
गाछ लगाबें पहिलें, जो,  
सब लोगों सें कहलें जो!”

सूत्रधार :

बुतरू चललै गामे-गाम,  
गाछ लगैनें ठामे-ठाम,  
देखी लोग जुटी गेलै,  
धरती वन सें पटी गेलै।

जंगल-जंगल घूमी कें,  
ऐलै बादल झूमी कें,  
आरो नद्दी बहलै सब,  
सुख आबै, दुख सहलै सब।

## लल्लू लाल

लल्लू लाल,  
करै कमाल ।  
देह-हाथ लकड़ी;  
सुखलौ डाल ।  
छों कीलौ के,  
छट्ठा साल ।  
जरा-सा डाँटों,  
मूँ-गाल लाल ।  
भात मिलै तें,  
दे छै ताल ।  
नाक सिकौड़े,  
देखथैं दाल ।  
मूसों देखथैं,  
हाल बेहाल ।  
खोटा, चीटी,  
वास्तें काल ।  
पढ़ै-लिखै में  
अव्वल आल ।  
यहें कमाल,  
लल्लू लाल ।

## होली

फुर-फुर उड़लै रंग-अबीर,  
खो रे बुतरू पूओं-खीर!  
आय पढ़ै के नाम नै ले,  
कोय रंग माँगौ, दाम नै ले!  
जत्तें छोड़वे छोड़ें रंग,  
आपन्है में सब कर हुड़दंग!  
बड़का सें नै लागिथैं तोंय,  
कत्तो तोहें छै बिडगोंय!  
बड़का केँ जौँ बोलभैं—तुम,  
खैवैं मुक्का धुम-धुम-धुम ।  
अमरेन्दर नें खेलकै भांग,  
नाली में छै चार चितांग ।

## बरसा

बरसा झमझम-झमझम, झम,  
ठनका ठनकै छै की कम!  
बेंगो नै मारै छै दम,  
बरसा झमझम-झमझम, झम ।

झिंंगुर झनझन-झनझन, झन,  
पानी घुसलै सब्भे कन;  
नानी के नाको छै दम,  
बरसा झमझम-झमझम, झम ।

जे भींजतै ई बरसा में,  
गर्दन देतै फरसा में;  
रोग सतैतै फुलतै दम,  
बरसा झमझम-झमझम, झम ।

## शैतानी रों फौल

चम्मो-धम्मो दू गो भाय,  
जखनी नै तखनी अगराय;  
पढ़ियो वक्ती गाना गाय,  
नानी माय के खूब सताय ।  
घर के सबटा टप-टप खाय,  
टोकला पर खाली ठिठियाय;  
इक दिन ऐलै बड़का बू,  
सोंटा लै-छू मंतर छू;  
होश दोनों के गुडुम-गुडुम,  
खैलकै मुक्का धुडुम-धुडुम ।

## अंगिका

दादी-नानी खकसी बोललै—  
हमरो भाषा, अंगिका ।  
अंगिका ही ढोलक-तुतरू,  
तड़बड़ तासा, अंगिका ।  
बुनिया, चमचम, रसगुल्लो सब,  
यहें बतासा, अंगिका ।  
बिन्दी, टिकुली, चूड़ी-चुनरी,  
झुमका-पासा, अंगिका ।  
ई बोलैवाला—घरवैया,  
आरो वासा, अंगिका ।  
अंगिका ही माय छै—  
बोलै ई भौजाय छै ।  
अंगिका माय जै पर खुश;  
ऊ सब खुश छै, बाकी फुस ।

## जाड़

गर्मी जेन्है केँ गेलौ रे,  
देखैं ठंडा ऐलौ रे!  
चद्दर-कम्बल बाहर कर,  
ई भूतों सें डर-डर-डर!  
दाँत करावै किट-किट-किट,  
बच्चा लें ई नै छौ फिट ।  
गुरुवे जी रं दै छौ राग,  
बोरसी में कर जल्दी आग ।  
गाँती बान्हें, ओढ़ रजाय,  
दलकावै छौ जाड़ कसाय ।  
नानी तें बनली छै थिर,  
दादी के कर फिकिर-फिकिर ।  
सटली रहै छै मोखै सें,  
जैतै दादी धोखै सें ।

## तोहरोँ घोर

केहनों तारों ई घर छौ,  
मच्छर छौ भाय, मच्छर छौ ।  
की सिखलें छैं धंधा तोंय,  
नाली रखभैं गंदा तोंय;  
दलदल ऐंगनों-बाहर छौ,  
मच्छर छौ भाय, मच्छर छौ ।  
साफ-सुफय्यत रहलौं कर,  
मसहरी में सुतलौं कर;  
रक्षा लें ई मन्तर छौ,  
मच्छर छौ भाय, मच्छर छौ ।  
गंदा तोरोँ गली-सड़क,  
डी.डी.टी. के दवा छिड़क;  
यहाँ मलेरिया के डर छौ,  
मच्छर छौ भाय, मच्छर छौ!

## दादी

दादी अस्सी सालों के,  
पकलौं-पकलौं बालों के ।  
अँगुरी-अँगुरी काठी रं,  
देह-हाथ सनसनाठी रं ।  
चोरोँ के छै बड़का डोर,  
छोड़ै नैं जल्दी छै घोर ।  
बोली बोलै रुकी-रुकी,  
कोसो बूलै झुकी-झुकी ।  
दादी माय केँ सूझै कम,  
ई बातों केँ बूझै कम ।



## बुतरू आरो विनती

दू-दू ठो रसगुल्ला दे,  
केला छिलका खुल्ला दे;  
लेमनचूस के गोली दे,  
पन्नी ओकरो खोली दे!  
दूध-दही के कुल्ला छी,  
हम्मं बुतरू फुल्ला छी।

## बगुला जी

बग-बग उजरो, बगुला जी,  
मछली मारो, बगुला जी।  
खालिये मछली पेट में देभौ,  
पानियो ढारो, बगुला जी।  
एक खदैया में मछली छो,  
बैठलो बारो बगुला जी।  
एक टांग पर ठाड़ो तोहें,  
देह संभारो, बगुला जी।  
गिरला अगर खदैया में जो,  
होवा कारो, बगुला जी।  
खैला-पीला खूब मोटैला,  
टाँग पसारो, बगुला जी।

## लालच रों फॉल

अक्कड़-बक्कड़ बम्बे बो,  
अस्सी-नब्बे पूरे सौ।

सौ पैसा के टाका एक,  
वैमें पड़लै डाका एक।  
डाका में डाकू चालीस,  
चललै मारा-मारी ढीस;  
जे छेलै वैमें सरदार,  
ऊ तें आरो भी खूँखार।  
उनचालीस कें देलकै मार,  
वहीं लुढ़कलै वैमें चार।

बाकी जे बचलै पैतीस,  
सरदारों पर झाड़ै रीस।  
ऐलै सरदारों कें गुस्सा,  
दस कें देलकै दस-दस घुस्सा;  
घुस्सा खाय कें दसो चिताँग,  
कहीं पें मूड़ी, कहीं पें टाँग।

ई देखी पच्चीस बेहाल,  
तहियो सब ठोकै छै ताल;  
सबठो कें टाकै पर ध्यान,  
बेची देलकै लाज-गरान।

सरदारों हौ देलकै ढीस,  
वहीं पें गिरलै फट-फट बीस।

आबें जे बचलों छै पाँच,  
जान बचाय लें नाचै नाँच;  
सरदारें फूकै छै बीन,  
ताक धिनक-धिन, धिन-धिन-धिन।  
नाँचतें-नाँचतें गिरलै तीन,  
सरदारों कें ऐलै नीन।

बचलों दुए डकैत छै,  
दोनों बड़ी लठैत छै।  
टाका वास्तें खाँव-खाँव-खाँव,  
कुत्ता नाँखी झाँव-झाँव-झाँव।  
दोनों करै छै फन-फन-फन,  
चललै लाठी दन-दन-दन।

गिरलै पट-पट दोनों ठो,  
अक्कड़-बक्कड़ बम्बे बो।  
दादी बोलै हकाय-हकाय,  
लोभी सब कें छकाय-छकाय।  
अस्सी-नब्बे पूरे सौ,  
धौन पकड़बै, मरबे जो!

## सीख

दू-दू बोलें; की टू-टू,  
खेलें बुतरू, घुघुआ-घू  
चोर घूमै छै चुकू-मुकू,  
आरे कुत्ता तू-तू-तू ।  
धुइयाँ उड़तै धू-धू-धू,  
बीड़ी पीयै; आक् थू-थू ।  
बिन्डोबो चलतौ हू-हू,  
गर्मी ऐतौ, लागतौ लू ।  
मंतर पढ़ें नै झाड़ें ज्ञान,  
झाड़-फूँक सें जैतौ जान ।  
जादू-टोना के सिखवैया,  
पक्की मानें—जानलेवैया ।

## भोकसी बिल्ली

बिल्ली ई सरकारी बिल्ली,  
एक दिन बौंसी, दस दिन दिल्ली ।  
पीयै सबटा औंटलो दूध,  
ओकरौ पर छालियो के सूद;  
पोरलो दहियो साथे जोरन,  
छोड़बो करै, तें जेहनों फोरन;  
होली जाय छै कोठी दिन-दिन,  
घर में घूमै; बनली बाघिन ।  
ई बिल्ली नै हेन्हे जैतै,  
साठी माय रं घुरथें रहतै,  
हमरो मिललो हिस्सा खैतै,  
हरमुनियम रं मीं-मीं गैतै!  
आरे कुत्ता आ तू-तू,  
ई भोकसी पर मारैं मूँ!  
एकरो देह के गरदा झाड़,  
आरो फेरू मूँछ उखाड़!  
एकरो मूँ में भरवै भूसों,  
रहतै, रहों घरों में मूसों ।

## ननिहर

नानी-दाद—बूढ़ी दू,  
घी में छाँकलों पूड़ी दू।  
नान्हौ-दादा की छै कम,  
घी सेँ छाँकलों आलूदम।  
मौसी-मौसा खीर में रतुआ,  
मामाजी जंडा के सतुआ।  
हमरा जे देलकै एक चटकन,  
नाना सेँ खेलकै दू पटकन।

## संदेश

सुन रे लेलभा, सुन-सुन-सुन,  
नै पढ़ले तें मारथों धुन।  
जे-जे इस्कूली में गेलै,  
आय वही सब पंडित भेलै;  
कभियो धरलैं पेन्सिल-खल्ली?  
धरलैं, तें बस धरलैं, गुल्ली;  
खाय लें खाली खुन-खुन-खुन,  
सुन रे लेलभा सुन-सुन-सुन।  
पढ़ी-लिखी सब बाबू भेलै,  
हिन्दी-अंगरेजी में बोलै,  
कोय एस.डी.ओ., कोय प्रोफेसर,  
कोय कलेक्टर, कोय इन्सपेक्टर,  
तोहें खाली पन्नी चुन,  
सुन रे लेलभा सुन-सुन-सुन।

## नशाखोरी के फॉल

जे पीयै छै ताड़ी,  
ओकरोँ भाँसतै नाड़ी।  
जे गाँजा पीयै छै,  
थोड़े दिन जीयै छै।  
जे पीयै छै दारू,  
ऊ पक्का घरजारू।  
जे पीयै छै हुक्का,  
ओकरोँ जिनगी फुक्का।  
बीड़ी-सिगरेट पीतै,  
जम-दरबाजा जैतै।  
जे कद्दू-रस पीयै,  
सौ-सौ साल ऊ जीयै।

### पढ़वैय्ये बनतै लाट

अक्कड़-बक्कड़ अस्सी-आठ,  
जे पढ़तै, ऊ बनतै लाट।  
लाट बनी केँ दिल्ली जैतै,  
दिल्ली सेँ पटना ऊ ऐतै,  
पटना आय केँ हुकुम चलैतै,  
पैतै इनरासन के ठाठ।  
अक्कड़ बक्कड़ अस्सी-आठ,  
जे पढ़तै, ऊ बनतै लाट।  
अक्षर—ब्रह्मा, सुरसती माय,  
अक्षर घोकेँ मॉन लगाय!  
अक्षर देतौ धॉन लगाय;  
पढ़वे-लिखवे — पूजा-पाठ।  
अक्कड़ बक्कड़ अस्सी-आठ,  
जे पढ़तै, ऊ बनतै लाट।  
जे नै पढ़तै, जूता सीतै,  
चोरका-चोरका ताड़ी पीतै,  
सुअरे नाँखी जिनगी जीतै,  
धोबी-कुत्ता घरे नै घाट।  
अक्कड़ बक्कड़ अस्सी-आठ,  
जे पढ़तै, ऊ बनतै लाट।

## चिन्ता

टुन, टुन, टुन,  
सब्भैं सुन ।  
खटिया सब में,  
लागलौ धुन ।  
कानें बैठी,  
माथों धुन ।

## साफड़ी

पकलों साफड़ी सेवे रं,  
खाय में मिट्ठों मेवे रं;  
पाँच टका में कीलो भर,  
डम्हक-डम्हक, कचर-कचर ।  
मोती रहें जों घैला में,  
आकि पोस्ता पैला में,  
छिनमान बीच्चो होने रं,  
तारा भरलों दोने रं ।  
गुलगुल साफड़ी गद्दी रं,  
कोय पाकी कोलपद्दी रं,  
भर-भर खोचों लेलें जो,  
पेट चल्लों नै, खैलें जो!

## विश्वास गीत

होवै कामयाब, होवै कामयाब,  
हमें होवै कामयाब, एक दिन,  
हो, हो मन में छै विश्वास,  
पूरा छै विश्वास,  
हमें होवै कामयाब, एक दिन ।  
पढ़वै, लिखवै, पैवै ज्ञान,  
पैवै दुनिया सें सम्मान,  
पढ़वै-लिखवै, पैवै ज्ञान, एक दिन,  
हो, हो मन में छै विश्वास,  
पूरा छै विश्वास,  
पढ़वै, लिखवै पैवै ज्ञान, एक दिन ।  
राखवै भारत माय के शान,  
दे के अपनों माँटी जान,  
रखबै भारत माय के शान, एक दिन,  
हो, हो मन में छै विश्वास,  
पूरा छै विश्वास,  
रखबै भारत माय के शान, एक दिन ।  
सौसे दुनियै होतै घोर,  
नै केकरो सें केकरौ डोर,  
सौसे दुनियै होतै घोर, एक दिन,  
हो, हो मन में छै विश्वास,  
पूरा छै विश्वास,  
सौसे दुनियै होतै घोर, एक दिन ।

बाजै बीन, बजावै तीन



प्रथम प्रकाशन

ई. २००४

प्रकाशक

अंगिका संसद, भागलपुर (बिहार)



नूनु बाबू सिनी सें

बच्चाहौ में आरो छोटों बच्चा सिनी सोचतें होतै कि हमरा सिनी लायक ओत्तें कविता 'ढोल बजै छै ढम्मक ढम' आरो 'बुतरू के तुतरू' में कहाँ छै ! ठीक शिकायत छै । यहेँ शिकायत केँ दूर करै लेली आबें लै आनलें छियै—'बाजै बीन, बजावै तीन' । खाली नुनुवे बाबू नै, ई बीन कुछ हेनों बनैलों गेलों छै कि मंझलकहै नै, नानाहो-नानी, दादाहो-दादी बजावें पारें ।

तें है लें—बजाबों तीन्हो, बाजतौं बीन्हो ।

तोर्हे सिनी रों

## मूसों आरो मामा

मूसों खेलकै कपर-कपर;  
बिल्ली खेलकै चपर-चपर;  
दादां खेलकै गपर-गपर;  
मामा खेलकै हपर-हपर;  
कुतबो खाय मुस्तंडा छै,  
बाँकी खाय लें डंडा छै ।

## बड़का मामा

बड़का मामा मुकुर-मुकुर,  
बीड़ी पीयै धुकुर-धुकुर,  
ताड़ी पीयै दुकुर-दुकुर;  
मरता एक दिन हुकुर-हुकुर ।

## मन्तरिया मामा

अगड़म-बगड़म मामा दू,  
दिन भर मारै मन्तर-छू;  
मन्तर में छोहारा छै,  
दिन में सूझै तारा छै ।

## मट्टीखोर मामा

पिहनी फट्टा ढोल पजामा  
घुड़कुनियाँ मारै छै मामा,  
कोना में जाय सट्टी कें  
जी सें चाटै मट्टी कें;  
देखी खैवों आबें मार,  
मामा दै मुड़गुनियाँ पार ।

## बुझौवल

चार ठो खुट्टा कड़ों-कड़ों,  
वै पर पर्वत बहुत बड़ों;  
पर्वत डोलै, खुट्टा काँपै,  
सबके एक्के साँपें नाँपै;  
हेनों की अचरज छै बोल ?  
नै तें होतौ माथों गोल ।

—उत्तर : हाथी

## बुझौवल

गर्दन ऊँचा पर, मुर्गो नै,  
शिवलिंग लागै, मतुर वहो नै;  
बिन चक्का रों गाड़ी छेकै  
दुश्मन केँ धूरा रँ फेकै।  
हेनों की अचरज छै बोल ?  
नै तें होतौ माथों गोल ।

—उत्तर : ऊँट

## बुझौवल

इक राकस रों माथा खोल,  
वैमें भगजोगनी रों टोल;  
बारी-बारी आँख केँ खोलै;  
कभियो नै कटियो टा डोलै;  
हेनों की अचरज छै बोल ?  
नै तें होतौ माथों गोल ।

—उत्तर : रात

## के की करै

हवा करै साँय-साँय;  
सुगा करै टाँय-टाँय;  
बैलगाड़ी चर्-चोंय;  
बेंग करै टर्-टोंय;  
नाना खाँसै ढाँय-ढाँय;  
नानी करै झाँय-झाँय ।

## समझ

कुल्ला बूझै, आ तू-तू,  
आरो कबूतर बियो-बियो;  
अर्-अर्, बूझै बकरी;  
बिल्ली बूझै, मियो-मियो ।  
म-अ-र-ए चारे टा,  
दुष्टें बूझै मारे टा ।

## मामा रों हाल

मामा रों बस एक सवाल—  
कखनी पकतौ रोटी-दाल?  
ई देखों मामा रों हाल,  
मछली बाहर, आपने जाल ।  
संभरै नै मामा से झाल,  
तहीं से दै चूतड़ पर ताल ।  
आयकल मामा मालेमाल,  
दू कीलो भर दोनों गाल ।  
कबे कटैवों भालू-बाल?  
मामा ऐल्हैं नयका साल ।

## कैलू के करनी

खैवे पर ध्यान दै,  
के एकरा ज्ञान दै।  
आवै छै घुप सना,  
बानर ज्यों हुप सना।  
लुचकै छै लुप सना,  
पकड़ै छै चुट सना।  
टूटी जाय पुट सना,  
घर घूसै सुट सना।  
कैलू के करनी,  
माय भरै भरनी ।

## मामा

जंगल-झाड़-पतार-कदीमा-कद्दू-आलू,  
जत्ते नै छै मामा ओत्ते मामी चालू।  
अगरो-बगरो, कौआ-मैना, पिपरी-खटमल-खोटा,  
दूध किनै लें मामा गेलै भूली ऐलै लोटा।  
हाथी-गीदड़-भैंसा-चीता-केला-खरबुज-भुट्टा,  
भैंस कहीं तें छोड़ै मामा, लै आनै छै खुट्टा।  
अड़गड़ मारै, बड़गड़ मारै, मारै कुत्ता-बकरी,  
खाय सें पहिलें यहे हुऐ छै मामा जाय छै ढकरी।  
आलू-बालू, छरीं-लोहों, नानी-नाना, दादा,  
कोय परीक्षा हुएँ, मामा कॉपी छोड़ै सादा।  
देह बढ़ै लें खाय छै मामा किसमिस-कंद-पपीता,  
तीन फिटों सें बढ़थै नै छै, दिन भर नाँपै फीता।

## करनी रों फॉल

सबसे बची कें हट्टी कें,  
दीवारों से सट्टी कें,  
दादा खाय सरपट्टी कें,  
तोड़ी देलकै चट्टी कें,  
पोंआ-पासी-पट्टी कें ।  
देलकै मांय धरपट्टी कें ।

## काका आरो बुतरू

जब ताँय घर में काका छै,  
मालिक बनलौ आका छै ।  
घर में दिल्ली-ढाका छै,  
खूब कमैलौ टाका छै ।  
बुतरू वास्तें फाका छै,  
खेलवे पर ही डाका छै ।  
बच्चै काँटों-कूसों रं,  
डर से बच्चा मूसों रं ।

## मामा रों खेल

पेट बराबर फुललौ गाल,  
मामा चलै दुलत्ती चाल ।  
झापड़ोँ माथोँ, बढलौ चूल,  
जैमें पाँच पसेरी धूल ।  
पढ़ै-लिखै में अजगुत खेल,  
नौमी में नौ दाफी फेल ।  
रौदिये में घूमै छै मामा,  
भैगने कें धूनै छै मामा ।  
दिन भर मारै घर में मूसों,  
माथा में भरलौ छै भूसों ।

## पियक्कड़ छोटका मामा

बड़का पक्का चोर पियक्कड़ छोटका मामा,  
चाटै हरदम ठोर पियक्कड़ छोटका मामा ।  
कान अमैठै बुतरू सब के बिन बाते के,  
जी के बड़ा कठोर पियक्कड़ छोटका मामा ।  
चोर-चिबिल्ला वास्तें एकदम पंडित-ज्ञानी,  
बुतरू वास्तें 'बोर' पियक्कड़ छोटका मामा ।  
दिन भर तमतम मुँह करै बिन टोकले-टाकले,  
गरजै छै घनघोर पियक्कड़ छोटका मामा ।  
जखनी दै छै मार दरोगा-पुलिस-सिपाही,  
खूब चुआवै लोर पियक्कड़ छोटका मामा ।  
कत्तो खाय छै मार मतर नै आदत सुधरै,  
पक्का छै लतखोर पियक्कड़ छोटका मामा ।

### मामा

लरपच मामा-बत्ती बाँस,  
देहों पर नै जरियो माँस ।  
बोली तै पर टनकों टाँस,  
लौंगिया मिरचा नाँखी झाँस ।  
बिलखै छौं कहिया सें बुतरू,  
लानी दौ करकोइयाँ-तुतरू ।

### माघी धूप

बर्फें रं छै अबकी धूप,  
बड़ी कठोरिन माघी धूप ।  
देह जरो नै गरमावै छै,  
उगवो करै तें बाँझी धूप ।  
दादा घर में थरथर काँपै,  
बड़ी कसाय कनकन्नी धूप ।  
बोरसी तर सें बाबा बोलै,  
मारतै यें मरखन्नी धूप ।  
गोड़ लगै छी उगों-उगों,  
नानी, दादी, काकी धूप ।

## पाँच मुकरी

इस्कूल पहुँचो आगू ऐहौं;  
छो घण्टा तक माथो खैहौं;  
सब चटिया लुग घूमै छुट्टा;  
के रे, गुरू जी?  
नै रे—हुट्टा।

२

खावै सें मतलब भरपेट्टा;  
टानै छै, जतना रग-चेट्टा;  
चलै झुण्ड में बान्ही पाँती;  
के बरियाती?  
नै रे—हाथी।

३

भोरे होहौं नींद तुड़ावै;  
बड़को सब रों होश उड़ावै;  
भन-भन करै जे रातो-दिन भर;  
की रे दादी?  
नै रे—मच्छर।

४

सड़लहौं अन्न के देखी रीझै;  
पेटो लें नालियो ताँय गींजे;  
आपनों भाग पर आपन्है खीझै;  
की अरे टूअर?  
नै अबे—सूअर।

५

निकलौं जेन्हें कि साथें लागतौं;  
गोड़े लग जाय कूँ-कूँ करतौं;  
कोय्यो बैरी सें नै डरतौं;  
की अरे कुत्ता?  
नै अबे—जुत्ता।



## बाजै बीन

बाजै बीन, बजावै तीन,  
बात बड़ों ई, बड़ा महीन ।

नाँती वास्तें बात बरोबर  
की तबला, की ढोलक-टीन,  
बाजै बीन, बजावै तीन ।

बात बुझै लें बिचला मामा  
दौड़लै-लंका, तिब्बत, चीन,  
बाजै बीन, बजावै तीन ।

नानी सें जों बात पूछलियै,  
हुनका आवी गेलै नीन;  
बाजै बीन, बजावै तीन ।

## जिनखेल

तड़बड़ ताशा, तड़बड़ ताशा,  
पूजा पर सें गोल बतासा ।  
मामी छै खोजै में बेदम,  
ई देखी पंडित जी तमतम ।  
नानी फूलों तर में खोजै,  
ई जिनखेल लगै छै सोझै ।  
आखिर में जाय खुललै पोल,  
मामा मूँ सें फुटै नै बोल ।  
पूज्ही वक्ती वहें तमाशा,  
तड़बड़ ताशा, तड़बड़ ताशा ।

## नानी

अ से अक्खज, ऊ से ऊन,  
नानी जैती देहरादून।  
क से कौआ, ख से खाल,  
नानी केरो गलै नै दाल।  
ग से गुल्ली, घ से घूस,  
केना काटतै नानी पूस।  
च से चुक्का, छ से छाल,  
चलते रहै छै नानी गाल।  
ज से जातो, झ से झोक,  
नाना भरगर नानी फोक।  
ट से टूसो, ठ से ठूँठ,  
नानी सहै नै कटियो झूठ।  
ड से डब्बू, ढ से ढोल,  
नानी रो सब दाँते गोल।  
त से तुमड़ी थ से थान,  
नानी रो नाँती जजमान।  
द से दमड़ी, ध से धोन,  
नानी चूल-सनांठी सोन।  
न से नाना, प से पान,  
नान्है पर नानी रो ध्यान।  
फ से फुदूदी, ब से बाँस,  
खनखन नानी सहै नै झाँस।  
भ से भगतिन, म से माय,  
नानी हमरी सुद्धि गाय।  
य से युक्ति, र से रीत,  
नानी खैथौं गावै गीत।  
ल से लट्ठी, व से वाह,  
नानी रो चाय्ये पर चाह।  
स से सुइया, ह से हौर,  
नानी रहते केकरो डौर।

नूनू नीन बुलावै छै,  
नीन कैन्हें नी आवै छै।  
नीन बसै छै तिब्बत-चीन,  
कल्हें-कल्हें आवें नीन!  
पर्वत-जंगल लाँधी कें,  
पोखर-नद्दी-बांधी कें,  
घोड़ी चढ़लें आव गे नीन,  
गिनती गिनलें इक-दू-तीन!  
रस्ता में नै रुकियैं तोंय,  
बेंग बुलैतौ टर्म-टोंय।  
उड़लौ ऐतौ लाल परी,  
रौकतौ तोरा घुरी-घुरी;  
चंदा देतौ झूलै लें,  
ई रस्ता कें भूलै लें;  
पर रस्ता ई भूलियैं नै,  
चंदा पर तोंय झूलियैं नै,  
झब-झब मलकी ऐलै नीन,  
तुतरू-ढोल बजैतैं-बीन।  
नीन सुतै छै हौदी में,  
नूनू माय रों गोदी में।

नूनू नींद बुलावै छै,  
नींद कैन्हें नी आवै छै!  
आव गे नींद दुलारी आव!  
नूनू केरों प्यारी आव!  
काजर आ कजरौटी लै,  
मिसरी, मक्खन, रोटी लै,  
चाँद खिलौना लेनें आव,  
लाल परी बोलैनें आव!  
छम-छम नाँचतै लाल परी,  
नुनूओ नाँचतै हाथ धरी।  
आँख मौलै छै दूनू के,  
नींदियो आरू नूनू के।  
नींदिया सुतलै बारी में,  
लाल परी गोरथारी में।  
चंदा सुतलै हौदी में,  
नूनू सुतलै गोदी में।

## जंगल-जान—जहान

### पहिलों दृश्य

मंच पर कटलों-कटलों गाछों रों दृश्य । मंच के बीचोबीच दू मोटों रं गाछ । एक दिशा से पाँच आदमी मंच पर आवै छै । दू के हाथों में बन्दूक छै आरो तीन रों हाथों में कुल्हाड़ी । पाँचों केरों मुँह-माथों कपड़ा से ढकलौ छै । कुछ देर लेली पाँचो हिन्ने-हुन्ने बड़ी सावधानी से घूरे छै आरो फेनू कुल्हाड़ीवाला आदमी गाछ के काटना शुरू करी दै छै । पेड़ काटे के आवाज गूँजे छै । बन्दूकवाला दोनों आदमी बन्दूक तानलें दुनूं दिशा में हिन्ने-हुन्ने ताकतें घूमै लागै छै । गाछ कटी के गिरै छै आरो एकरे साथे पर्दा गिरै छै ।

### दुसरों दृश्य

(एकठो कटलों पेड़ पर बैठलौ सिंह कुछ देर मौन रहला के बाद दोनों दिश मुँह करी के हाँक लगावै छै ।)

सिंह :           छोटू-मोटू   अल्लर-मल्लर,  
                  डिग्गा-डिग्गी,   झाँझर-मानर,  
                  जे जन्ने छैं, जल्दी आव;  
                  हाथी, भालू, हरिन, बिलाव,  
                  बानर, भैंसा, बाघ, सियार,  
                  नया विपत छौ, नया कचार!  
                  कटलों जाय छौ जंगल-गाछ,  
                  मक्खन की? मिलतौ नै छाछ ।  
                  बालू पर खाड़ें छौ नाव  
                  जे जन्ने छैं,   जल्दी आव!

(मंच पर चारो दिसों से बाघ, भालू, हाथी, भैंस, सूअर आरनी रों प्रवेश आरो एक-एक करी के सिंह के नगीच आवी के बैठी जाय छै । गाछ-बिरिछ दिस देखतें सिंह फेनू हाँक लगावै छै ।)

सिंह :            कौआ, मैना, सुग्गा, गिद्ध,  
                    ध्यान जगाय में बगुला सिद्ध,  
                    कोयल, पपीहा, मैना, मोर!  
                    ढुकलौं छौं जंगल में चोर।  
                    भारी पड़तौ जिनगी भाव,  
                    जे जन्नें छैं, जल्दी आव।

(मंच रौं पिछुलका भागौं पर खड़ा गाछ सिनी पर मैना, मोर, बगुला, चील आरनी उड़ी-उड़ी आवी कें बैठे लागै छै । (ई काम गाछों में लोहा आरो चिड़िया सिनी के टांगों में चुम्बक बान्ही कें लेलौं जावें सकै छैं।) सिंह कें छोड़ी जेकरा जे कहना होय छै, आपनों बात खाड़ौं होय्ये कें कहै छै ।)

भैंसा :            की बातों लें छिकै बुलाहट?  
                    कौन विपत्ति के छै आहट?  
                    की जंगल में देखलौ कोय;  
                    राखी देवै ओकरा धोय।  
                    कैहिनें तोरौं मौन मलीन?  
                    जल्दी बोलौं—एक, दू, तीन।

सिंह :            संकट में छै पशु-समाज,  
                    जंगल पर गिरलौं छै गाज।  
                    रोज कटै छै गाछ-बिरीछ,  
                    आरो हम्मैं कैहिनों नीच।  
                    देखौं टुक-टुक जान बचाय,  
                    कैहिनों हम्मैं घोर कसाय!  
                    पर असकल्ले करियै की,  
                    भिड़ी कें वै से मरियै की !

(सिंह गालों पर हाथ धरी गुमसुम बैठी जाय छै । गाछों पर चिड़िया सिनी के कुछ देर लेली काफी शोरगुल होय छै, फेनू हठाते बन्द (ई काम टैपरिकार्ड में बंद चिड़ियां सिनी रौं रं-रं के आवाज से करलौं जैतै) ।

तबें एक ओर बैठलों सूअर खाड़ों होय कें बोलै छै।)

सूअर :            जंगल पर जों होय छै घात,  
यैमें भिड़ै के की छै बात!  
जंगल जानौ, जानौ गाछ,  
हमरा नै पीनौ छै छाछ;  
बसवै जाय कें दुसरो वॉन,  
गड़लों छै यैठां की धॉन ?

हाथी :            सूअर तोहें सूअरे रहले,  
बिन बुद्धि के दुअरे रहले,  
वनकट्टां कोय छोड़तौ वॉन,  
छोड़ी रहलों छै वें कॉन?  
सब जंगल तें कटले जाय,  
बस्ती वैमें बसले जाय;  
बस्ती में घूमै छै लोग,  
वन कें लागलै उजड़ा रोग।  
सोचैं, रहवे कन्ने जाय?  
ठामे ठाड़ों हँसौ कसाय!

भालू :            जंगल छेकै हमरों घोर,  
घोर बिना तें डोरि-डोर।  
छाती फाटै, व्याकुल जी,  
लेकिन हममें करियै की !

खरगोश :        कैहिनें चिन्तित तोरा सब,  
लोग यहाँ छै अरब-खरब;  
जाय छियौं; करवै फरियाद,  
जंगल-जन्तू जिन्दाबाद!

उल्लू :            अकिल तोरा कुछ ऐतौ नै,  
 भोलोपन भी जैतौ नै,  
 जे जगल कें काटै छै;  
 काटतें दिल नै फाटै छै;  
 जौनें देतें ऐथें दुख;  
 वें मनुक्ख की देतै सुख?  
 अपन्है में कुछ करों उपाय;  
 तभिये भागतौं काठ कसाय ।

(पीछू के एक गाछ अपनों जग्घा पर थोड़ों हिलै छै आरो दायँ-बायँ दिशा में आपनों दू डाली कें हिलाय-हिलाय बोलै छै ।)

वृक्ष :            अभी मनुक्खों कें नै चेत,  
 लागतै दुर्दिन के जब बेंत;  
 छाँव नै मिलतै कोसो-कोस,  
 हवौ शुद्ध नै—ऐतै होश!  
 पर दुसरा पर कथी के आस,  
 जों उपाय छै अपनों पास ।  
 चाहौ—भागें अगर कसाय,  
 सबसें अच्छा यहें उपाय,  
 वनकट्टा जेहिनें कें आवें,  
 सब चिड़ियाँ मिली शोर मचावें;  
 झपटै वै पर बाघ-सियार,  
 फँसतै अपने आप शिकार ।

(बैठलों बन्दर नाँचतें उठै छै, फेनू रुकी कें बोलै छै ।)

बन्दर :            एकदम-एकदम-एकदम ठीक,  
 मिलतै वनकट्टा कें सीख ।  
 नोची-भोंमरी हम्मैं लेवै,  
 जिनगी भर के सीख सिखैवै ।

(गाछी पर बैठलौं सुग्गा पाँख डोलैतें बोलै छै)

सुग्गा : कल्हो ऐतै भोरे-भोर,  
करिये उठवौं हम्मैं शोर।  
सुनथैं दौड़ियौं तोरा सब,  
मलकी कें नै—झब, झब, झब!  
इखनी जे कुछ भी कहलौं  
बात यही पक्की रहलौं ।

(सिंह दोनों हाथ उठैतें खाड़ों होय बोलै छै।)

सिंह : राय यही हमरौ स्वीकार,  
देखलौं हम्मैं करी विचार;  
अपनों किस्मत अपनों हाथ,  
कौनें दै छै केकरों साथ;  
मिल्लत में ही ताकत छै,  
नै तें सबठा आफत छै।  
संघे सें सब डरै यहाँ,  
एकरे बिन सब मरै यहाँ।  
मिली-जुली कें भिड़ना छै,  
यम के आगू लड़ना छै।  
साफ-साफ जानों मतलब,  
जंगल कटै तें हमरौ सब।  
याद करों कुछ सालों कें,  
तबकी-अबकी हालों कें—  
कतें बड़ों रहै संसार,  
कहाँ गेलै हमरों परिवार?  
मारलौं गेलै जंगल में,  
कोय शहरों के दंगल में;  
मिलवां मिलै नै आय बटेर,  
कल ई लागथौं हमरौ फेर।



आय सें आबें जंगल में,  
 हानि-लाभ के दंगल में,  
 साथे-साथ ही रहना छै,  
 ज्यादा कुछ नै कहना छै।  
 अगर बनैलों राखों रीत,  
 निश्चित होतै हमरों जीत!

(सब पशु-पक्षी आपनों टांग आरो डैना ऊपर उठाय-उठाय कें सिंह के बातों के समर्थन करै छै।)


### तेसरों दृश्य

(मंच के पीछू दू-चार कटलों वृक्ष दिखावै छै। बायाँ-बायाँ भी धारा-पाती गाछे छै। मंच रों बीच एक गाछ छै। देखतैं-देखतैं मंचों पर पाँच ठो आदमी के घड़धड़ैलों प्रवेश होय छै, जे मंच पर ऐतैं बड़ी सावधानी रों साथ चारो दिस देखना शुरू करै छै। पाँचो आदमी के मुँह आरो माथों कारों कपड़ा सें ढँकलों छै। दू आदमी के हाथों में बन्दूक छै, जे मंच के दोनों दिश पहरेदार के रूपों में तैनात होय जाय छै। बाकी तीन के हाथों में कुल्हाड़ी छै, जे मंच के बीचोबीच खाड़ों गाछ कें काटे के गरज सें सब्भे ओर में खाड़ों होय जाय छै। वैसे एक जेन्हें कुल्हाड़ी चलाय के मुद्रा में आवै छै कि गाछों पर सुग्गा टें-टें करना शुरू करी दै छै, जेकरों साथ्हेँ ढेर किस्म के चिड़िया रों आवाजो उठें लागै छै। लकड़कट्टा सिनी हतप्रभ होय कें आकाशों दिस ताकै छै। तभिये एक कोना में गुरैतें होतें बाघ दिखावै छै। बाघों के देखतैं लकड़कट्टा साथ्हेँ बन्दूक वालाहो थरथरावें लागै छै। देखतैं-देखतैं आरो-आरो दिशा सें भालू, हाथी, कुत्ता, सियार आरनी के आवाज गनगनावें लागै छै। पाँचो आदमी वहाँ सें भागै के फिराकों में होय जाय छै कि तभिये बन्दर, सियार, कुत्ता वहाँ आवी कें वै सिनी कें नोंचवों-खखोरवों शुरू करी दै छै। मंच के बीचू में खाड़ों गाछो अपनों डाली सें लकड़कट्टा सिनी कें दू-चार झाँटों दै छै। कुछुवे क्षणों में अपनों-अपनों टाँग उठैनें दुनू दिसों सें हाथी आरो भालू आवी कें वहाँ खाड़ों होय छै, जे देखतैं पाँचो बन्दूक आरो कुल्हाड़ी वांही फेंकी

कान पकड़लें एक-दूसरा से टकरैतें दर्शकों दिस कूदी के भागी जाय छै ।  
पाँचो के भागलें वहे सब प्राणी मंचों पर जौरो होय जाय छै आरो आगू  
के अपनों दोनों टाँग-हाथ उठैनें नाँचै-गावें लागै छै । गाछी सिनी पर  
बैठलों चिड़ियो सिनी डैना उठैनें शोर मचावें लागै छै ।)

(पर्दा के गिरवों)

# एक छड़ी पर अण्डा नाचै



प्रथम प्रकाशन

ई. २००५

प्रकाशक

अंगिका संसद, भागलपुर (बिहार)

### नूनु बाबू सिनी सें

अरे बुतरुआ पिहनें चश्मा,  
होय वाला छौ नया करिश्मा!  
जे नै चाहै पढ़ै-लिखै लें,  
तहियो ऊँचे-ऊँच चढ़ै लें,  
कोय मायने में ज्ञान नै कम,  
पन्नी रँ बुद्धि चमचम,  
ओकरो लें छै अवसर चानी,  
है ले एक सौ एक पिहानी!  
अरे बुतरुआ इन्दु-पिन्दु,  
आनलें छियौ नया निघन्दु,  
घोकें, दुसरौ कें घोकबाव,  
अबकी नै छोड़ना छै दाव।  
तहूँ बहावें ज्ञान रों बोहों,  
पंडित-ज्ञानी मानतौ लोहों।

—अमरेन्द्र

१

सूँढ़ गणेशों के जे लागै,  
कभी गणेशों केरों पेट,  
ओकरों वास्तें बात बरोबर  
की छत-छप्पर, धरती-हेट ।

—कद्दू

२

एक गणेश जी हेनों देखलां  
सूँढ़ कमर से लटकै छै;  
भरी-भरी लड्डू की मिलतै  
एक चौंर लें भटकै छै ।

—मूसों

३

माथा पर छै मुकुट बिराजै,  
मुँह के नीचें छोटका सूँढ़,  
बगुलौ से जादा बगबग छै,  
जेकरों बोली तिलकुट-गुड़ ।

—शंख

४

कारों बदरा धरती पर,  
देखी दुश्मन थर, थर, थर,  
घूमै सबके घरे घर,  
मारों तें छिलकै ऊपर ।

—छाता

५

बेटा दुबरो, कोठी बाप,  
ब्रह्मा के देलों छै शाप,  
ओंन जरो नै कभियो खाय,  
पानी पीयै ओछरी जाय ।

—गिलास-लोटा

६

एक ठो हेनो छता छै  
तनलो रहै जे सालो भर,  
छाता में सौ भुरकी झलकै,  
कपड़ा उड़ै छै फर-फर-फर;  
जोर-जनानी मर-मरदाना  
गैया-बकरी ओकरे तर ।  
—झबरोँ गाछ

७

एक छड़ी पर अण्डा नाचै  
जैमें चिड़ियाँ आवै-जावै;  
अण्डे गिरै नै छड़िये डोलै  
कत्तो कोय्यो जोर लगावै ।  
—गाछ

८

भरी मुँहों में ऐला-गोटी  
जतना बोली तित्तों छै;  
मुँह लटकैनें झुलतें रहतौं  
सब्भे बल पर जीतौं छै ।  
—करेला

९

एकठो बूढ़ों हेनो भी छै  
नाक, कान, जी, कुछुवो नै;  
भरी मुँहों पर दाँते देखों  
बोलें; फेरु पूछुवौ नै ।  
—भुट्टा

१०

लाल पटोरी पिन्ही डायन  
जखनी जेकरा चाहै खाय,  
खाय वक्ती नै पानी पीयै  
पीयै तें ऊ मरिये जाय ।

—आगिन

११

अजगर-अजगर मिली-जुली  
कहीं सटी कें कहीं खुली,  
कोसो चलै, नै मानै छेक,  
टरक दबैलों मरै नै एक ।

—सड़क

१२

देह छुवै, देह छुवै नै दै ।  
के छेकी हेनी, के छेकी है ?

—हवा

१३

गावै खुब्बे, हिलै नै ठोर,  
कानै छै पर गिरै नै लोर,  
गला दबैवौ, कुछ नै बोलतौं,  
कान अमेठवौ, हाँसतै रहतौं ।

—रेडियो

१४

एक चौँर एक बित्ता के,  
भीतर फोंकी, ऊपर ठोस;  
फूकी अगर उड़ावों जों तोंय,  
फोंकी गूँजै भर-भर कोस ।

—शंख

१५

बेलुन हेनो फूलै-पचकै,  
तार जकां जे कभी नै लचकै;  
पानी छोड़ी गरमी पीयै;  
चमगादड़ रं जिनगी जीयै ।

—छाता

१६

खड़ा शीत में खाड़े रहै छै  
सौंसे मुँह, ढाँकी कें गाँती;  
गाँती हटें तें खलखल हाँसै,  
दाँत देखी कें लागै दाँती ।

—भुट्टा

१७

हेनो छै ई घर के धुनियाँ  
मूँ में सूतो, कमर में सुइया,  
गेंदरा की यें सीतै धुनियाँ,  
कपड़ा चीरै, छीटै रुइया ।

—मूसो

१८

पाँच भाय में सबसें छोटो  
जत्ते नाँटो ओत्तै मोटो;  
है नै खाली एक्के छोटका  
सब्भैं बोली बुलावै—मोटका ।

—अंगूठा

१९

एक किला पर पाँच सिपाही,  
पाँचो-पाँच रकम के छै;  
जे बूझै कि मेल नै यैमें;  
ऊ नै कोय करम के छै ।

—पाँचो अंगुली



२०

धरती पर हेनों एक बदरा  
जैसे उजरो पानी बरसे;  
सबटा पानी नरिये पीये,  
खेत-खेत पानी ले तरसे ।

—गाय

२१

देखो जबे किताबे पर छै,  
कपड़ो के ओतै शौकीन;  
तहियो एक नै अक्षर जानै,  
नाँगटै घूमै भारत-चीन ।

—मूसौ

२२

पीढ़ा पर बैठली इक बुढ़िया  
घुमी-घुमी गावी के खाय;  
नाके बाटे जे कुछ निगलै,  
मुँह दे के सब उगली जाय ।

—चक्की

२३

एक राकस के मुँह अजूबा,  
आँखे सीधी में मुँह-नाक;  
गल्ला बाटे खैलो उगलै,  
निगलै वक्ती पारै हाँक ।

—चक्की

२४

दू नालो के इक बन्दूक,  
बन्दूक लागै छै सन्दूक;  
एक साथ गोलिये नै चार,  
छोड़वैय्या के गोड़ो पार ।

—पैजामा

२५

पानी पर एक राकस दौड़े  
मुँह में लैकें लोग पचीस;  
मुँह में जाय लें मार करै सब,  
मुँह में लैकें माँगै फीस ।

—नाव

२६

उड़ते कौन चिड़ियाँ के ई  
कटी गेलों छै डैनों-पाँख?  
लोर-चुआवै ढर-ढर, ढर-ढर  
फोटो लेलें घूमै आँख ।

—नाव

२७

के जानै छैं ऊ नावों के  
जे कि पानी में नै तैरे;  
पानी ही जेकरा में तैरे  
खेवै, गोरी गुन-भावों के ।

—दीया

२८

हेनों इक सूरज छै मस्त,  
राहै रोशन, दिन में अस्त ।

—दीया

२९

आँख-कान नै, खाली जी छै,  
जी सें जेकरा चाहै चाटै;  
कुआँ-पोखरी डरें नै जाय छै,  
मौन; नहैवों, सुनिये फाटै ।

—आग

३०

अजब कहानी इक नारी के,  
आँख क्रोध से रत-रत लाल;  
चूल तेँ एकदम हिन्दुस्तानी,  
ईंगलिस्तानी गोरों गाल ।

—आग

३१

सौ सैनिक-शव, इक ताबूत;  
जली केँ सबटा राख-भभूत ।

—दियासलाई

३२

सौ संबंधी मरलों-भतलों  
इक कुइयाँ में पैलों गेलै;  
एकेक करी केँ खींची-खींची  
बाहर करी जलैलों गेलै ।

—दियासलाई

३३

चिकनों-चिकनों देह गठीला,  
हेनों रूपवती ऊ लीला;  
अपना दिस केकरा नै घींचै  
देखवैय्या के फोटो खींचै ।

—आईना

३४

बोलै कुछु नै बड्डी घाय,  
बहुरूपिया रं भेष बनाय;  
जेकरा देखै होने लागै,  
घोर अन्हरिया देखी भागै ।

—आईना

३५

एक जनानी कें भटियैलें  
हवा उडैलें चल्लों जाय;  
उड़ी जनानी गेलै हिमालय  
घुमी-घुमी कें लोर बहाय ।

—बदरा

३६

अभी-अभी ई भालू छेलै,  
इखनी हाथी लागै छै;  
चाबुक खैथैं कानें लागलै  
लोर बहैतें भागै छै ।

—बदरा

३७

भरी मुँहों पर बारह टिकुली,  
सब्भे कें ऊ खूब सोहाय;  
ठोड़ी, गाल, कपारों पर जे  
दोनों आँख नचैलें जाय ।

—घड़ी

३८

एक घरों में बारह बच्चा,  
माय-बाप सब साथे छै;  
सब बच्चा हरदम्में रुसलों  
गोड़ डुलाय नै माथे छै;  
माय-बाप घूमी समझावै  
कुछ हेनों ही बाते छै ।

—घड़ी

३६

जादू छड़ी घुमैथैं घन-घन  
अंगुठा पर नाँचै इक चक्का;  
जे बतलैतै ओकरा लड्डू,  
नै बतलैतै ओकरा मुक्का ।

—चाक

४०

माँटी के थाली पर माँटी,  
जैसेँ निकलै लोटा-बाटी ।

—चाक

४१

भरी देह पर माँस कहीं नै,  
बाहर हड्डी, भीतर खून;  
पट्टे में ओकरोँ माथोँ भारी,  
लिखै के धुन बस, कत्तो धून ।

—कलम

४२

काठोँ के देह-गोड़,  
लोहोँ के नाक;  
जीहा छै आरी के  
तालू दू फाँक ।

—कलम

४३

आँख, नाक, जी, सब्भे कुछ छै,  
हाड़ो देह में, खूनो ठो,  
अलग करै, जोड़ी भी लै छै  
धड़ आ मूड़ी दोनोँ ठो,  
जन्मे सेँ बोंगोँ छै हेन्होँ;  
लोहोँ,काठ, शिला छै जेहनों ।

—कलम

४४

अजब विधाता केरों खेल,  
खाली मुँह-कानों के मेल;  
दाल-भात कुछुवो नै खाय छै,  
तरकारी सब निगली जाय छै ।

—लोहिया

४५

धरती पर पानी, आकाशों में आग,  
गरजै छै मेघो भी गड़-गड़ के राग ।

—हुक्का

४६

नै देखलें होबैं तोंय  
हेनों मटक्युयाँ;  
पानी के बदला में  
आग आरो धुय्याँ ।

—चीलम

४७

दूधों सेँ दू चम्मच भरलों,  
दूध में तैरै एक-एक मक्खी;  
मिली उड़ावै सौ-सौ पंखा,  
तहियो उड़ै नै, गेलै थक्की ।

—आँख आरो पिपनी

४८

दू नौका में एक-एक तिरिया,  
नाव चलावै सालौ सेँ;  
नाव गढ़ैया में फँसलों छै,  
निकलै नै, निकाल्हौ सेँ ।

—आँख

४६

सिर पर टोकरी, मुँह में खन्ती,  
गहना सेँ लागै कुलवन्ती;  
पाट-पटोरी सब कीमती छै,  
गाछ खोदै छै, मतछिमती छै ।

—कठखोद्दी

५०

एक डायन के दाँत पचास,  
जेकरोँ सखी सुखैलोँ काठ;  
डायन हेनोँ कि निगली गेलै  
सखिये केरोँ बेटा साठ ।

—आरी

५१

घड़ियाले रं चोखोँ दाँत,  
पानी पर जे बुलै नै जाय,  
जंगल-जंगल खाली घूमै,  
जीव के बदला गाछे खाय ।

—आरी

५२

तीर-धनुष सेँ कसलोँ-बंधलोँ  
फहरै केन्होँ खड़ा रूमाल,  
ऊपर-नीचेँ पिछुआवै छै  
जाहै केँ, जाते छै काल ।

—गुड्डी

५३

एक चिड़ैयाँ हेनोँ कोँन  
जेकरोँ माँस नै खैलोँ जाय,  
जेकरोँ खोता मिलै कहीं नै,  
गाछ नै बैठै, उड़ै उघाय ।

—गुड्डी

५४

भगजोगनी सेँ भौरा जन्मै,  
कोय्यो नै यै पर पतियावै;  
पंख जेन्है भौरा सेँ निकलै,  
उड़ी-मुड़ी आँखें पर आवै ।

—काजल

५५

सोनो के देह, मूड़ी कारो,  
मौगी-मरद सभै केँ प्यारो,  
हौल्को जेना हवै रँ ऊ  
लीपै केरो मनाही छै ।  
माय कहै ई विपदाहारी,  
बच्चा लेँ ई आफत भारी ।

—काजल

५६

अंगुरी में अंगुठी रं बैठै  
आरी केरो सहेली,  
अमरेन्दर भी नै बूझै छै  
हेनो छिकै पहेली ।

—कैंची

५७

पीछू कटै तेँ कौआ बोले,  
आगू कटै तेँ बगरो;  
बैठै तेँ हाथे पर बैठै  
मिलै घरे-घर सगरो ।

—कैंची



५८

हेनों पेट मुटैलों छै कि  
गोड़ दिखै नै हाथ दिखै,  
खाय लें वैद्य मना करलें छै,  
मुँह बैलें दिन-रात दिखै,  
हेनों आबें जिनगी जीये,  
पेट भरी बस पानी पीये ।  
—घैलों

५९

पीछू कटै तें दारू पीये,  
आगू कटै बटोही;  
तीन वर्ण के; नर केँ मोहै  
चिड़ियाँ लें निरमोही ।  
—सुराही

६०

बान्हलों राखै रातो पगड़ी,  
गल्ला में टाई केँ जकड़ी;  
भरी रात तक सुतले रहतौं  
बन्द करी केँ आपनों द्वार;  
भोरे उठी केँ पहरा देखौं  
हेनों तें ऊ पहरेदार ।  
—मुर्गा

६१

सुतला केँ दै हाँक जगावै;  
असकल्लो में हाँसै-गावै,  
बात सुनै सब, बात कहै सब,  
सब्भे केँ एकरा सें मतलब ।  
—टेलिफोन

६२

लम्बा मुँ के एक छवारिक  
टीक पचासो हाथों के;  
मुँह पर रखों तें कान पकड़तों,  
झूठ नै एक्को बातों के।  
—टेलीफोन

६३

दू गोतिया के बत्तीस भाय,  
खइयो वक्ती करै लड़ाय;  
कत्तो लड़ै, कहीं नै जाय  
साथें खाय, बरोबर खाय ।  
—दाँत

६४

एक्के कोठरी, एक्के द्वार,  
सुतली छै इक रानी जैमें;  
दरवाजा के भीतर घेरी  
पहरोदार खड़ा छै वैमें ।  
—जीभ आरो दाँत

६५

शीशमहल में राजकुमारी  
जल सें ऊपर हाँसै छै,  
कारी बुढ़िया आवी रोजे  
राजकुमारी फाँसै छै ।  
—लालटेन

६६

एक अजूबा पहरेदार  
खाना खाय नै टपकै लार,  
दाँत बिना ही डोलै-झूमै,  
दाँत लेलें घरवैया घूमै ।  
—ताला-चाभी

६७

देह भले छै ओकरो खोल,  
बिन चमड़ा के जेन्हों ढोल;  
राजा-नौकर कुछ नै जानै,  
सोनो-लोहो कुछ नै मानै;  
ओकरा तें बस एक्के हूब,  
औंगरी पकड़ी झूलो खूब ।  
—अंगुठी

६८

चक्कै ही चक्का केँ खाय,  
जाय के बदला दिन-दिन आय ।  
—दिनाय

६९

एक्के मुँहे पचासो दाँत,  
नै कहीं हड्डी, नै कहीं आँत;  
यहू हुऐ नै, खाय या चाखै  
खाली चिड़ियाँ मुँह में राखै ।  
—पिंजरा

७०

एक पोखर में सौ-सौ कुइयाँ,  
मिसरी रं कुइयाँ रो पानी;  
ऊ कुइयाँ रो एक जोगवारिन,  
सब जोगवारिन के एक रानी;  
पोखर के नै ठौर-ठिकान,  
केकरौ-केकरौ एकरो ज्ञान ।  
—मधुमक्खी-छत्ता

७१

पानी जेकरो केलो-केलो,  
सौ-सौ मुँहो के एक्के धैलो ।  
—मधुमक्खी-छत्ता

७२

दू बिल्ला में गर्दन आवै,  
पाँजों भरी में पेट;  
गद्दी पर से कभी नै उतरै  
भरलो पेटें हेट ।  
—धैलों

७३

पोता बाबू-गोद नुकैलै  
सब नजरी से डरी-डरी,  
चाँदी के बाटी में पोता  
दूध पिचै छै भरी-भरी ।  
—नारियल

७४

पर्वत ऊपर घास जमैलों,  
पर्वत तर संगमरमर;  
संगमरमर के नीचे कुइयाँ  
जै नै बुझै, ऊ बानर ।  
—नारियल

७५

चारो दिस जंगल घनघोर  
जैमें बैठलों कारों चोर;  
चोर हेनो; नै लूटै-पाटै,  
बैठलों-बैठलों चुट्टी काटै ।  
—ढीलौं

७६

दोनो कान अमैठै जेन्हें,  
दुनियाँ साफ दिखावै तेन्हें ।  
—चश्मा

७७

कारों वन में कारों तिल,  
जे बीया नै जेकरों बिल;  
घूमै मौजों-मस्ती सें ।  
बची पुलिस के गश्ती सें  
जों पकड़ैलों चोरी में  
मारले जाय बरजोरी में ।  
—ढीलों

७८

गोड़-हाथ, देह-मुंडी नै छै  
भले नै बोलै, ऊ बूलै छै ।  
—जोंक

७९

बित्ता भर के सनसनाठी,  
कुकड़ै तें औंगरी भर काठी ।  
—जोंक

८०

दू गोड़ों के बीच्छैं गोड़;  
सौसैं देह में बीसो जोड़;  
दू हाथो छै, मुड़िये गैब;  
आपने चलै नै, यहाँ ठो ऐब ।  
—साइकिल

८१

सब गामों के, सब देशों के  
हाल सुनावै आवै चिड़ियाँ;  
डैना—लाल, हरा, पीला छै,  
कौन राग नै गावै चिड़ियाँ;  
दिन भर खुब्बे शोर मचाय,  
दिन आवै, साँझै मरी जाय ।  
—अखबार

८२

बिना डोलैलें जरो नै डोलै,  
दुनिया भर के बोली बोलै;  
कान मोचारों तें ठिठियैतों,  
कानतों, बोलतों, गाना गैतों ।

—रेडियो

८३

दूधे रं उजरो देह,  
कारों मन कौआ,  
गर्दन रं टाँग दिखै,  
पेटे अबढौआ ।

—बगुला

८४

चारे अक्षर गजब करै,  
पीछू तीन कटै तें मूँ छै;  
आगू दू कटथैं सुख-चैन;  
आगू एक कटै, तें सब छै,  
पीछू दू कटै, तें मूसों ।  
वैं की बुझतै, जे खाय भूसों ।

—मुसकल

८५

गल्ला में कंठी छै,  
कंठों में राम;  
साधू रं चोला छै  
तहियो बदनाम ।

—सुग्गा

८६

उजरोँ रहै तें सब्भे केरोँ  
उजरोँ दाँत उमैठै,  
लाल हुऐ तें लाल ठोर पर  
सबके जाय केँ बैठै ।

—आम

८७

उजरोँ रहै तें कचकच-खपखप,  
नै कस्सोँ, नै खट्टा ऊ;  
लाल हुऐ तें आम बनै छै,  
मोती खाय केँ पट्टा ऊ ।

—पपीता

८८

चमड़ी भीतर कसलोँ माँस,  
माँसोँ पीछू हड्डी;  
हड्डी बादे फेनू माँसे  
ओकरोँ बाद फिसड्डी ।

—आम

८९

हरमोनियम के अपनोँ भाय  
पर गावै में घोर लजाय;  
दाँत छियालिस, चौव्वौ दस,  
अक्षर सबटा घोघलोँ—बस ।

—टाईपराइटर

९०

खुद्दे अन्हरोँ, आँख कहावै,  
दूसरा केँ दुनियाँ दिखलावै;  
वैसेँ बड़ोँ नै कोय शैतान  
नाको पकड़ै, पकड़ै कान ।

—चश्मा

६१

दिन भर सूतै फोंफी मारी,  
जगै रात भर वन-बहियार;  
चोर देखी कें बिल में घूसै,  
हेनों तें ऊ पहरेदार।

—उल्लू

६२

बिन छिलके के मटरों दाना  
सालो साल छँटै नै छै;  
दूसरा कें वें काटी राखै  
आपने मतर कटै नै छै।

—दाँत

६३

देहों में काँटों छै,  
पेटों में आँख;  
माँस बड़ी मिट्टों छै  
छीलौं जों पाँख।

—लीची

६४

खुल्ला मूँ सें झाँकै नाक,  
सौसे गाँव में पारै हाँक;  
माथों पीछू बान्हलौं खोपों,  
चूल नै छै कि तेल कें चोपों।

—लाउडस्पीकर



६५

वन-वन दर-दर खाली भटकै;  
दूसरा के हिस्सा कें झटकै;  
घर टुकथैं सबकें धमकावै;  
ऊ नर के बाबा कहलावै!  
आबें ओकरो नाम बताव,  
नामे में छिपलों छै भाव ।

—बानर (बा-नर)

६६

दूए धौनों, दूए हाथो  
जन्मे सें पर टेंगड़ी चार;  
कमरो, पेटो, पीठियो ठो छै  
पर देखों नी मूड़िये पार ।

—कुर्सी

६७

एक कमर सें सटलों-सटलों  
दू मूड़ी, दू हाथ,  
बच्चां-खच्चां कुछ नै बूझै  
बन्दर बूझै बात ।

—उमरू

६८

मुड़िये ठो नीचें छै, गोड़े ठो ऊपर,  
चुटकी के तालों पर नाँचै छै सर-सर;  
नै तें ऊ नरिये ही, नै तें ऊ भूत;  
निगलै छै रूई कें उगलै छै सूत ।

—तकली

६६

स्त्रीलिंग होय धान केँ कूटे,  
पुलिंग होय धोती पर टूटे;  
अमरेन्दर के बूझ पिहानी  
नै तें धौल जमैतौ नानी ।  
—ढेका (ढेकी)


१००

सौंसे ठो देह, मुँह कारों कजरोटी,  
माथा में चूल, नै ढेका में चोटी ।  
—कौआ

१०१

गरमी देखी झरकी ओकरा,  
रातहौं-दिन्हौं खूब नहाय;  
ओकरौ पर पंखा डोलाबै,  
आदमी देखै, जाय विलाय;  
बोल, छिकै ऊ कौन परी?  
जों खाना छौ झोलबरी ।  
—मछली

# तुक्तक मुक्तक



प्रथम प्रकाशन

ई. २००८

प्रकाशक

अंगिका संसद, भागलपुर (बिहार)

नूनु सिनी रे,

तोहरा सिनी सोचबैं कि आखिर चार-चार ठो किताब—ढोल बजै छै ढम्मक ढम, बुतरू के तुतरू, बाजै बीन बजावै तीन, एक छड़ी पर अण्डा नाँचै, के बाद ई पाँचमों किताब लिखै के की मानें?

मानें छै। अभी तांय जे भी कविता सिनी लिखलियै, सबटा छों सालों सें पनरों सालों के बच्चा सिनी कें ध्यानों में राखी कें। तबें एकरा सें नीचें उमरी के बच्चा सिनी के की होतियै। वैं तें बड़का सिनी के कविता नहिये नी पढ़तियै। बड़का सिनी भले छोटका सिनी के पढ़ी-पढ़ी मजा उठाय लें।

होना कें तें पहिलको कविता सिनी में दू साल सें पाँच-छों साल के बच्चो सिनी लें शिशु गीत छै, तहियो की मनो में भेलै कि एकटा गीत-संग्रह शिशुओ सिनी लें होना चाही। होना कें शिशुओ सिनी कभी-कभी बड़का बच्चा के कान काटै छै। यही लें शिशुगीत फलतुआ गीत नाँखी लिखबों फालतू बात छेकै।

ठीक छै कि शिशु सिनी कें हेनो बालगीत नै चाही, जे हेनो शब्द सें भरलौ रहें, जेकरों अरथ शिशु समझै नै सकें, आरो नै तें बड़का-बड़का पंक्ति के गीत रहें; होन्है कें हेनो कविता नै रहें कि वैमें तुक-ताक ढेर के नै रहें। दूर-दूर तुक रहें, तें वही भी ठीक नै—सटले-सटले रहें, जे कान में बुझैतें रहें। सबसे बड़ों बात कि हेनो कोय बात नै रहें, जेकरा समझै में शिशु अकबकाय जाय। शिशुगीत तें हेने हुएँ कि हिन्नै वें पढ़ें आरो हिन्नै दिमागों में फोटू तैयार। तब्दै नी होलै शिशुगीत।

हो नूनु सिनी, यहें सब बात सोची कें तोरा सिनी लें एक किताब बनैलें छियौ 'तुक्तक मुक्तक'। मतुर शिशुगीत खाली तुक्तके मुक्तक नै होय छै, बच्चों आपनों दिमाग सें बहुत कुछ समझै छै, नै समझै छै, तें सहारा दै कें समझैलौ जाय छै। लेकिन यहू भी वहा सीमा में कि शिशु कें पढ़ैबों हेनो नै लागै। शिशुगीत छेवे करै शिशु के मनोरंजन लें।

तें, लें मैना, सुग्गा सिनी, तोरों हाथों में छौं—तुक्तक मुक्तक।

तोरे

फूल काका

## सिल-सिलोटी

सिल - सिलोटी,  
अट्टा गोटी ।  
कुट-कुट बोलै,  
सुक्खा रोटी ।  
चार मनो के  
एक्के कोठी ।  
आँख छेकौ कि  
ई कजरौटी ?  
नाना जी के  
मोटका चोटी ।

## ओला

गिरलै ओला,  
बम-बम भोला !  
चार टिकोला,  
बम-बम भोला !  
भर-भर झोला,  
बम-बम भोला !  
खुश छै टोला,  
बम-बम भोला !

## बतासा

तड़बड़ ताशा,  
चार बतासा,  
खैतें गेलै  
गस, गस, गस,  
मुँह में जैथें  
भस, भस, भस।

## झगडू-तगडू

जखनी झगडू-तगडू आवै,  
केकरौ कुछुवो कहाँ सुहावै;  
बात-बात में खट-खट-खट,  
एक्के बात केँ लै केँ रट।  
एकरो अलगे घुघुआ-घू,  
मौका पैथें थप्पड़-थू;  
टोला भर छै नाको दम,  
झगडू-तगडू बम-बम-बम।

## करनी के फॉल

आलू कहै टमाटर सें  
बैगन बोलै नै डर सें।  
कद्दू खेलकै एक करेली,  
थू-थू करै छै ओकरे लेली।  
मिरचां खाय केँ कानै सीम,  
आँखी के फुल्लों छै डीम।  
आबें समझै में आवै छै,  
जी पकड़ी केँ निसुआवै छै।

## पानी में आम

खूब झड़ैलियै सब आमों के  
लाल-पाकलौं टुभुक-टुभुक,  
धरती पर एक्को नै गिरलै  
पानिये में सब चुभुक-चुभुक ।

## कोसी मैया

कोसी मैया खल-खल-खल,  
सरंग फटै कि उमड़ै जल ।  
बस्ती जंगल खानलें जाय,  
गुस्सैलौं छै कोसी माय ।  
हेलवैया संग गुरुओ तंग  
ओ, ना, मा, सी, कोसी धंग ।

## धुइयाँ के कुइयाँ

जे पीयै छै फुक-फुक धुइयाँ,  
ओकरो नीचू बड़का कुइयाँ ।  
कुइयाँ में छै कहीं नै पानी,  
जमराजें गेलौं छै खानी ।  
मार भगाबें धुइयां के,  
भल्ली दें ई कुइयाँ के ।

## तखनी बुझिएं

लगे छड़क्का घोड़ा सरपट,  
खैवै धौल जों करवे खटपट!  
दाँत नै धोवे कीड़ा फरतौ,  
हिली-हिली केँ टुपटुप गिरतौ ।

## बड़की बात

कम्में बोलें, बक्कें नैं  
एतनै चल कि थक्कें नैं  
पेट पें जाँतों दरवे की ?  
बेलुन फुटतौ, करवे की ।

## पूस में कद्दू

बैशाखों के तिक्खों रौद,  
सुखलै पोखर, सुखलै हौद ।  
आसिन-कातिक-अगहन-पूस,  
गर्मी वास्तें ई सब फूस ।  
की बेचै लें लाय छै; जद्दू?  
पूस भरी के खैतौ कद्दू ।



## मोती दाँत

अच्छा-अच्छा जे छौ पोथी,  
पढ़लें जो मूँ-गरदन गोती ।  
पगड़ी, रस्सी, चादर, ओढ़ना;  
हेनों की? बस एक्के धोती?  
दाँत नीमी सें धोवै छैं की  
चमकै छौ जेहनों कि मोती ।

## बात बूझों

पढ़ों-पढ़ावों बच्चा कें,  
पाटों खाई-खच्चा कें;  
जेकरों पढ़ै नै बच्चा छै,  
ओकरा पर सौ गच्चा छै ।

## बज्जड़ छींक

‘क’ निकलै छै कंठा सें;  
सूतों जे रं अण्टा सें ।  
‘प’ निकलै छै ठोरों सें;  
लोर आँखी के कोरों सें ।  
नाना छीकैं हेने हय्यो  
भागी जाय छै पुसू बिलैयो ।

## झोंड़-झकासों

मेघ मेघन्नों कारों दिन,  
होय चल्लों छै बारों दिन;  
झोंड़ झकासों झांय, झांय, झांय  
डैनी के मरलों छै सांय ।

## नाना

फुर-फुर, फुर-फुर उड़ै छै के?  
हर बातों पर कुट्टै छै के?  
सुतलौ पर गाबै छै गाना,  
खरटा लै खुब्बे नाना ।  
नाना के खरटा केहनों;  
राती ठनका ठनकै जेहनों ।

## घड़ी

टिक-टिक, टिक-टिक सुइया बोलै;  
जे रं कि बिछतुइया बोलै;  
जे रं कि दिल धड़कै धड़-धड़;  
चिड़ियाँ के दू पखना फड़-फड़ ।  
डाल घड़ी पर धुरदा-धूल,  
नै तें लै जैतौ इस्कूल ।

## गट्टा

डुमरामा चल, चलें भदरिया,  
खूब डंगैलें लोटा-थरिया;  
खाय लें मिलतौ अजब मिठाय,  
नै ऊ लड्डू, नै ऊ लाय।  
हाथों में सटलौ, तें लट्ठा,  
मुँ में पड़थैं मिट्ठों गट्टा।

## खड़ाम

खट-खट, खट-खट, खटर-खटर,  
बोलथैं रहै छै पटर-पटर;  
मार करै में सबसैं आगू,  
गोड़े तर सैं रहै छै काबू।

## बगरो

बगरो, खाय छैं खुद्दी तोंय,  
कहाँ सैं पैबैं बुद्धि तोंय?  
फुदकी, कबदी, कुढ़लों जो,  
आकि उड़ले-उड़लों जो,  
बौंसी जाय गुड़झिलिया टान;  
जे मूरी-धुँघनी के खान।  
भले ही थक्की जैवै तोंय,  
कोठी बनी कें ऐवै तोंय।

## पेड़ा

पानी ठनकों बौंसी करों,  
देव रहै सब बान्ही जेरों;  
पेड़ा—करुआ मोड़ के पेड़ा,  
बांकी सब तें करै बखेड़ा ।

## घोड़ा रे

घोड़ा रे घोड़मारी चल,  
खेत में आरी-बारी चल;  
सड़के-सड़क किनारी चल,  
सबठां पारा-पारी चल !

## पैसा

पैसो फुदकै फुदुर-फुदुर,  
खरची में जाय खुदुर खुदुर ।  
टन-टन बोलै; बाबा रं,  
खपड़ी पर जों लाबा रं ।  
चार चौवन्नी—टाका एक,  
ढेर भीखनपुर, बाँका एक ।

## गुरुजी गेलौ

दीया, दीया, जरले जो!  
फूल-फौर तों फरले जो!  
गाय, घास तों चरले जो!  
दूध यहाँ सब धरले जो!  
चक्की, दाना दरले जो,  
कोठी-कोठा भरले जो!  
गुरु जी आवौ, डरले जो,  
गेलौ गुरु, ससरले जो!

## समझें बात

नाके नै तें गंधे की !  
बिना हाथ के धंधे की !  
रोजे-रोज नहैलों कर,  
मुँह महकै छौ, धोलों कर ।

## किंछा

खाय पियै लें कभी नै तरसों,  
धान, चना, जौ, गेहूँ, सरसों ।  
नानी संगे रहों, तें बरसों,  
धान, चना, जौ, गेहूँ, सरसों ।  
खेलें, गुरुजी ऐतौ परसों,  
धान, चना, जौ, गेहूँ, सरसों ।

## हल्ला-गुल्ला

पों-पों, खट-खट,  
हल्ला - गुल्ला;  
भला लोग के  
मुँ पर कुल्ला।  
दिन भर झन-झन,  
भारी आफत;  
इक दिन पुरतै  
दुर्दिन, दुर्गत।  
बहरो होतै,  
पागल होतै,  
आय नै होतै,  
तें कल होतै।

## सींग

जेकरो सींग खड़ा—‘खड़सिंगी’,  
जकरो सिंगे नै—ऊ ‘मुड़ली’।  
‘धोंघरी’, घुंघरैलों सींग वाली,  
दूध पिठाली मोटों छाली।  
मुट्ठी भर सींगवाली, ‘मुठिया’  
जे रं माथों पर दू चुटिया।  
‘चतरी’, जेकरो तिरछों सींग,  
धांगड़ नाँचे धिंग धिंग धींग।  
जेकरो लुरपुच सींग ऊ, ‘मौनी’  
सड़तौ दाँत जों खैबे खैनी।

## चिड़ियां

मैना - कौआ,  
कनमा - पौआ ।  
सुग्गा - बगरो,  
काँही, सगरो ।  
चील - कबूतर,  
कड़ियल, थरथर ।  
कोयल कारी,  
बड़ी दुलारी ।

## दुनियां

दुनियां भले लगे ई चुक्का;  
या नाना के कसलौ मुक्का;  
या नानी के गुड़गुड़ हुक्का;  
आँख मुँदे तें सब्भे फुक्का ।

## ऊ की छेकै

आम, साफड़ी, कटहल, बोर,  
ई सब छेकै केकरौ घोर?  
केकरा सें ऊ सबके डोर?  
केकरा देखी ओकरौ जौर?  
भागी जाय जे तोरे तौर?  
खलखल हाँसै फरलौ फोर ।

## बेंग आरो मछली

‘क’ सें काजल, कौआ, काँटी,  
‘म’ सें मूसों, मैना, माँटी ।  
जेना खाय छै बगरो, मैना,  
ठीक होन्है केँ तों सब, वैना ।  
खैलें जो सब बाँटी-बूटी,  
आता-खीरा काटी-कूटी ।  
बेंग उछललौं कुय्याँ में छै,  
असकल्ले नै गोय्याँ में छै ।  
मछली उछलै पोखरी में,  
जेना समाटे ओखरी में ।

## बिल्ली आरो मूसों

मूस, मुछुन्दर—घुर-घुर-घुर,  
कोण्टे-कोण्टा फुर-फुर-फुर ।  
बिल्ली मौसी हुलकै छै,  
मूसों देखी पुलकै छै ।  
मूसां देलकै लगे उड़ौन,  
झुट्ठे मौसी मारै रौन ।  
खाँसी सुखलौं, सर्दी-छीक,  
कोय तरह सें ई नै ठीक ।



## सेवा रों फॉल

नानी के गोड़थारी में,  
बीस अठन्नी थारी में।  
बैठी छाँह-छहारी में,  
कुत्ता भूकै बारी में।  
चार फूल छै डारी पर,  
जैतै वहू उधारी में।  
पड़ियैं कभी नै गारी में,  
ई रं मारामारी में।  
गोड़ दबावें नानी के,  
टाका मिलतौ चानी के।

## खोटा-चूँटी

चूँटी-खोटा, सोटा ले!  
थरिया, बाटी, लोटा ले!  
रोटी की ले, रोटा ले!  
चीनी, गुड़ों, परोठा ले!  
जाय कें खैयें बिल्ली में;  
मौज उड़ैयें दिल्ली में।

## मंतर

साँप विखों कें कहैं नै बीख,  
मंतर एक्के गिनती सीख।

## हवा

हवां उड़ैतै गर्दा सब,  
हवा बिना तें मुर्दा सब ।

## दाँत

दाँत हिलै, सब खिच्चा लागै,  
करका सीम के बिच्चा लागै ।  
रोगी दाँत के की नै होतों,  
भातो खाय में लागै भोतों ।  
खट्टे खैला पर नै कोथों,  
जल्दी ही बनतै ऊ थोथों ।

## नाना रों टीक

फूल चमेली, चम्पा, जूही,  
ग्वाला गेलै गाय के दूही ।  
अड़हुल, गेंदा आरो कनेल,  
मुड़लों माथों; पक्का बेल ।  
झिंगली लागै होने ठीक,  
नाना जी रों लम्बा टीक ।

## रुइया आरो मछली

कौर कदीमा, कद्दू—गोल,  
फाटी गेलै तकिया खोल;  
रूई नाँचै खोलों में  
मछली उछलै झोलों में ।


## उल्लू के पट्ठा

आम बड़ा छौ खट्टा ई,  
बासी दही के मट्ठा ई;  
तभियो खाय लें लट्ठा ई,  
उल्लू के छौ पट्ठा ई।  
दूध मिलै तें भागै सरपट,  
इमली खाय लें जीहा चटपट,  
बूझै ईख छै खुट्टा कें,  
हपकै कच्चा भुट्टा कें ।

## मौर-मसाला

नाना जी रों लम्बा दाढ़ी,  
धनियों, जीरों, लौंग, सुपाड़ी।  
ऊँट कें बूझै बैल बुझै अनाड़ी,  
धनियों जीरों लौंग, सुपाड़ी।  
मिरचां, मरिच जिहे दै फाड़ी,  
धनियों, जीरों, लौंग, सुपाड़ी।  
तेजपत्ता के भारी नाड़ी,  
धनियों, जीरों, लौंग, सुपाड़ी।  
सौंफ चिबाबें झाड़ी-झाड़ी,  
धनियों, जीरों, लौंग, सुपाड़ी।

# पाँच तिया पनरों



प्रथम प्रकाशन

ई. २००६

प्रकाशक

अंगिका संसद, भागलपुर (बिहार)

‘पाँच तिया पनरों’ में संकलित बालगीत ‘तुक्तक मुक्तक’ के बादकों रचना सिनी छेकै, यानी २००८ के बाद के रचना। ‘तुक्तक मुक्तक तें २००८ के दिसम्बर के ओरिये में छपी चुकलौ छेलै (भूल सें वहाँ प्रकाशन वर्ष ८ के बदला ६ पड़ी गेलौ छै), २००६ में रचलौ ई बालगीत सिनी के संग्रह के नाम पिताजी ‘पाँच तिया पनरों’ देलें छै। ई संग्रह के यै लेली भी ऐतिहासिक महत्व छै कि एकरों बाद पिताजी मुक्तक बाल कविता रचवों लगभग बंद करी देलें छै, हिनकों ध्यान प्रबंध दिस ज्यादा होय गेलै, आबें तें वहु नै। पिताजी सें जबें भी कहैलियै, कुछ हिन्दी में लिखी दौ, तें हिनी यहा कहलें छै, आबें बालगीत सें संन्यास।

## गुड़वा-गुड़िया

गुड़िया गेलै अपनों घोर,  
गुड़वा केँ लागलै छै जॉर ।  
ऐलै वैद्य जड़ी लै साथ,  
माथा पर फेरै छै हाथ,  
नाड़ी देखै दाबी केँ,  
रोग न कुछुओ पाबी केँ  
वैद्य बेचारा होलै दंग,  
बुद्धि नै दै हुनको संग ।  
जड़ी तुरते बूकी लेलकै,  
मंतर वै पर फूँकी देलकै  
जीहा पर जेन्है राखलकै  
गुड़बो सबटा थूकी देलकै ।

गुड़ियां सबटा बात सुनी केँ  
लेलकै माथों वहीँ धुनी केँ ।

## गाय दुधारी

की बकरी, जों गाय दुधारी!  
चींटी सें खोटा छै भारी ।

पोखरी सें नद्दी अच्छा छै,  
कुइयाँ सागर लुग बच्चा छै;  
गिद्ध रहै नै खोता में,  
स्वाद नै जरो सुखौता में;  
घास उगै नै गाछी तौर,  
गाछी में तें पीपरे-बौर!  
एकरौ सें उच्चों छै ताड़;  
के पैतै एकरों रं बाढ़ !

बँसबिट्टी में बैठी जो,  
घास मिलै तें लेटी जो!

## भारत माय

होना जों छौ देव, अमर,  
भारत माय कें वन्दे कर!  
भारत प्रेम-दया रों घर,  
भारत माय कें वन्दे कर!  
माय सें केकरा केन्हों डर,  
भारत माय कें वन्दे कर!  
मेल-मिलन के सागर भर,  
भारत माय कें वन्दे कर!

## गाछ-बिरिछ

पानी पियै नै अन्ने खाय,  
तहियौ कोठी बनले जाय;  
जौनें भेद बतैतै ई  
बुनिया धरलौ खैतै ई।  
जोंड़ करै की ? पत्ता की?  
की दिल्ली ? कलकत्ता की?  
गाछ छिकै की जादू घोर?  
सुड़की जाय सब तोरे तौर।

## निछलौं बात

उत्तर में उतराहा सब,  
दक्खिन में दखनाहा सब।  
सूरज उगतै पूरब दिस,  
कत्तो तोहें करवे इस।  
डूबतै तें बस पच्छिम दिस,  
कत्तो तोहें करवे इस।

## वैशाख

वैशाखों के अन्धड़-लू,  
हवो बहै छै हू-हू-हू,  
झुलसी गेलै सौंसे मूँ,  
बैशाखों के अन्धड़ लू।

केकरो बिन के छटपट छट?  
की जाय गल्ला में गट-गट?  
की पावी कें सभ्भे खुश?  
कौआ गगतै; हा-हा हुश?



## गदहा

ग सें गुल्ली, ग सें गदहा,  
बैशाखी नन्दन ई लदहा,  
बोझों कें बूझै वरदान,  
घासे पर दै पहिलें ध्यान ।  
डॉंग पड़े तें लगे उड़क्का,  
सीधे सरपट सौर सड़क्का;  
परेशान छै पाँचो पाँचू,  
हर वक्ती बस डेचूँ-डेचूँ ।  
बाबां ठिक्के कहिये गेलै,  
गदहा गदहा रहिये गेलै ।

## बंदर मामा

ई की तोरों हाल छौं होलों?  
बंदर मामा, सच-सच बोलों!  
केकरो हड़िया में मूँ देलौ?  
की छेलै वैमें, की खैलौ?  
करखी टा मुँह पर भरलौ छौं,  
हमरा तें लागौं—जरलौं छौं ।

जों करखी, तें साबुन लै ला;  
खूब नहाबों घैला-घैला;  
तबें उछलियो छप्पर-छोंत;  
नाशी देलौ सबटा लोंत ।  
की पीलें छौ दारू-भांग,  
दै रहलौ छौ बड़ी छलांग?

## भूल

गाछ-बिरिछ जे काटै छै,  
अपनों जिनगी चाटै छै ।

## रात

रात अन्हरिया टापेटुप,  
कहीं नै चीं चीं, कही नै हुप ।  
डड़कौआ रं सौंसे रात ।  
कारी बिल्ली पोसै रात,  
दिन सुतलों छै कोठी में,  
काकी के कजरोटी में ।

## मौसाजी

मत दौ कन्नी, मौसाजी;  
आठ चवन्नी मौसा जी ।  
धूपों सें जादा चमचम  
चमकै पन्नी, मौसाजी ।  
हौ जुग छू मन्तर भेलौ,  
कहाँ अधन्नी, मौसाजी !  
कोन बथानी में होय छै,  
गाय बकन्नी, मौसाजी ?  
आठ कमैलौ; मौसी कें दौ—  
चार चौवन्नी, मौसाजी!

## झिन्नुक आरो दादी

कहाँ हेरैलै नयका झिन्नुक!  
दैया के दिल धुक-धुक, धुक-धुक ।  
लू लगतौ ई कड़ा रौद में,  
बाहर नै जों रुक-रुक, रुक-रुक !  
चार औंगरी के चौड़ा पटरी,  
रेल वही पर छुक-छुक, छुक-छुक !  
कपड़ा-लत्ता सब नानी दै,  
पैसां दै में धुकचुक, धुकचुक ।  
ढिबरी, लालटन, दीये-अच्छा,  
बिजली तें बस भुक-भुक, भुक-भुक ।  
भोरे सें चिकरै छै दादी,  
कहां हेरैलै नयका झिन्नुक ?

## काम नै देतौ गोय्याँ

रात अन्हरिया टापे टोय्याँ,  
भुटकी जाय छै रोय्याँ-रोय्याँ ।  
दादी के मोतियाबिन होलै,  
सुझै नै ऐंगने, नै कुय्याँ ।  
दू पैसा के खातिर छोटकी,  
नाच करै छै छम्मक छय्याँ ।  
पढ़वे-लिखवे काम टा देतौ,  
साथ नै देतौ कोनो गोय्याँ ।  
'भोर-भिहाने' नै करलौं कर,  
नै तें खैवे चार चौधय्याँ ।

## बात बताव

तिनका केकरो दाढ़ी में ?  
छिपी रहै के झाड़ी में ?  
तारा में सतभैया के ?  
सब में मुडली गैया के ?  
नैया में बरियारी के ?  
खैतें रहै उधारी के ?  
कौन विटामिन आँखी लें ?  
के कवि नामी साखी लें ?  
बुद्धि छौ तें ई पहचान—  
पानी हटथैं छोड़ै जान ?

## डायनासोर

डायनासोर, डायनासोर!  
हाथी-सिंहों सें नै कटियो  
कम छौं तोरों ताकत जोर,  
डायनासोर, डायनासोर!  
कहाँ रुसी कें तोहें गेलौ ?  
की पहाड़ में जाय बिलैलौ ?  
कहिया फेनू ई धरती पर  
ऐवौ करलें भारी शोर ?  
डायनासोर डायनासोर!  
ऐवा तें जबड़ा नै खोलियो  
राकस नाँखी जरो नै डोलियो,  
देखी कें तोरों पंजा तें  
डर सें बहै छै हमरों लोर ।  
डायनासोर, डायनासोर!

घटोत्कच  
बाल अंगिका खण्ड-काव्य

‘घटोत्कच’ बाल खंडकाव्य छेकै, एक दिनों में लिखलौं गेलौं आरो वही सप्ताह में चाचा राजेन्द्र सिंह नें अपनों दैनिक ‘नई बात’ में प्रकाशितो करलें छेलै, खूब सजाय कें। अभियो ऊ अखबार रखलें छियै, यानी रविवारीय १३ दिसम्बर २०११ के ‘नई बात’। पुस्तक छपाय के योजनाहौ बनी गेलौं छेलै, मतुर पांडुलिपि धरले रही गेलै, कारण कि काव्य-लायक कोय चित्रसिनी नै बनें पारलौं छेलै। हम्मैं वही रूपों में ई काव्य कें रखी रहलौं छियै, जे रूपों में हमरा मिललौं छै। बस।

## प्रत्यक्ष

धरती के सब धूल उड़ैलें,  
बौर गाछ के तौर लगैलें;  
ताड़ गिरैनें, नदी उठैलें,  
पर्वत, पानी जकां बहैलें;

सौनों के बादल रं करिया,  
भादों केरों रात अन्हरिया,  
आगिन नाँखि आँख जरेनें,  
खोहे नाँखि मुँह के बैनें;

भूत भयानक भरखर राती;  
खड़ा रहा जों बड़का हाथी;  
ऐलें बिन्डोबों रं बहलें,  
जेकरा देखी जम्मो दहलें ।

विकट हिडिम्बा-पूत घटुत्कच,  
शांति-सभा में भारी कचकच,  
हाथ लगै कि कुछ नै बोलों  
गाछी में जों हिलै डमोलों;

सूइये नाँखि रोय्यां-रोय्यां;  
नाक लगै जों दू ठो कुय्यां;  
मूँछ लगै जों बड़का फरसा;  
घन्नों; जों भादो के बरखा!

देह पहाड़े रं छै भारी;  
मुँछ लगै छै वै पर आरी;  
कान; ताड़ के पंखा डोलै;  
सुरसै रं आपनों मुँह खोलै।

बोलै लें जों गल्लों फाड़ै—  
लागै हाथीये ठो चिग्घाड़ै।  
ओकरो चल्लें भुय्यां काँपै,  
कौरव कें धुरदा रं चाँपै।

चटनी रं पीसै छोटका कें,  
सागे रं मोचरै मोटका कें,  
बुढ़भा कें गेदे रं पटकै,  
जों आगू सें ऊ नै हटकै।

नकुल-भीम ई देखी गदगद,  
गिरै खुशी के मारे लदलद;  
कृष्ण-युधिष्ठिर मुस्कावै छै,  
पाण्डव-सेना ठिठियावै छै।

मिली-जुली मारै कठहस्सी,  
कौरव कें लागै हुरकुस्सी;  
हुन्नें राकस घटोत्कच ठो  
एक्के साथें मारै दस ठो।



## संघर्ष

कर्ण-फौज में मचलै हुर-हुर,  
भागै छै मूसें रं फुर-फुर;  
कोय रथ के पीछू नुकियावै,  
कोय भागी कें जान बचावै।

कोय बेंगे रं दै छलांग छै,  
कोस-कोस पर पड़ै टांग छै;  
धक्कम-धुक्की, ठेलम-ठेला—  
फौज करै भूतों के खेला।

फरसा, भाला छोड़ी-छाड़ी  
नुकलों छै रथ के पिछुआड़ी,  
पिछुआड़ी सें हुलकै सबठो  
पिछुवैलों सब, हट्टो-हट्टो।

कोय हाथी तर नुकियैलों छै;  
जों घटोत्कच—जम ऐलों छै;  
ई देखी कर्णों घबड़ैलै,  
घटोत्कच के नगीच ऐलै।

तानी लेलकै तीस तीर कें  
मारै लें ऊ असुर वीर कें;  
पूत-हिडिम्बा रों गोस्सावै  
रथे पर सें मोछ पिजावै।

कर्ण-तीर तें लागै, होना  
वें पकड़ी लै दोसरो कोना,  
हिलडुल करै नै वीर जरो टा,  
आखिर छिकै हिडिम्बा-बेटा।

कर्ण कहाँ ओकरा सें कम छै  
एक रसुनिया, दूसरो बम छै;  
तानी लेलकै तीर तीस कें  
मारी देलकै एन्हें बीस कें।

ई देखी कौरव-दल गदगद;  
मारे खुशी गिरै छै भदभद;  
पिछुवाड़ी सें निकली-निकली  
फुर-फुर उड़ै; जों, टुकनी-तितली।

कोय घटोत्कच बाँही मोचरै,  
कोय ओकरो देहे कें खोखरै;  
कोय तें जाय कें मूँछ उखाड़ै,  
कोय चमड़ा के कुर्ता फाड़ै।

कोय टाँगों सें लटकी झूलै,  
कोय ओकरो कंधे पर बूलै;  
राकस लें सब खोटा-पिपरी;  
बच्चा वास्तें; जों, तरऊपरी।

तभिये ऐलै वहाँ अलायुध,  
देखी उड़लै सब्भे के बुध;  
दोनो मनराचल रं भारी,  
बक्कै छै अनसेधरो गारी।

घटोत्कच पाण्डव के दिस सें,  
भरलौ जादू-टोला, विष सें;  
अन्धड़-आगिन, जेकरों साथी,  
मुड़िये लगै; जों, बड़का हाथी।

अलायुधो होने छै; कम नै,  
हाथ मिलाय लौ, केकरौ दम नै!  
ऐलौ छै कौरव के दिस सें,  
भरलौ छै टापेटुप खिस सें।

ऐथें कर्ण देलकै घुस्सा,  
घटोत्कच के बढ़लै गुस्सा;  
भिड़लै दोनों दू पहाड़ रं;  
झूमै दोनों खड़ा ताड़ रं।

गुरवि दोनों बाघे रं,  
आँख दिखाबै छै आगे रं;  
कोय फरसा, कोय गदा दिखावै,  
कोय लुढ़कै, तें कोय ठिठियावै।

एक-दूसरा पर गदा उछालै,  
रही-रही मुड़घुनियाँ चालै;  
दै छलांग हनुमाने नाँखी,  
दूर तलक दै आवै हांकी।

फेनू दौड़लौ पहिलौ आवै  
पीछुवे-पीछू लंग्घी लगावै;  
खाय के लंग्घी गिरै धड़ाम,  
माथों पर दै गदा भड़ाम।

एक उखाड़ी लेलकै बौर,  
दूसरां पीपर सहिते जौड़;  
दीएँ लागलै धाय-धाय-धाय,  
बजड़ै छै पथरे रं; ठाय ।

दोनों भीतरे-भीतर दंग,  
चलतै कैक दिनों के जंग;  
एक्केँ सोचै, दीं पटकनियां,  
दूसरें दै दै छै पेटकुनियां ।

तभिये चललै चाल घटोत्कच,  
तोड़ें लागलै हड्डी, कचकच;  
ई देखी कौरव-दल गुमसुम,  
हुन्नें चुतड़े पर छै धुमधुम ।

उछलै-कूदै पाण्डव सेना;  
हाथ में बुनिया, मुँह में छेना,  
कौरव-दल के मुँह छै कस्सों,  
ठोर-जीया छै लस्सों-लस्सों ।

## पतन

करणों के गोस्सा भड़कै छै,  
पाण्डव केरों जी धड़कै छै;  
घटोत्कच करणों के देखी  
भूली गेलै सबटा सेखी ।

सँरगों में जाय तुरत नुकैलै,  
नुका-छिपी के खेला खेलै;  
मेघों के पीछू सेँ हुलकै  
ताकि केकरौ नै कुछ झलकै ।

तीर वहीं सेँ बरसावै छै,  
मरखन्ना रं धमकावै छै;  
तीरे नै, अन्धड़-पानी तक;  
कौरव डरै; डरै नानी तक ।

दासिये नै, काँपे रानी तक,  
गैया, गुयठों सेँ सानी तक;  
कुछुओ नै करणों सेँ छुपलों  
लेलकै तीर बीस ठो धिपलों ।

धनुष चढ़ाय केँ फेंकी देलकै,  
घटोत्कच केँ घेरी लेलकै;  
ई देखी केँ घटोत्कचो नै  
अपने रं सौ रूप केँ रचनेँ—

सबकें नीचें भेजी देलकै  
जेकरै चाहै ओकरै हपकै;  
हौ सौ राकस नीचें आवी  
कौरव सबकें पावी-पावी—

मुड़ी मोचारै, तोड़ै हाड़;  
जना उखाड़ै जंगल-झाड़;  
करणों कें अचरज छै लागै,  
जन्नें-तन्नें कौरव भागै ।

खुँचनें-खाँचनें आपने लोग  
सबकें लगै जड़ैया रोग,  
कर्ण हदसलै जरियो नै  
कोय ओकरो रं बरियो नै ।

दस-दस तीर धनुष पर जोड़ी  
राकस सब पर देलकै छोड़ी,  
अन्धड़ में जों गाछ गिरै,  
बिन्डोबों में लोंत धिरै;

बोहों में कागज के नाव;  
करणों लें सौ राकस फाव ।  
गदा-मार सें राकस भुरता,  
तीर खाय कें उड़ै जों पत्ता ।

मरलै सवो छुछुन्दर नाँखी—  
भनभन करतें; जेना, माँखी;  
ई देखी गोस्सा सें झामों  
कोयल्लों बनी गेलों छै तामों ।

घटोत्कच नें पेट बढैलकै,  
पेटों पर जाय पेट चढैलकै;  
एक पेट होय गेलै दस ठो,  
रस्सी नाँखी लागै नस ठो ।

दसो पेट पर दस-दस मुण्डी;  
आँख लाल; मिरचाय के गुण्डी;  
बीस गोड़ पर बीस हाथ छै;  
सूपे नांखी लगै लात छै ।

आरी नाँखी दाँत निकललौं;  
पर्वत नाँखी आवै चललौं;  
देखी छुर-छुर करै छै हाथी;  
कौरव-दल के भों-भों साथी ।

घोड़ा-रथ पर चढ़ी नुकैलै,  
एक्के राकस सौ रथ ठेलै,  
ई देखी कें कर्ण गरजलै;  
घामों सें पाण्डव तक भिजलै ।

राकसों सब के छुर-छुर-छुर;  
मूसे नाँकी फुर-फुर-फुर;  
नभ में दुकलै घटोत्कच्यो;  
गुल्ली दुकै छै जेना, खच्यो ।

तुरत अलोपित हेनों होलै,  
छायो तक नै कन्हौं डोलै;  
सौसैं सरंग बुझावै करिया  
कापै; जों, कांसा रों थरिया ।

एक चनरमा बारों लागै,  
सूरज करिया कारों लागै;  
शापलकै सब भीतरे-भीतर,  
राकस लें गुड़झिलिया-धीवर ।

बुझी कर्ण नें एकरा खतरा,  
अस्त्र छोड़लकै अनमुन जतरा,  
जे खाली कभियो नै जाय,  
राकस वास्तें काली माय ।

वैजयन्ती के अस्त्र भयंकर,  
तेसरो आँख जों खोलै शंकर;  
लगथें गिरलै घटोत्कच ठो  
छाती चित्त, तें मुण्डी पट ठो ।

कद्दू नाँखी फटी गेलै ऊ;  
सौ टुकड़ा में बंटी गेलै ऊ ।



# पंचामृत

बुद्ध के जीवन से जुड़लें पाँच कथा पर आधारित पाँच बालकाव्य-नाटक के संग्रह छेकै 'पंचामृत'। ई काव्य रूपक २०१५ आरु १६ के बीच रचलें गेलै। 'बुद्धं शरणमं गच्छामि' के तें विकास गुल्टी चां २०१६ में आयोजित 'विक्रमशिला महोत्सव' में मंचितो करवलें छेलै, एकरों पहिलें अपनों स्कूलों में। यहू संग्रह पांडुलिपिये रूपों में पड़लें होलें छेलै, जैमें समर्पण पृष्ठ तें छै, मतर नाम आरु दू शब्द के नामों पर कुछुवो नै लिखलें गेलें छै। कहलौ पर पिताजीं टारी देलकै।

## चोकर के हलुआ

(भिक्षु आनन्द ईटा से बनलों तिनकोनियां चूल्हा पर धरलों मिट्टी वर्तन के अन्न के एकटा छड़ीनुमा लकड़ी से लारी रहलों छै। रुकी-रुकी के आग लहरावै ले मूड़ी नीचे करी चूल्हा के फूँकवो करै छै, तभिये वहाँ भिक्षु मौदगल्यायन के ऐवों।)

मौदगल्यायन :

ई की खतकावै छै तोहें ?  
कोय अन्नो के लागै भूसों,  
लोढ़ी-पाटी पर पिसलों जे  
बुकनी रं काँटों-के टूसों।

आनन्द :

(मौदगल्यायन दिस जरा-सा देखी वहा रं कामों में लागी जाय छै।)

नै काँटों, नै भूसों छेकै,  
नै घोड़ा के चारा-चोकर,  
कहाँ अन्न कोय खेतें दै छै?  
खाली-खाली भरलों पोखर।  
ई वर्षा में बिन वर्षा के  
बिजनारा के हालो खस्ता,  
आन नगर में जान्हें अच्छा  
लै अपनों सब बोरिया-बस्ता।  
पर गुरुदेव कहाँ मानै छै,  
वहाँ नीम गाछों के नीचे,  
भुखले रही देशना दै छै।  
कोय कत्तें दिन है रं खीचें?  
यहू बात छै, भुखलों भिक्षु  
कत्तें बात मनो से लै छै,  
भुक्खा के नै भजन सुहावै  
बोलतें रहौ नी—“हौ छै” “है छै!”

मौदगल्यायन :

हेनों करों कि कुछुवे दिन लें  
उत्तर कुरु में वास करों सब,  
भला यही में सब्भे के छै  
कल्लें भुखल्लों यहाँ मरों सब!

आनन्द :

यहा गुरु सें कहलें छेलियै,  
पर हुनकों तें अलगे मत छै,  
“अग्निदत्त के आमंत्रण पर  
यहाँ ठहरल्लों छी, ई सत छै।  
आरो अभी हुनी छै बाहर  
बनिज वास्तें जों गेल्लों छै,  
सूना में की नगर छोड़वों  
अच्छा होतै? की भेल्लों छै?”  
के समझैतै गुरु कें बोल्लों—  
पेट अड़ी जाय, तें सब लरपच,  
राजभवन की, आश्रम तक में  
साफ दिखावें लागै कचकच।

मौदगल्यायन :

से तें सही छै; जना यहू कि  
कै दिन चोकर बनिया देतै,  
वहू बिना दामे ही लेलें;  
ई संभव केन्हों कें की छै?  
एक उपाय बचै छै आबें,  
बरखा रों दिन; माँटी नम छै,  
हरा-हरा दुगड़ी छै बिछल्लों  
भूख मिटावै लें की कम छै?  
धोय-धाय कें वही उबाल्लों,  
भिक्खु रों कल्याण यही में;

आनन्द :

ठीक बोललौ, हम्मू कहियौं  
सबसे बढ़िया राह सही में।  
की बोलौं कि यहू बात के  
गुरु के आगू रखलें छेलियै,  
नांकी देलकै यहू राय के,  
आबें कहनौ छोड़ी देलियै।

मुदगल्यायन :

गुरुओ जीं कुछ कहलै होथौं,  
कोय कारण तें पीछू होतै?

(वर्तन रों अन्न आनंद फेनू लारें लागै छै आरो मुदगल्यायन दिस बिना देखले बोलै छै।)

आनन्द :

कीट मरै के शंकाहै नै,  
खेत किसानों के, जे जोतै?

मोदगल्यायन :

साफ-साफ बोलौं; कविता नै,  
की बोली के टारी देलकौं?  
आखिर कोन तर्क रों आगू  
तोरो हिम्मत हारी देलकौं?

आनन्द :

सुनों, कहलकै हमरा गुरु जे—  
“राय ठीक छौं, राय ठीक नै,  
घास पकैवों, जरो उचित नै,  
मिलें भले ही कहूँ भीख नै।

घासों के जड़ से जीवों में  
सटलों रहे छै भोजन लेली  
की हिंसा नै होतै जैसे?"

मुदगल्यायन :

आबें खुललौं रहस-पहेली ।

(आनन्द रों सम्मुख चुकूमुकु बैठते हुए।)

तोंय आनन्द नै समझों ई कि  
हुनी कहलकै पहिले बेरिया,  
हमरो कहला पर कहलें छै  
झूठ कहीं नै, तोरे किरिया ।  
तपरत वहाँ केना छै गुरुवर  
कै दिन से बिन खेलें-पीलें?  
हमरा है अच्छा नै लागै  
कुछुवो तोहें भले कही लें ।  
एक बात उठलों छै मन में,  
उठलों छै, तें कहिये आवौं;  
हुएँ सकें छै, मानी ही ला;  
संतापों से मुक्ति पावौं ।

(आनन्द चूल्हा पर रखलों, पात्र के अन्न के लारतें रहे छै आरो  
मुदगल्यायन झटकी केँ एक दिस चली दे छै।)

(दृश्य बदलै छै)

(बुद्ध अपनों शिष्य सिनी के बीच शांत मुद्रा में बैठलों होलों छै ।  
मुदगल्यायन रों प्रवेश।)

बुद्ध :

की मुदगल्य, कहों, की कहना?  
की पूछै लें व्याकुल हेनों,

जे कहना छौं, कहौं खुली कें,  
नया किसिम के चिन्ता केन्हौं?

मौदगल्यायन :

चिन्ता की आरौ कुछ होतै  
चिन्ता छै, तें यही बात के,  
रातको चिन्ता-दिन की खैवों?  
दिन में चिन्ता वही रात के।  
सब सोची कें देखलौं हम्मों,  
एक यही छै रस्ता बचलौं;  
गाछ-विरिछ जे रं ठकमौरै,  
ई सब ई मिट्टी के रचलौं।  
कैन्हें नी खोदी लौं मिलि कें  
गाछ-बिरिछ के तरला मिट्टी!  
निश्चय ही गुणकारी होतै;  
रसविहीन नै आकि सिट्ठी।  
कैन्हें नी ई मिट्टी कें ही  
पानी में घोरी-घारी कें  
चलौं पकावौं, कब तांय रहवै  
पेटों सें बान्ही डोरी कें!

बुद्ध :

है की बोलै छों तोंय भिक्खु,  
उटपटांग रं, ठहरों-ठहरों!  
ई विचार बुढ़िया आँधी रं  
है रं एकरा पर नै लहरों!  
जानों, गाछी तर मिट्टी में  
ढेरे जीव करै छै वासों,  
रौदी नै झुलसावै जैसें  
घेरे भी नै ठंड-कुहासों।

जों मिट्टी कें कोड़ी लेवौ,  
 जीव केन्हों की रहतै जित्तों?  
 भिक्खु कें शोभा नै दै छै,  
 ई की वचन निकालों तित्तों!  
 के बोलै छैं—मिट्टी-रस कें  
 है रं घोरी कें पीला सें,  
 बोल बढै छै? बढ़ियो जाय तें  
 की जीवों हेनों जीला सें?  
 सोचों जरा मनों सें तोहें—  
 खोदी लै छौ जों मिट्टी कें,  
 सबटा रोंस चुलाय कें ओकरों  
 छोड़ी दै छौ बस सिट्ठी कें;  
 तें गाछो कें कहाँ सें मिलतै  
 रोंस-रसायन जीयै लेली?  
 ठाढ़ों रहतै सही-सलामत?  
 की उम्मीदो एक अधेली?  
 जीवों-गाछी कें मारी कें  
 बोलों जित्तों की रहना छै,  
 मनन करों तोरा सब आबें  
 हमरा कुछुवो नै कहना छै।

(एक दिसों सें आनन्द रों प्रवेश। बुद्ध के आगु पकैलों अन्न के पात्र बढैतें हुए बोलै छै।)

आनन्द :

आय यही चोकर के हलुवा,  
 एकरा सें कुछ ज्यादा नै छै;  
 पावस-काल में आपन्है दिक्कत  
 के केकरा अन्नों कें दै छै?



बुद्ध :

चिन्ता की करवों एकरा में  
सब एकरै में पावी लेवों,  
जे संघों के धरम-करम छै  
प्राणो दै कें नियम निभावों !

(बुद्ध आनन्द के हाथों से अन्न के पात्र लैकें भिक्खु सिनी के पात्र में काठ के कलछुल सें हलुवा बारी-बारी सें रखै छै, आरो आखिर में बाकी पात्र एक दिस राखी के साधना रों मुद्रा में बैठी जाय छै। अन्य भिक्खु सिनी रों वैठां सें अभिवादन के मुद्रा में हटवों।)

(पर्दा-पतन।)

## अतिथि-सेवा

(चार लड़का, उमिर छौं-सात सालों के बीच, माँटी आरो बालू सें घैरकों बनाय में बेहाल छै। घैरकों बनला पर हाथ-गोड़ झाड़ै छै कि तखनिये एक के नजर भिक्खु सिनी पर पड़ै छै आरो सबके नजर वही दिस चल्लों जाय छै।)

बुतरु १ :

घोल्ठू, देखें के आवै छै,  
साधु हेनों दिखलावै छै।

बुतरु २ :

कहाँ कमंडल, चिमटा, लाठी?  
बस लेलें माँटी रों बाटी,  
हमरों मन में ई जावै छौ,  
ई सब भिक्खु ही लागै छौ।

बुतरु ३ :

हों, भिक्खु के टोली छेकै,  
हिनकों बाटी झोली छेकै;  
बाटी में कुछ अन्न जुटैतै,  
मिली-जुली के सब्भें खैतै।  
सबसे आगू बुद्ध बुझावै,  
हिन्नै ही सब चल्लों आवै,  
चल नगीच सब पूछिये लेवै  
अपनो मन रों कही सुनैवै।

बुतरु २ :

कहना-सुनना कुछुवो नै छै,  
सुनलें छियै, सनेशो दै छै;

चल किस्सा हुनका सें सुनवों,  
की घैरको पर माथों धुनवों!

बुतरू १ :

पूरो तें होय्ये गेलों छै  
बालू-माँटी रों बनलों ई,  
चारो दिस सें चारदिवारी  
की रं लाठी रं तनलों ई!  
भंडारो-घर भरलों-भरलों  
कोन बात के कमी बुझावौ?

बुतरू ३ : (एक बुतरू के हाथ पकड़तें।)

अरे मंगलिया, हुन्नें देखें  
हिन्नै भिक्खु चल्लों आवौ।  
शायत भिक्षै पावै लेली  
हिन्नें दिस छै आवी रहलों,  
सब्भैं कुछ-न-कुछ खाय लें दै  
हुएँ सकै छै, होतै भुकलों।  
हमरों सबकें देना चाही,  
की घोल्टू तोरों विचार की?

बुतरू २ :

ई तें ठिक्के बात छै, यैमें  
कटियो टा कुछुवो कचार की?

बुतरू ४ :

मतुर भंडारों में तें, सुगगी  
बालू रों ही चौर-दाल छौ,  
की भिक्खु सब गोस्सैतौ नै?  
माथों पर ही लगौ काल छौ!

बालक १ :

की बोलै छैं, बालू छेकै?  
आबें अन्न कहैं कोठी के;  
ई माँटी नै; चिकसों छेकै,  
चिन्ता करें तें बस रोटी के।  
माँटी-बालू-कादों—चिकसों,  
उपहारों में दै देना छै,  
खेलै तक ही यैसैं मतलब  
फेनू यैसैं की लेना छै!  
देर करें नै, रख पत्ता पर  
भंडारों सें अन्न निकाली,  
भरिये देवै सब भिक्खु के  
खाली बाटी, छिपली, थाली।

(सब बुतरू थपड़ी बजाय कें हाँसै छै। फेनू झब-ढब बगले में पड़लौ पत्ता सिनी पर घैरको के भंडारों सें बालू-माँटी निकाली कें राखी लै छै आरो भिक्खु दिस मुड़वे करै छै कि बुद्ध भिक्खु सिनी साथें वैठां पहुँची जाय छै।)

बुद्ध :

पत्ता में है की लेलें छों?  
की करना छै? केकरा लेली?  
तोरा में सें के समझैतै,  
केन्हों ई ठो नया पहेली?

बुतरू १ :

ई चिकसों-सत्तू सनलों कुछ  
भेंट नगरवासी के छेकै,  
यहा हिदायत छै कि एकरा  
कोय्यो भी भिक्खु नै फेकै।

(बुद्ध मुस्कैतें हुएँ बालू-माँटीवाला पत्ता लैकें आनंद कें दै छै।)

बुद्ध :

रखों संभारी कें, घुरवै तें  
आश्रम जे भभरी रहलौं छै,  
लीपी कें चिकनैवै यैसैं  
फेकना नै छै, जे कहिलौं छै।

बुतरू ३ :

भेंटों में होलौं जे, देलियौं,  
आबैं बदला में की करवौ?  
बिना सुनैलें कोय कहानी  
बढ़ियौं नै तोंय; यही ठहरवौ।  
है टीला पर बैठी कें तोंय  
एक कथा तें कहलें ही जा,  
भले रहैं राजा-रानी के  
या राकस के बाग-बगीचा।

(बुद्ध टीला पर बैठी जाय छै आरो आमना-सामना में पाँचो बच्चो। बुद्ध एक-दूसरा कें देखतें होलें कहानी कहना शुरू करै छै। भिक्खु सिनी ठाड़े रहै छै।)

बुद्ध :

किस्सा राजकुमारों के ई  
विश्वांतर जिनकों कि नाम,  
के होतै हुनकों रं दानी !  
सुख-सम्पत सैं भरलौं धाम।  
हुनकों पत्नी होने छेली,  
दान-दया सैं भरलौं मॉन,  
माद्री नामों सैं सब जानै  
मीट्रों बोली जेकरों धॉन।  
राजकुंवर कें बेटो एकटा  
एकटा बेटी साथे-साथ,

जे रं बेटा जतिन, वही रं  
बेटी कृष्णाजिन रों बात।  
आबें तोहें सब ही बोलों  
क्रम सें ऊ चारो के नाम,  
तभिये आगू बड़भौं हम्में—  
कना विधाता होलै वाम?

सब बुतरू :

विश्वांतर माद्री के पति जों,  
जतिन रहै कृष्णाजिन-भाय;  
आगू की होलै सब बोलों,  
एकेक करी हमरा समझाय।

बुद्ध :

ठीक-ठीक सुनलों छौ किस्सा  
तोहें सबभैं मौन लगाय,  
तोरो लगन लखी कें हम्मैं  
खुश छी कल्लें-कल्लें आय।  
हेने बुद्धिवाला बुतरू  
करै समाजों के उपकार,  
हेने बुतरू कें राखै छै  
याद हमेशे ई संसार।  
तैं होलै की राजकुंवर के  
बेटा-बेटी केरो हाल?  
वही राज में जखनी पड़लै  
अनचोके ही घोर अकाल।  
राजकुंवर दानी पहिले सें  
होने पत्नी रों सोभाव,  
ऊ अकाल में दीयें लागलै  
दान दिलों सें, जल्लें जाव।

हाथी तक हथसारों करों  
 दै लेलकै दुखिया कें दान,  
 ई देखी कें मंत्री करों  
 चटकें लागलै तनलों ध्यान ।  
 राजा कें जाय कही सुनैलकै  
 विश्वंभर-माद्री के दान,  
 यहू कहलकै, यैमें नै छै  
 राजकोष के तें कल्याण ।  
 ई अकाल सें बढ़िये कें कुछ  
 होतै बुरा कोष के हाल,  
 विश्वंभर के जेन्हों सुर छै  
 ओन्हे माद्री करों ताल ।

(एक बुतरू दिस संकेत करतें)

ई तें कहों, उचित की छेलै  
 विश्वंभर के ई रं काम?  
 की हेनों कामों सें कभियो  
 केकरो भाग्य हुऐ छै वाम?

बुतरू २ :

दया-दान तें खुब्बे बढ़ियां  
 पर सीमानै में रहिये कें

बुतरू ३ : (खड़ा होय कें ।)

ठीक । नदी जों तोड़ें तट कें  
 गाँव तें रहतै ही बहिये कें ।

(बुद्ध बड़्डी प्रसन्न दिखै छै, खड़ा लड़का कें बैठै के संकेत करै छै; बुतरू बैठी जाय छै ।)

बुद्ध :

एकदम सही बतैलौ दोनो,  
अच्छा तें—बीचे के राह,  
जे नै ई बातों के बूझै  
ओकरा लें बस लोरे-आह।  
राजकुंवर सीमा से बाहर  
तें राजाहौ होलै वाम,  
राजां खुली कहलकै, “ई तें  
विश्वंभर रों अनुचित काम।  
भेजों राजकुंवर के अभिये  
पर्वत पर परिवार समेत,  
सुख-अभाव की करै विपद में  
एकरा ऐतै तभिये चेत।”  
विजयसुरा पर्वत कोय छेलै  
दूर कहीं में दूसरो देश,  
जंगल से घिरलौ जे छेलै,  
रहौवला के होने भेष।  
राकस रं नद्दी गरजै तें  
अंधड़-पानी; चोर-डकैत,  
वहाँ उगै नै भोर-साँझ ठो  
वहाँ नै आवै फागुन-चैत।  
मेघ कभी भी दिखलावै नै  
पर ठनका ठनकै दिन-रात,  
विश्वंभर लें आवी गेलै  
दुखों केरों नया कभात।  
पर रस्ता में जे भी मिललै  
साधु, रिखि, मुनि, दुखिया, दीन  
भूषण-वस्त्र लुटैले गेलै  
आखिर होलै रथो विहीन।  
ऊ पर्वत पर कोय योगी के  
दिखलै एकठो टाट-कुटीर,



जिनगी वही में काटें लगलै  
 बान्ही केँ सब्भे टा धीर।  
 माद्री साथेँ दोनो बुतरू  
 मइये-बाबू रं हलकान,  
 टंगलों रहै हमेशे वै पर  
 दादी-दादाहौ के ध्यान।  
 कखनू नानी केँ देखै ले  
 टुनके, बोलै—जैवों घोर,  
 माय बुलाय दे, दादी हमरों;  
 यहाँ लगै छै हमरा डोर।  
 भला कहैतियै की बच्चा सेँ  
 रहै माय, तेँ बापो मौन,  
 सब तेँ भीतर सेँ कलपित्तों  
 दुख होलों जाय बीसो बौन।

बुतरू ३ : (खड़ा होय केँ।)  
 भागी केँ चल्लों ऐतियै सब  
 राज-पाट अपनों ठों घोर,  
 अपनों घर तेँ अपने होय छै  
 भला वहाँ केकरोँ की डोर?

बुतरू ५ : (बैठले-बैठले।)  
 ऐतियै कना, राजदंड जे पैलेँ!

बुद्ध :  
 ठीक बोललौ, ठीक विचार,  
 लेकिन धरमों के रुकलों छै  
 कोय युगों में की उद्धार?  
 की कहियौँ दुख-चक्र केना केँ  
 पीसै छै ई मानुख-लोक,

सुख कन्हौ भी छुपें भागलों  
पिछुवावै छै ओकरा शोक ।  
एक दिनों के बात छिकै ई  
राजकुंवर माद्री रों संग,  
वन में कहूं फलों कें तोड़ै  
हिन्नें होलै रंग में भंग ।

बुतरू १ :

आंय, कहों की हेनों होलै?  
वहाँ डसलकै की कोय साँप?  
की होनों खाको जंगल के  
हुनका रहै नै कोनो माँप?

बुद्ध :

नै हेनों कुछ बात नै होलै  
जे होलै ऊ आरो घोर,  
माय-बाप हुन्नें, तें हिन्नें  
बच्चा कें लै गेलै चोर ।

बुतरू ४ :

की बच्चो कें चोर चुरावै?  
बच्चा लै की करतै काम?  
जों बेचै लें चाहवो करतै  
की मिलतै कुछवो भी दाम?

बुद्ध :

प्रश्न करी कें अच्छा करला,  
ई धंधा के ढेरे चोर,  
गाँव-नगर रों प्रेत छिकै ई  
नर-भेषों में आदमखोर ।

बेची दै छै बच्चा कें ई  
व्यापारी कन लै कें दाम,  
फेनू व्यापारी बच्चा सें  
खूब करावै मोटों काम।  
समय-समय पर करवावै छै  
बच्चा सें चोरी के काम,  
फेनू ओकरा बेची दै छै  
लै कें आरो बेसी दाम।

बुतरू २ :

की हेनों चोरों कें राजां  
दंड नै दै छै, पकड़ै नै?  
बच्चे कना रही जाय चुप छै  
बोल लगाय कें चिकरै नै?

बुद्ध :

राज्हे के नै ध्यान रहै छै,  
लोगो के एकरा पर ध्यान,  
धरी दबोचै मिली-जुली कें  
जरियो हुऐ जों एकरों भान।  
नै होतियै हेनों, तें केना  
कहों धरैतियै ऊ ठो चोर,  
जे बच्चा के रखलें छेलै  
हटिया करों पीछू ओर।

बुतरू ५ :

की ऊ जत्तिन रहै आरो की  
कृष्णाजिन ही? खोलों बात,  
के पहचानी लेलकै दोनो,  
चोर धरैलै राजा हाथ?

बुद्ध :

हों कृष्णाजिन, जतिने छेलै  
जग्घों:—विश्वांतर के राज,  
के बच्चा कें नै पहचानै?  
समझों, सौंसे राज-समाज।  
एक सिपाहीं देखी लेलकै  
मंत्री कें देलकै संवाद,  
जाय पहुँचलै राजा के लुग  
मंत्री तुरत हेकरोँ बाद।  
मंत्री सें सब बात सुनी कें  
राजा ऐलै दौड़लौँ हाट,  
राजकुंवर बिन लागै छेलै  
राजो के मन बड़ी उचाट।  
कृष्णाजिन संग जतिन पावीकें  
राजा-रानी घोर निहाल,  
रथ पर चललै विजयतुरा दिस  
हिचकोला, तें कहीं उछाल।  
आबें पूछवौँ तोरा सब सें  
विजयतुरा ई केकरोँ नाम?  
की जंगल, की नद्दी आकि  
कोय देवों के छेकै धाम?

बुतरू १ :

नै जंगल, नै नद्दी आकि  
विजयतुरा देवों के धाम,  
ई तें कोय राजों में स्थित  
पर्वत केरोँ छेकै नाम।

बुद्ध :

एकदम ठीक, सही कहलौँ छौ  
राजा वहीं पहुँचलै जाय,

विश्वंभर-माद्री कें लैकें  
 घुरलै, सबटा बात बताय ।  
 यहू कहलकै; पकड़ैतै सब  
 ठग, बच्चा रों असली चोर,  
 आरक्षी खोजी ही लेतै  
 बस होतें-होतें नी भोर ।  
 राजभवन सब लौटी ऐलै  
 बजलै ढोल, मंजीरा, झाल,  
 माद्री-राजकुंवर खुश छेलै  
 पावी कें अपनों दू लाल ।  
 एकरों बाद तें राजाहौ नें  
 बेटा कें देलकै आदेश—  
 जे कुछ देलौ प्रजै कें देलौ  
 प्रजा-हितों में होतै शेष ।  
 फेनू की छेलै दीनों लें  
 राजकुंवर रों खुल्लै हाथ,  
 माद्री आरो दोनो बुतरू  
 दान-पुण्य में साथे-साथ ।  
 सौंसे राज खुशी में डुबलै  
 सुख कें लूटै खूब अघाय,  
 जेनाकि तोरा दानों सें  
 हमरौ सब खुश भेलौं आय ।  
 देतें रहियो जिनगी भर ही  
 कुछ-नें-कुछ सबकें उपहार,  
 नै धन, तें फूले टा भेंटियो  
 एकरौ सें बढ़ियां छै, प्यार ।

मित्र हुए कि मय्ये-बाबू  
 सबलें कुछ-नें-कुछ उपहार,  
 दान, भेंट, उपकार यही तें  
 तोरों-हमरों जीवन-सार ।

जे देलौ उपहार आय तौंय  
हरखित करता, ला आभार,  
यहा किसिम सें तोरासब के  
बीतें सुन्दर रं संसार।  
घैरको के भंडारों सें जें  
देलौ बालू करों अन्न,  
की कहियौं ई उपहारों सें  
कत्तें-कत्तें होलौं धन्न।  
ई चिकनौं माँटी कें  
सानी, गाँधी-गूथी आय,  
लीपी देवै आश्रम पर जों

## आत्मसमर्पण

(श्रावस्ती नगर में महात्मा बुद्ध रों प्रवेश । नगर के सब्भे घोर के द्वार बंद छै आरो चारो दिस सन्नाटे-सन्नाटा ।)

बुद्ध :

श्रावस्ती कें की होलों छै  
की द्वारे, खिड़कियो बंद छै,  
हाय, वहीं ठां, जहाँ हमेशे  
जखनी देखों घनानंद छै ।  
कोलाहल की, कलरव तांय भी  
घर-ऐंगन में बंद दिखै छै,  
हेनों के? आवी कें यैठां  
सन्नाटा के छंद लिखै छै?  
नै चैता, चैतावर, चैती  
नै फागुन छै चौपालों में,  
रंगों के बदला में कारिख  
के पोतलकों छै गालों में?

(एक घरों सें एक गृहस्थ द्वार खोली कें हुलकै छै, बुद्ध कें पहचानी नगीच बावी बोलें लागै छै ।)

गृहस्थ :

मान्य तथागत चलों यहाँ सें  
इखनी घर में रहनै अच्छा,  
देखै नै छों, कहीं दिखावै  
एक्को टा बूढ़ों या बच्चा?

बुद्ध :

मतुर बतावों तें ई पहिलें  
दिन कैन्हें ई रात लगै छै,

जैसे पथलो तांय सहमी जाय;  
कुछ संकट रों बात लगे छै।

गृहस्थ :

की कहियौं, हे पूज्य तथागत,  
अँगुलीमाल वधिक दिखलौं छै;  
श्रावस्ती के कोय जग्घों में,  
समझौं कि नाशे लिखलौं छै।  
जेकरा देखै, मारी दै छै,  
अँगुरी ओकरो काटी लै छै;  
अँगुर कें माला रं गूँथी  
लहू खड़े-खड़ चाटी लै छै।

बुद्ध :

तैं, प्रसेनजित की करलें छै,  
अँगुलीमाल कें पकड़ै लेली?

गृहस्थ :

सेना कें भेजी देलें छै  
जंजीरों में जकड़ै लेली।

बुद्ध : (आश्चर्य सें)

एक वधिक लें सेना-सैनिक!  
से कल्लें बरियो-बलशाली?

गृहस्थ :

नै पूछौं ओकरो ताकत के  
कहियौं; नया जनम रों 'बाली'।  
कभी जालिनी वन सें बाहर  
हेना तैं शायते ऊ निकलै,



निकलै तें बूझों मशान छै  
 जैठां-जैठां जहिया दिखलै।  
 ओकरो आगू बीस-बीस ठो  
 सैनिक गाजर-मूली समझों,  
 हाथी के लम्बा सूँढ़ों में  
 फँसलों होलों धूली समझों।  
 कै दाफी ई होय चुकलों छै  
 दाले रं मनुखों कें दरवों,  
 गरमी सें तपलों हाथी ठो  
 की छोड़ै छै पोखर घिकवों?  
 यही वास्तें कहियों हम्में  
 आय भरी हमरा कन ठहरो,  
 गुजरेँ दौ अंधड़-वतास कें;  
 इखनी समय बड़ी छै बहरो।

बुद्ध :

बहरो छै तें की लेना छै  
 अँगुलीमाल हुएँ की काले,  
 हमरो वास्तें हमरो चिन्ता  
 साथ रहै छै बनलों ढाले।

गृहस्थ : (चौकन्ना होतें हुएँ।)

सुनों तथागत ध्यान लगैनें  
 आहट कोय पिछुवैलें आवै,  
 केन्हों धपधप चाल, जेनाकि  
 हो-हो हाँक लगैनें आवै।  
 ई तें अँगुलीमाले होतै  
 कोइयो शक नै, चलों तथागत,  
 आय भरी हमरे कन रहियो,  
 हमरा कन तोरो छै स्वागत!

बुद्ध : (निर्भीक स्वर में।)

गृहपति, ई पदचाप जरूरे  
अँगुलीमाल के होतै निश्चय,  
लौटी जा, हमरा छोड़ी केँ  
भिकखु लें काहूँ नै कोय भय।

(गृहस्थ मलकी केँ द्वारी दिस बढी जाय छै, तभिये एक जोरदार आवाज गूँजे छै।)

अँगुलीमाल :

भिकखु, रुकोंऽऽ अरे नै सुनलौ,  
मौतें तोरा की घेरलें छौं?  
यही बुझैवै छै कि कालें  
माथा पर अँगुरी धरनें छौं।

(बुद्ध ई आवाज पर ध्यान देले बिना अपनों रास्ता पर चलतें रहै छै कि तभिये अँगुलीमाल झपटी केँ आगू खड़ा होय जाय छै। पीठी पर तलवार आरो गल्ला में अँगुली के माला लटकलौं होलौं छै।)

अँगुलीमाल :

भिकखु रुकों, कहैलियौं हम्में  
बैहरो रं ही नै सुनलौ की?  
केकरो ई आवाज ठो होतै?  
ई बातों पर नै गुनलौ की?

बुद्ध : (शांत स्वर में।)

अँगुलीमाल की रुकवों हम्में  
हम्में तें इस्थिर कहिये सें,  
जन्म-मरण के भेद जानलां  
समझौं कि रुकलौं तहिये सें।

अँगलीमाल : (दर्शक दिस आवी कें बोलै छै।)

अचरज छै ई भिक्खु केन्हों  
नामो नै हमरों जानै छै,  
कटियो टा नै डोर मनो में  
जेकरा देखी यम कानै छै!  
ई हेन्हों-तेन्हों भिक्खु नै  
भिक्खु में ई श्रेष्ठ बुझावै,  
आँख चुरावै के बदला में  
केन्हों छै ई आँख लड़ावै!  
हमरौ में बदलाव केन्हों ई  
की होलै, कमजोर दिखै छी,  
लेख लिखौं तें लहुवे सें बस  
स्याही सें की लेख लिखै छी?  
जों भयभीत नै ई भिक्खु छै  
की फेनु ई बुद्ध तथागत?  
कैन्हें हमरों मन व्याकुल छै  
बोलै लें, स्वागत छै, स्वागत!

(बुद्ध के नगीच आवी कें।)

अच्छा एक बात ई, भिक्खु,  
की छिपलौं छै हमरों करतव?  
तोहें इस्थिर, हम्में नै छी,  
बतलैवों की एकरों मतलब?

बुद्ध :

अँगुलीमाल, कहलियौं हम्में  
डर-भय तें कहिये के छोड़लां,  
प्राणिमात्र के रक्षा लेली  
अपनों लीवनगति कें मोड़लां।

सब्भे जित्तों रहै लें चाहै  
 के मिरतु कें वरै मनो सें ?  
 कत्तो देह दिये दुख, सब्भें  
 ओकरै चाहै प्राणपनों सें ।  
 केकरौ कष्ट नै हमरा सें छै  
 लेकिन की तोरो सें ओन्हों ?  
 तोहें तें सुखों-मार्थों पर  
 दुखों के लहुवैलों चेन्हों ।  
 तोरा सें नर थरथर काँपै  
 तोहें धरती पर जम्मे नी,  
 जम्मो सें छों बड़लों निर्दय  
 तोरा सें तें ऊ कम्मे नी ।  
 हम्में तें आवें इस्थिर छी  
 तोरो होने चाल-चलन छौं,  
 मारै-काटै में अभियो भी  
 की रं तोरो मॉन मगन छौं !

अँगुलीमाल :

भिक्खु, तोहें जे कुछ कहलौ  
 झूठ कहाँ कुछ, सब सच्चे छै,  
 लेकिन तोहें की समझै छौ,  
 अँगुलीमाल मुरुखे-बच्चे छै ?  
 जे मनुक्ख निर्दय, धोखै दै,  
 छल-प्रपंच सें भरलों-पुरलों,  
 ओकरा लें की चिंता करवों  
 जित्तों छै आकि छै मरलों !  
 मनुखों पर की दया दिखैवों;  
 चुनी-चुनी कें मारी देवै,  
 नया जनम के बाते की छै  
 हेनों घाट उतारी देवै ।

बुद्ध :

बूझै छी तोरों गुस्सा के  
बहुत सतैलों छों लोगों सें,  
मतर भेंट नै भिक्खु सें छों  
मिली गेलों छों संयोगों सें ।  
भिक्खु ही की, आरो जन छै  
जे उदार छै, करुणामय छै,  
हुनकों धरम, दया ठो होने  
यैमें कोय्यो की संशय छै ।  
पर भिक्खु-जीवन कुछ अलगे  
करुणाहे पर रुकी गेलों छै,  
मनुख वही, जे हुएँ अहिंसक  
स्नेह-प्रेम पर झुकी गेलों छै ।

अँगुलीमाल : (दर्शक दिस आवी कें ।)

अरे, भिक्खु केना जानै छै  
हमरों पहिलों नाम अहिंसक,  
यही नाम सें माय पुकारै  
बाबू, इस्कूली में शिक्षक ।  
लागै छै ई भिक्खु जरूरे  
भिक्खु-भेष में मंतरिया छै;  
समझै नै हमरों मन कुछुवो  
असमंजस में ई बेरिया छै ।  
कहीं भिक्खु ई गौतम ही की?  
भाव-वचन सें यही बुझावै,  
अच्छा तें होतै, पूछिये लौं  
कैन्हें एत्तें नेह लुटावै !

(बुद्ध के नगीच आवी कें ।)

कहीं भिक्खु गौतम तें तोंय नै?  
है रं प्रेम वचन केकरा में!

बुद्ध : (स्वीकार में मूड़ी हिलैतें हुए)  
वही भिक्खु, अमिताभ वही तें  
प्रेम-दया जागै जेकरा में।  
अँगुलीमाल, रुकों, जे पथ पर  
दौडै छों, ऊ उचित कहाँ छै!

अँगुलीमाल :

बेरथ आबें ई सब कहवों  
यैसैं अलगो राह कहाँ छै?  
नै-नै आबें रुकना मुश्किल  
देरी बहुते होय चुकलों छै,  
रुकियो जय्यै, तें मानै लें  
ई बातों कें, के रुकलों छै?  
हमरों कर्म तें हमरे साथे  
आखिर तांय चलतै ही रहतै,  
जों सद्धर्म धरी चलियै तें  
भिक्खु भला हमरा के कहतै!  
कहतै; अँगुलीमाल ही कहतै  
कोय अहिंसक भी कहतै की?  
सम्मूख कुछ बोलें-नै-बोलें  
सूना में चुप ऊ रहतै की?

बुद्ध : (अँगुलीमाल के हाथ पकड़तें।)  
मन सें दुख के भार निकालों,  
भाँसों, भूसी, बालू चालों;  
जेन्हें सद्गुण भाव उठै छै,  
दुर्गुण केरों साथ छुटै छै।  
सद्धरमों लें समय की निश्चित?  
जखनी चाहों, तखनी शोभित।  
घृणा, द्वेष जे छों, ऊ त्यागों!  
आय समय छै, अय्ये जागों!

अभ्यासों सें संभव की नै?  
आकाशों में चद्दर बीनै।  
सदाचरण निर्वाण दिलैथौं,  
जे कुछ नै पैलों छों, ऐथौं;  
जे निछलों-बिछलों छै, पावों,  
संघ-धर्म खुल्ला छै, आवों!

(अँगुलीमाल अपनों पीठी सें बंधलों तलवार उतारी कें एक दिश राखी  
दै छै आरो बुद्ध के सम्मुख नतमस्तक होय जाय छै। एकरों साथे  
अँगुलीमाल रों वचन गूजै छै।)

बुद्धं शरणम् गच्छामि  
सघं शरणम् गच्छामि  
धम्मं शरणम् गच्छामि।

(पर्दा-पतन।)

## विशाखा

(कुटिया के बाहर बुद्ध पालथी मारलें आनंद सें बात करी रहलें छै, तखनिये भिजली-तितली विशाखा रों आगमन, जे बुद्ध के नगीच आवी कें ठेहुना बलें बैठी रहै छै।)

बुद्ध :

हाय, विशाखा ई धराण में  
कैन्हें छें? की कारण छेकै?  
खुल्ला चूल, उतरलें चेहरा!  
पानी में के पत्थल फेकै?  
बदहवास रं भिजलें-तितलें  
ऐली छें हमरा लुग कैन्हें?  
जे कुछ होतै बात, बाद में  
अपनों दुख बोली दा पहिनें!  
की सासैं कुछ बात कहलकौं  
या ससुरें कटु वचन उठैलकौं?  
माय के पक्ष लियै में ननदें  
उटपटांग रं बोली देलकौं?  
किए हफसलें धतपत-धतपत  
असकल्ली हेना तोंय ऐला?  
की रं झोर-झकासों, झकसी,  
वै पर ई संझकी ठो वेला!  
कारण कुछ-नें-कुछ विशेष छै  
किएँ विशाखा रों ई भेष छै?

विशाखा :

हे गुरुदेव, कहै छी सच-सच  
नै तें ननद सें बाताबाती,  
आरो नै तें सास-ससुर ही  
तिक्खों बोललें छै कल राती।



ई सब हेनों दुख तें तिरिया  
जना हुवै छै, सहिये लै छै,  
लोरो के बोहों में उबडुब,  
कानी-काटी बहिये लै छै।  
हमरो दुख तें दुख पर भारी  
ऐलों छी, तें सब कुछ हारी।

बुद्ध :

की होलों छीं, कही सुनावों,  
होनै केँ, जैमें सुख पावों!

विशाखा : (कपसतें।)

हे गुरुदेव, कना केँ कहियौं  
हमरो छोटका ठो परपोता  
अय्ये भोरे गेलै उजाड़ी  
हमरो अँचरा केरो खोता।  
आवै में जे देरी भेलै,  
दुर्दिन केरो फेरी भेलै।

बुद्ध :

दुख सें एत्तें दुखित हुवों नै,  
एकरो आगू कहों; कहों की,  
धीरज रखों कहों खोली केँ  
परपोता बीमार रहों की?

विशाखा : (लोर पोछतें।)

हे गुरुदेव, रोगिये छेलै  
मालत माय देहों पर लहरै,  
जे मनौन भी नै मानै छै  
भला केना केँ बुतरू ठहरै!

बुद्ध :

कहों विशाखा, परपोता ठो  
कै सालों के होथौं तहियो?  
एकरा सें कम नहियें होथौं  
तीन बरस नहियो-तें-नहियो।

विशाखा : (लोर पोछतें।)

हों, हों, जे नुकसान होलें छे  
तीन बरस के ही ऊ छेलै,  
जानौं कहाँ पारलौं हम्में  
कखनी-केना कहाँ नुकैलै!

बुद्ध :

अच्छा, कहों विशाखा आबें  
तोरा बेटा-पोता कैठो?  
परपोतो के गिनती करियो  
नुकसानों के बादो जैठो।

विशाखा : (फेनु लोर पोछतें होलें।)

श्रीमन सोलह बच्चा हमरों  
वैमें नों ठो बिहैलौं होलौं,  
नवो बिहैलौं सें नो पोता,  
दू कम, तें परपोता सोल्हों।  
वैमें एक परपोता खोलां  
की कहियो, कत्तें की करलौं!  
कोंन पाप करलां, भोगे लें  
आबें जे जीवन ई धरलौं।

बुद्ध :

माय सें दादी, परदादी छें  
तहियो हाही कें तोंय बीछों,

कत्तें परपोता-छरपोता  
के किंछा सें मन कें सींचौं?  
जे किंछा छौं तोरों मन में?  
नै देखलौं ई आग भुवन में!

विशाखा :

श्रीमन, क्षमा! यही आगिन तें  
खूब जियै लें बोल बढ़ावै,  
जत्तें सोचियै छरपोता के  
ई सब ओत्तै कौल बढ़ावै।

बुद्ध :

रुकों विशाखा, की चाहै छौं  
अनपट्टों पोता-परपोतो!  
मन में ई किंछा ठो होथौं—  
देखी लौं ढेरे छरपोतो?

विशाखा :

श्रीमन, ओत्तें तें नै जानौं,  
अपनों मन कें पर पहचानौं;  
मन में एक्के चाह पलै छै  
गुग्गुल-धुमनों जकां जलै छै,  
पूछौं; बुतरु चाही कत्तें?  
श्रावस्ती में लोग छै जत्तें;  
भरलौं हमरों महल-अटारी  
गूजें, तें गूजें किलकारी।  
हे गुरुदेव, यही किंछा बस  
दरमस्सी मन रहै छी कसमस।

बुद्ध :

की बोलै छौं, रुकों विशाखा!  
ई तें नै भिक्खु के भाखा;  
की जानै छौं श्रावस्ती में  
रोजे कत्तें लोग मरै छै?  
कहाँ-कहाँ कत्तें टोला ठो  
फगदोलों लुग हकन करै छै?  
कहाँ विशाखा जों जानै छौं,  
संघ-नियम के जों मानै छौं!

विशाखा :

श्रीमन, कम-से-कम तें पाँचो  
निश्चित छै फगदोल उठै छै,  
ऊ दिन भागे ही बस समझों  
जे दिन एक्के साँस टूटै छै।

बुद्ध :

रुकों, रुकों! आगू नै बोलों,  
तोरों दुख के भेद यही में,  
ई तोरों किंछा छौं हेनों  
भरतों की, जों छेद यही में?  
जों चाहै छौं ओत्तें बुतरू  
जत्तें श्रावस्ती में जन छै,  
की परिणाम निकलथौं एकरों  
ई बूझों, मुशिकल वर्णन छै!  
अखनी तोरों जे धराण छौं  
लोर संभारै नै पारै छौं,  
एक्के खोर उड़ै पर है रं;  
आँधी में छप्पर छारै छौं!  
अभिये तोरों ई धराण छौं  
जिनगी ई रोते ही रहथौं,

इखनी लोर तें आँखे भर छौं  
 चानन के बाहों रं बहथौं ।  
 इखनी तें बरसा सें भिंजलों  
 तोरों देहों पर साड़ी छौं,  
 संतति-हाही नरक-पीर रं  
 बुझों, डेढ़िये पर ठाड़ी छौं ।  
 मज्झिम राह चलौं, तें सुख छै  
 हाही में सब दुख छिपलों छै,  
 खाली गोड़ बुलों नै हेनों  
 जेठ रेत पर जों धिपलों छै ।

विशाखा : (हाथ जोड़तें ।)

क्षमा, क्षमा, दा क्षमा! क्षमामय,  
 याद रहें धरमों के आशय!  
 मोहे में ही डुबलों छेलां,  
 “मोहे दुख छै” भुल्लों छेलां!  
 ई देहो तें दुख के कारण,  
 वै पर हाही; नरके ही तें,  
 ठीक क्रिया, उद्देश्य, वचन में  
 बाकी हमरों जीवन बीतें !  
 जे शरीर दुख के ही कारण,  
 ऊ शरीर लें केन्हों मोहे?  
 ई तें पकलों रं फसलों पर  
 बरखा ही रों बहलों बोहों ।  
 याद दिलैलौ, ज्ञान करैलौ,  
 तिमिर-घटा घनघोर नशैलौ;  
 पोता, परपोता, छरपोता—  
 केरों सपना, उड़लों तोता!  
 आबें मॉन नै कलपित्तों छै,  
 मरलों मॉन लगै जित्तों छै!

(माथा कें धरती सें टिकैतें आरो धरतिये पर दोनो हाथ जोड़तें प्रणाम  
के मुद्रा में विशाखा झुकी जाय छै ।)  
(पर्दा-पतन ।)

## बुद्धं शरणम् गच्छामि

(नेपथ्य में वेद-पाठ उभरी कें शांत होय जाय छै। पाँच शिष्य के साथ बैठलौं सोणदंड कुछ चिन्तित मुद्रा में दिखाय पड़े छै।)

सोणदंड :

जगह-जगह पर आय बुद्ध के  
करतें रहै छै हुनके चर्चा,  
की बूढ़ों, की जॉर-जनानी  
छॉर-छवारिक सें लै बच्चा।  
बात करै छै बस बुद्धे के,  
से कत्तें बड़का ऊ ज्ञानी!  
जाय कें जाँचे लें ही पड़तै,  
थाही कें रहवै ही पानी।  
होन्हौ कें जेकरों ई चर्चा  
हौ नै होतै हेन्हों-तेन्हों,  
अंग देश के रोआँ-रोआँ  
रोमांचित छै पावी एन्हों।  
मिलवै आय जरूरे जाय कें  
रहवै आय समुन्दर थाय कें।

शिष्य १ :

बुद्ध नै ऐतै, तोही जैवौ  
यैमें तोरों मान नै होथै,  
सोचों, तोरों ई निश्चय सें  
चंपा रों अपमान नै होथै?  
तोरों रं के पंडित-ज्ञानी?  
उतरी जाय केकरों नै पानी!

सोणदंड :

तोहें सब छों ज्ञानी चटिया  
जे कहलौ, सब्हे टा सच्चे,  
मतुर बुद्ध तांय जैवों हमरों  
सब्भे ढंग सें होतै अच्छे।  
की कहियौं तोराहै आबें  
मन सें हारलौं हेनों लागौं  
फेनू मौको ई की मिलतै,  
नींद लगै सें पैहिले जागौं।  
चलौं तहूं सब हमरों संग में,  
बुद्ध विराजै चंपा-अंग में।

(सब्भे शिष्य साथें सोनदंड एक दिस प्रस्थान करै छै।)

### दृश्य-दू

(बुद्ध आपनों शिष्य सिनी साथें आश्रम के बाहर बैठलौं छै। सोणदंड कें सामना में पावी बुद्ध खाड़ों होय जाय छै, तें सोणदंडो अभिवादन करै छै। जल्दिये सोणदंड दर्शक दिस आवी कें स्वगत वचन करै छै।)

सोणदंड :

हाय, कहाँ सें कौन विषय पर  
बात करौं, नै समझें पारौं,  
हौलदिल कैन्हें होलौं जाय छी  
विषम समय छै, केना टारौं!  
सचमुच बुद्ध अगर जों ज्ञानी,  
मन के चिन्ता लेतै जानी।

(सोणदंड लौटी कें बुद्ध के नगीच आवी जाय छै।)

बुद्ध :

तोरों मन के भाव बुझी कें  
हम्मी तोरा सें पूछै छी—



श्रेष्ठ विप्र केकरा तोंय कहभौ  
बात बतैय्यो बीछी-बीछी!

(बुद्ध के प्रश्न सुनथैं सोनदंड प्रसन्नचित्त दिखें लागै छै आरो समझावै के मुद्रा में दायँ हाथ ऊपर-नीचें करते बोलें लागै छै।)

सोणदंड :

भिक्षु गौतम, उत्तर जानों  
श्रेष्ठ विप्र के गुण पहचानों—  
जे व्यक्तिये सैं नै सुन्दर,  
कर्मकांड में घोर निपुण छै;  
मंत्रोच्चार करै में ओन्हे,  
शुद्ध लहू के जैमें गुण छै।  
पँचमों खूबी कर्म, अनूठा ज्ञान,  
धरती पर ऊ श्रेष्ठ विप्र, भगवान!

(सोणदंड के पाँचो शिष्य हाथ उठाय-उठाय कें बोलें लागै छै, “आचार्य जी रों कथन एकदम सत्य छै, एकदम सत्य छै।” बुद्ध हाथ के संकेत सैं सबकें शांत हुऐ के इशारा करै छै।)

बुद्ध :

सोणदंड, तोहें जे कहलौ  
पाँच गुणों कें चुनी-चुनी कें,  
की यैमें कुछ गिरै लायक छै?  
छोड़लौ जावें आँख मुनी कें?

सोणदंड : (एक क्षण चुप रहला के बाद।)  
भिक्षु गौतम, ठिक्के पुछलौ,  
ओरी के जे गुण छै तीनो,

ऊ सब छोड़लो जावें पारें  
ओकरा कहें सकै छों, हीनो।  
कर्मकाण्ड की, दपदप रूपो,  
सात पुस्त सें लहू पवित्तर,  
ई सब छोड़लो जावें पारें  
तोरो प्रश्नों के ई उत्तर।

(सोणदंड के सब शिष्य ई बात के विरोध करतें बोली उठै छै, “आचार्यजी के बात अनुचित छै, आचार्यजी के बात अनुचित छै।)

बुद्ध : (इशारा से उत्तेजित शिष्य कें शांत करतें हुएँ।)  
रुकों-रुकों, व्यवहार संभालों!  
जों लागै छों, बात गलत ई,  
तें सच की? समझावों हमरा  
तोरा में कोय; हिन्ने आवी!

(सोणदंड के सब शिष्य एक दूसरा के मुँह देखतें खाड़े रहै छै।)

सोणदंड :

शिष्य, सुनों धीरज कें धरनें-  
पित्तयैतों भाय अंगद हमरो  
सात पुस्त सें शुद्ध लहू सें;  
देखलै सें मन गदगद हमरो।  
कर्मकाण्ड के होने ज्ञानी  
जेहनों वेद उचारै में छै,  
मतुर कहों, की करतै ई सब  
जों हौ शील-विचारे नै छै?  
हत्यारा छै, घोर शराबी  
घरदुक्की में छै बढिये कें,

की होतै रूपों-वंशों सैं,  
जों अंगद ऊपर चढ़िये कैं?

(सोणदंड के कथन सुनी भगवान बुद्ध अपनों हाथ आशीर्वाद के मुद्रा में उठैतैं कहै छै।)

बुद्ध :

सोणदंड, तोय सत्य बतैलौ,  
कर्म-ज्ञान ही सत्य जगत में;  
कुछ नै रखलौ कर्मकाण्ड में  
सात पुश्त सैं शुद्ध रक्त में।  
सोणदंड, की बोलैं पारों—  
ज्ञान-कर्म में के उच्चों छै?  
जों तेजै लैं पड़ैं, तैं ऊ की?  
दोनो ठो में कोय बुच्चों छै?

सोणदंड :

भिक्षु गौतम, ज्ञान-कर्म में  
ऊँच-नीच के भेद कहाँ छै,  
दुसरा के बिन एक अधूरा  
जहाँ कि दोनो; मोद वहाँ छै।

बुद्ध : (बेहद प्रसन्न मुद्रा में।)

साधुवाद, हे सोमदंड, छौं,  
तोहें कहलौ सत्य वचन कैं,  
की तोहें ई बोलैं पारों—  
कना बचैलौ जाय ई धन कैं?

सोणदंड : (झुकी कें प्रणाम करते हुए)।  
हे गुरुदेव, की कहियों हम्में  
ऊ तें तोहीं मार्ग बतैभौ,  
हम्में तें सिद्धांते जानौं  
यैमें हमरा कोरा पैभौ।

(सोणदंड के हाथ जुटले रहै छै।)

बुद्ध :

सोणदंड, बस शीले टा सें  
ठीक ज्ञान कें पावें पारों,  
ठीक साधना, ध्यान ठीक तें  
ठीक ज्ञान कें लावें पारों।  
वचन ठीक, उद्देश्य ठीक छै,  
ठीक जीविका, ठीक धरम छै;  
दूर-दूर छै मोह अगर जों  
निब्बाणो के निकट रतन छै।

सोणदंड : (पहिलके मुद्रा में रहीकें बोलै छै।)


गुरुवर, हम्में धन्य-धन्य छी—  
बुद्ध शरण में जाय छी हम्में,  
धम्म शरण में जाय छी हम्में,  
संघ शरण में जाय छी हम्में!

(नेपथ्य में एक्के साथ सब्भे शिष्यों के एक्के साथ स्वर उठै छै।)

बुद्धं शरणं गच्छामि!  
धम्मं शरणं गच्छामि!  
संघं शरणं गच्छामि!

(पर्दा-पतन।)

# करिया झुम्मर खेलै छी



प्रथम प्रकाशन

१९८२

प्रकाशक

शेखर प्रकाशन, पटना (बिहार)

### भूमिका

श्री अमरेन्द्र जी अंगिका के बड़ा ही लोकप्रिय कवि छोट। हिनी आपनों कविता सुकंठ सें गावी कें जबें सुनाय छै, तें जनता झूमी उठै छै। हर कविता में प्रवाह, माधुर्य आरो समाज के स्पष्ट चित्र अंकित छै। कविता सहज, सरल आरो बोधगम्य छै। हिनकों कविता सुनी कें लोग प्रफुल्लित होय जाय छै। हर कविता के शीर्षक अंगिकांचल में प्रचलित लोरी आरो फैकड़ा के अंश छेकै। कवि कें ई कविता-संग्रह के लेली बहुत-बहुत

## ताड़ काटूँ, तरकुन काटूँ

ताड़ काटूँ, तरकुन काटूँ,  
काटूँ रे वनखाजा,  
हाथी पर जों घुंधरू  
ठुमुक चले राजा।

ठाठों में चिरैया चहकै,  
मन में सौ-सौ फोड़ा टहकै;  
घोल्टू के जे बाबू गेलै,  
आबें तें दू बरखा भेलै;  
जब, सें शहरों में गेलों छै,  
चिट्ठी एक्को नै देलों छै;  
हेनों की निठुराई अच्छा  
नौकरी सें बढ़ियां भिच्छा;  
सूनो-सूनो घोर लगै छै,  
मन में सौ फोड़ा टहकै छै;  
घर-धंधा में की मन लगतै,  
रात कटै छै हमरों जगथैं;  
खाली असगुन रही-रही आवै,  
केना नै ई मन घबरावै,  
अय्ये लिखवै चिट्ठी, कबतक  
सुनवै सबके ताना!

प्राणनाथ बस ई जानै छी,  
प्रेमे पावै लें तरसै छी;  
चिंता नै तोहें कुछ करिहों,  
ठिक्के छी, तोहें नै डरिहों;

घोल्टू नें इन्तहान जे देलकौं,  
 दूसरी अबकी पास करलकौं;  
 हाल-चाल सबके अच्छा छै,  
 देवर झगड़े छौं; बच्चा छै;  
 दादा परसू ही ऐलौं छौं,  
 तोहें आवौं, ई कहलौं छौं;  
 समझाना छै की केकरा के,  
 झगड़ा चलथौं बस लै दै के;  
 खेतों के झगड़ा में अबकी,  
 तोहें नै अय्यौं कैन्हें कि  
 मंगवैलौं छौं लाठी-भाला,  
 फरसा आरो गड़ासा ।

गाँमों केरी सितिया खातिर,  
 देवर रहै छौं बाहिर-बाहिर;  
 गाँव-टोला में कानाफूसी,  
 कहवै केकरा सें बोलौं की;  
 ललचनमाँ-कैलु के संग में,  
 हिहियो रंगलौं छौं वही रंग में;  
 डाँटों तें गलथोथरी करथौं,  
 बचलौं इज्जत आबें जैथौं;  
 हीरोइन के माने की छै ?  
 सबके ऊ येहें बोलै छै;  
 मुश्किल छै लड़की के चलना,  
 सीटी मारे छौं फुलचनमा;  
 भितरी मन के बात कहै छी,  
 डरलौं-डरलौं हमू रहै छी;  
 हाथ कभी पकड़ी के छूथौं,  
 हमरौं कान के पासा ।



गामों के की हाल सुनैय्यौं,  
 केकरो-केकरो चाल सुनैय्यौं—  
 सिरचन दा, कैलू दा अबकी,  
 दोनों ईलकसन के वक्ती  
 लड़लौं खून-खराबा भेलौं;  
 गाँव में पाटीसन भै गेलौं;  
 बिकवर्ड-फुरवर्ड, की बोलै छै,  
 समझै में कुछ नै आवै छै;  
 सबके सबसे डोर छै लगलौं  
 सबके देखभौ रातौं जगलौं;  
 गाँमों में की जी लागै छै,  
 मन व्याकुल जेना दागै छै;  
 लिक्खौ की कहिया आबै छौं  
 आरो हमरा लै जावै छौं;  
 अबकी तें हरगिज नै भुलयौं  
 लुंगा - चोली - साया!

### रौदा उग रे ऐंगना

रौदा उग रे ऐंगना, मुर्गी देवौ चखना  
 ठंडा में ठिठूरी रहलौं छै—बेटा, भतीजा, भैगना!

ई माघों के पल्ला में, भीत-दुआरी खुल्ला में  
 केना रहतै बुतरू, ओढ़ना लें कानै छै बीरना!

सब्भे अपनों घुसलौं घोर, ओकरौ में सब बोरसी तौर,  
 रूख्यो तौर भी जाड़ा लागै, की फेरू ई ओढ़ना!

कपड़ा नै एक हालों के, कम्बल ई छौं सालों के  
 छाती ढकों तें खुल्ला रहै छै माथों नीचू ठेहुना!

शीतलहरी छै जोरों पर, प्रान रहै छै ठोरों पर,  
जेना कि काटै छी जिनगी, के काटै छै एहना!

हों-हों ठंडी बहै छै, हड्डी-हड्डी डंसै छै,  
थर-थर काँपौं पुरबा में पीपर के पत्ता जेहना।

चहियौं अगर जों कीनै लें, कुछ बेची कें पिहने लें,  
पौरकें बिकले साहू के कर्जा दै में सब गहना।

चेथरी-चेथरी साटै छी, जाड़ केन्हों कें काटै छी,  
की करवै जों आवी गेलै हेनो हालो में पहुना!

### अलिया गे, झलिया गे

अलिया गे, झलिया गे, बाप गेलौ पुरैनिया गे,  
कैथी लें तोहें कानै छैं, बात कुछ की जानै छैं,  
नौकरी करै गेलों छौ, है ले पैसा देलौ छौ,  
जेहना होवौ काम चलाव, दुख के आरो कुछ दिन दाव,  
लोर आँखी सें पोछी ले, खेलें ता-ता थैय्या गे ।  
अलिया गे, झलिया गे, बाप गेलौ पुरैनिया गे ।

दुख के दिन कुछू रहलौ, सुख के दिन आवी चललौ,  
खैय्यें-पीवियें सुक्खों सें, अब तक रहले दुक्खों सें,  
भाग फिरै छै सब्भे के, दुख नौ के सुख नब्बे के,  
हाँसैं-हाँसैं आबें तें आवी चललौ मैय्या गे,  
अलिया गे, झलिया गे, बाप गेलौ पुरैनिया गे ।

इखनी रहै छैं बारी में, तोहीं रहवै अटारी में  
कौर कोठी होतो देखियैं, रानी रं बैठलौ रहियैं,

राजा ब्याहै लें ऐतौं, सब्भे तोहरो गुन गैतौ,  
 तेंबें तोहरो लें कहाँ, बाबू आरो भैय्या गे।  
 अलिया गे, झलिया गे, बाप गेलौ पुरैनिया गे ।

## अड़गड़ मारुं, बड़गड़ मारुं

अड़गड़ मारुं, बड़गड़ मारुं; बसिया भात खोली-खोली खांव!  
 दोस दुआरी घुरी-घुरी ऐलौं, सब्भे ठां दुतकारे पैलौं,  
 की दूसरा के? आपनो होने, केकरो पास नै हम्मं गेलौं;  
 आबें बोलौं कन्ने जांव, बसिया भात खोली-खोली खांव!  
 केकरो की विश्वास सुदमियां, बदली गेलै पूत-दुल्हैनियां,  
 ऊ भुक्खों सें मेरै तड़पै, जेकरो कोख के बेटा कमियां,  
 दौड़तें-धुपतें दुखलौं पांव, बसिया भात खोली-खोली खांव!  
 दोनो मिली कें मौज उड़ाबै, की साथों में गाना गावै!  
 हम्मं ओसरा पर सुतलौं छी, एकरों केकरौ लाज न आवै;  
 अंगरेजी में की घांव-घांव, बसिया भात खोली-खोली खांव!  
 हमरो भागे फुटलौं छेलौं, बेटा नांखी पतुहुवो भेलौं,  
 लंगड़ों बोर दुल्हनो कानी, दोनो छै देवै के मांगलौं,  
 एक मूसों तें दूसरो म्याऊ, बसिया भात खोली-खोली खांव!

## हिन्नं लोढ़ी हुन्नं पाटी

हिन्नं लोढ़ी हुन्नं पाटी, सकर कन्न बीजू बन्न!  
 देखी अयलौं शहरो कें भी, गाँवों कें तें देखले छै;  
 के बचैतै दोनों कें ? संहार दोनों के लिखले छै;  
 झुट्टे हल्ला छेलै कि लोगों कें चैन छै शहरो में  
 प्राण उठै छै अमरित में भी, नै खाली ई जहरो में,  
 खून-खराबी, कोर्ट-कचहरी, मौर-मोकदमा रोजे-रोज,  
 खून करै छै कौनें केकरो पुलिस करै छै केकरो खोज;  
 हरदम्मे छाती सें सटलौं छूरा-बन्दूक की-की नै,  
 कना रहै छै तौ पर भी सब ? काका, लोग वहाँकरो धन्न!

गाँवों में की सुख छै काका? वहाँ डकैती मारे-पीट,  
 बड़का मैलकौं के हौ जूता, आरो हमरों खुल्ला पीठ;  
 शहरे हेनो मारबों-काटबों, औरत के इज्जत सें खेल,  
 बीच-बचाव करों तें काका, उल्टे जैभा थाना-जेल;  
 पुजते रेंहों जिनगी भर, फेरू ई सॉर-सिपाही कें,  
 के चाहै छै भोगै लें ई नरक, कहों नी, चाही कें ?  
 बोलों माथा कहाँ बचाय लें जैभा कक्का! शहरों में ?  
 दोनों तरफें पथरे राखलौं, सोची कें हम्में छी सन्न ।

सब जग्घों के एक्के रं लोग, सब जग्घों के एक्के हाल,  
 काँटों गाछ में काँटे जादा, जौड़ रहें ऊ या कि डाल;  
 निकलौं नै गल्ली-कुच्ची में, निकलौं नै चौराहा पर,  
 की काका विश्वास करै छों ई लोगों बौराहा पर;  
 नै बूझे छै प्रेम-दया कुछ, धोर-धरम के बाते की,  
 जे साथी रस्ता में लूटें, ऊ साथी के साथी की!  
 मारी दै कि काटी दै पर केंहै लें नै छोड़वै ई कि  
 आय सुरच्छा ओतनै महगोँ—जतना की महगोँ छै अन्न ।

### कागज-कत्तर कलम-दवात

कागज-कत्तर कलम-दवात, ईंटा-मांटी सोना के ठाठ,  
 ईंटा-मांटी सोना के ठाठ, ठाठ गिराय दें पूरे आठ ।

पूरे आठ करै छै शासन, बाँकी तें पावै लें भासन,  
 जाँच कमीशन, अनशन-बैठक, रोज पढ़ैथौं नैका पाठ ।

लम्बा-चौड़ा बाते खाली, हर कामों में हाथे खाली,  
 मॉन मुताबिक कुछ नैं मिलथौं, देखै के बड़का ठो हाट!

पाँच बरिस में मोहर मारों, मिलथौं कारखी दीया बारों,  
 हूनी तें चन्दन रं महगोँ, हम्में की ? हममें तें काठ!

अखबारों में हल्ला खाली, सौंसे देश में गल्ला खाली,  
राजघाट के छोड़ो तोहें, देखो आपनों-आपनों घाट ।

सा रे ग ग रे सा ग म, एक कोठरी में आठ ठो हम्मैं,  
हुनका कोठी अकेले चहियों, देखी ला पटना के लाट !

## औका-बौका तीन तड़ौका

औका-बौका तीन तड़ौका, लौआ-लाठी-चन्दन-काठी,  
बाग रे बगडोल-डोल, आबैं की लोगों के मोल!

लोगों सैं जादा तैं दाम, मिट्टी के आबैं हे राम!  
नरमेघों के होम हुवाम, जानों के दू टाका दाम!  
इक-दू टा नै छै बदनाम, कत्तैं कैटभ के ई काम,  
लोगों के छीलै छै चाम, जानों के दू टाका दाम!  
भोरे होय छै राम-सलाम, साँझे हुनकों काम तमाम!  
होले जाय छै मँहगों माँटी, लौआ-लाठी, चन्दन-काठी,  
बाग रे बगडोल-डोल, आबैं की लोगों के मोल!

ई केहनों भागों के चाल, लोगों लैं लोगे छै काल!  
मिट्टी लोहू सैं छै लाल, लोगों लैं लोगे छै काल!  
सगरे सन्नाटा रों जाल, लोगों लैं लोगे छै काल!  
ऐलों छै केहनों ई काल, नरमुंडों रों पिहनी माल,  
नांचै छै उमतैलों व्याल, लोगों लैं लोगे छै काल!  
हम्मैं तोहें पाठा-पाठी, लौआ-लाठी, चन्दन-काठी,  
बाग रे बगडोल-डोल, आबैं की लोगों के मोल!

## इति-इति पुड़िया, पकड़ कनैठिया

इति-इति पुड़िया, घीयों में चपोड़िया, मैदा के धूमधाम ना,  
हाय राम मैदा के धूलधाम ना, हाय राम मैदा के धूमधाम  
इति-इति पुड़िया, पकड़ कनैठिया ना।  
मिली-जुली खैवै, घुमी-फिरी ऐवै, टोला के टोला ना,  
हाय राम टोला के टोला ना, हाय राम टोला के टोला,  
घूमी-फिरी ऐवै, धूमो मचैबै ना।  
पहलें जैवै पुवारी टोलों मंटू काका कन ना,  
हाय राम जोगी चाचा कन ना, हाय राम तनकू चाचा के  
गोड़े लगवै, मिठ्ठों खिलैतै ना।  
पछियारी टोला में सबसें पहलें पुरहैत चाचा कन ना  
हाय राम फेरू वहाँ सें ना, हाय राम फेरू वहाँ सें  
मिसिर काका कन खेला खेलवै ना।  
देखी-देखी हाँसतै, आपनो खेलतै हमरों संग में ना  
हाय राम कान्हा चढ़ैतै ना, हाय राम माथों पर हमरों  
हाथ रखी के आशीषो देतै ना।  
उतराहा टोलों के मंडल बाबा के गोड़ो भी लागबै ना,  
हाय राम खानो भी खैवै ना, हाय राम हुनकों बैठैवै  
अपनों बैठवै, खिस्सो भी सुनवै ना।  
दखनाहा टोलों के गोपी दादा कन जैवै पर बोलवै नै  
हाय राम गोड़े धरी के ना, हाय राम कानवै खाली  
बोलवै गाँम के कहनें विसरलौ ना।  
आबे नै जय्यो हो गोपी दा, धरी भरी पांजों कहवै ना,  
हाय राम कानी-कानी कहवै ना, हाय राम बीजू वन नै  
जय्यो दादा हमरा बिसारी ना।  
गामे हभांक हेनों लागै छै दादा, टोले नै खाली ना  
हाय राम घोरै नै खाली ना, हाय राम गाँमे में रहों  
गेलों बुलावों, मेला लगावों ना।

## तोहरो डेंगिया खूब पूजै छी

अपनो गाँव के भूली देखो शहरो के गुनगान करौ,  
माय के हुएँ पारलो नै तेँ मौगी के सम्मान करौ;  
देखो पेटो लेँ शहरी के तलवा केँ सहलाय छी,  
तोहरो डेंगिया खूब पूजै छी, अपने डेंगिया ढाय छी!  
हम्मे तेँ गाँवो के गाँवई, 'रूपसा' हमरोँ गाँव हो,  
रोटिये फेरोँ मेँ नै पड़लोँ घर पर हमरोँ पाँव हो;  
चार ठो पैसा लेँ गाँवो केँ छोड़ी केँ पछताय छी!  
तोहरो डेंगिया खूब पूजै छी, अपने डेंगिया ढाय छी!

गिरतेँ होतोँ छप्पर-देहरी झोर-हवा मेँ भाय हो,  
कोय नै हमरा खबर करै छै, देलेँ छै अनठाय हो;  
की करवोँ, रोजी केँ छोड़ी गाँव केना केँ जाय छी!  
तोहरो डेंगिया खूब पूजै छी, अपने डेंगिया ढाय छी!

औसरा पर संदूक हौ बड़का कोय तेँ लइये गेलोँ होतै,  
बाबा केँ बनवैलोँ छेलै, हुनकोँ आतमा कत्तेँ रोतै;  
मन केँ कोँल पड़ै नै, मन केँ कत्तो भी समझाय छी!  
तोहरो डेंगिया खूब पूजै छी, अपने डेंगिया ढाय छी!

तुलसीचौरा रोँ तुलसी के जोड़ सूखी गेलोँ होतै,  
एक्को ठो लोगोँ के बिन तेँ घोर भुताहा रं होतै;  
सब्भे तेँ रेँनेँ वेँनेँ छै—सोची केँ पछताय छी!  
तोहरो डेंगिया खूब पूजै छी, अपने डेंगिया ढाय छी!

केहनों होतै गोपी काका, केहनों छोटका बाबा हो,  
केना रहती होती चाची आरो आबिद चाचा हो;  
देखै लेँ पंचकौड़ी दा केँ तरसी-तरसी जाय छी!  
तोहरो डेंगिया खूब पूजै छी, अपने डेंगिया ढाय छी!

खूब बियैतें होतै अभियो मंडलका के गाय नें,  
कथी लें बेचियो देलकै नी है रं गाय कें माय नें;  
कंटोली रोटी में दूधो पनछेछरों रं खाय छी!  
तोहरों डेंगिया खूब पूजै दी, अपने डेंगिया ढाय छी!

चानन नद्दी में हौ छप-छप, पानी चुआंड़ी के पीवों;  
अट्टा गोटी खेले लेली चिकनों पत्थर कें चुनवों;  
बहियारों में हेनै भटकै लेली अबें ललाय छी!  
तोहरों डेंगिया खूब पूजै छी, अपने डेंगिया ढाय छी!

### कनियाँय-मनियाँय झिंगा-झोर

“कनियाँय-मनियाँय झिंगा-झोर,  
कनियाँय-माय कें लै गेलै चोर,  
कनियाँय-माय कें लै गेलै चोर,  
दौड़ों हो शहर के लोग!”

“बीरना माय कहिनें कानै छों,  
हमरों कैहलों नै मानै छों,  
लै गेलै चोर, तें लै जाबै लें दौ,  
आपनों करनी कें पाबै लें दौ,  
पिहनी कें साड़ी चमकौआ,  
तेल माथा में की महकौआ!  
टैम देखै लें घड़ियो लेलें,  
बड़का बटुआ की लटकैलें,  
देह उधारी कें ऐठ्ठै छेली,  
सबमें अलगे छुट्टे छेली!  
आँख में काजर डाली कें सेथरों,  
फसली जाल में लेलकी केकरों!  
फैसन-पाटी सजबों हौ रं,  
माय गे माय, की फाटबों हौ रं!



माथा पर नै अँचरा जरियो,  
ठिक्के ऐलै कलजुग घोर!  
कनियॉय-मनियॉय झिंगा-झोर,  
कनियॉय-माय कें लै गेलै चोर।

“बुतरू हेनों की कानै छों,  
सच कें तोहें की जानै छों,  
बोलै छेली सब सें मुस्की,  
सौंसे बस्ती में कनफुस्की;  
है रं हाँसबों के की मानै,  
बड़का की, छोटकों भी जानै।  
जन्ने जा हुन्ने हल्ला छों,  
बात दबावों तें अच्छा छों;  
कीचड़ में ढेला फेकला सें  
की मिलतौ ई चिल्लैला सें?  
दस ठो सुनथों, हाँसतों नै की ?  
है उमिरो पर बोलों है की ?  
है रं भोकरी कें की कानवों,  
पोछों नी आँखी के लोर!  
कनियॉय-मनियॉय झिंगा-झोर,  
कनियॉय-माय कें लै गेलै चोर ।

“कनियॉय-माय कें चोर लै गेलों,  
थोड़े टा अपजस नी भेलों,  
हिन्ने तें गाँवों कें सौंसे,  
लै गेलै मुखिया उल्टे धौंसे;  
देश गेलै लीडर के साथें,  
कानून कोर्ट-कचहरी हाथें,  
गेलै मास्टर साथें शिक्षा,  
पुरजी लै कें होय छै परीक्षा,

उल्टा-पुल्टा      सब्भे      भैलै,  
 थाना      घुसखोरी      संग      गेलै;  
 सास-पुतोहू      के      झगड़ा      में,  
 घर      गेलै,      घरवैया      गेलै!  
 सगरो      के      एक्के      खिस्सा      छै,  
 कानवा,      के      कहतौं      अच्छा      छै!  
 ई      तें      अन्हरिया      भोगै      लें      लागथौं,  
 लानलें      छेली      घर      में      इंजोर!  
 कनियाँय-मनियाँय      झिंगा-झोर,  
 कनियाँय-माय      कें      लै      गेलै      चोर।

“हुनका      कन्नें-कन्नें      खोजवा,  
 कन्नें      दिवसे-राती      रहवा?  
 शहरों      के      सब      चोर-उच्चका,  
 देथौं      हिन्नें-हुन्नें      धक्का;  
 चाट्ठों      पीछुवे-पीछू      रहथौं,  
 बिन्दु,      राखी,      हेमा,      कैहथौं;  
 चाल-चलन      केकरो      अच्छा      नै,  
 आबें      तें      बच्चो      बच्चा      नै;  
 अपनों      कोय      नै      यहाँ      पें      होथौं,  
 तोही      कानवा,      कोय      नै      रोथौं  
 हमरों      कैहलौं      मानों,      लौटों!  
 एत्तें      जी      कें      करों      नै      छोटों!  
 है      जे      पुलिस      छौं—की      समझै      छौ,  
 दुनियाँ      कें      तोहें      की      जानै      छौ,  
 झुट्ठे      जेल      तोरा      लै      जैथौं,  
 राखतौं      वैठां      भोरमभोर।  
 कनियाँय-मनियाँय      झिंगा-झोर,  
 कनियाँय-माय      कें      लै      गेलै      चोर ।”

## सुइया हेराय गेलों खोजी दे

“सुइया हेराय गेलों खोजी दे”  
“केना हेराय गेलों दादी गे?  
भौजी तोरों नै छौ सीधी गे,  
सुइया लें ठुनकों चलैथो गे,  
भय्यो बचाय लें नै ऐथौ गे।  
बंदूक लेलों जेनों फौजी के,  
होने रबैया छौ भौजी के;  
बड़ी मनाय छेलैं देवी सें  
दुरगा माय, दुरगा माय भौजी दे”

“सुइया हेराय गेलों खोजी दे!”  
“देखले नी माँगी कें दीदी गे,  
तोहें बड़ी ही छै सीधी गे;  
अच्छा निभाय लें ई जानी ले  
दिले नै सब कुछ छै मानी ले।  
तोहरौ जों होतियो झलारों गे  
रैथिहें की हेन्हे उघारों गे?  
इज्जत सें रहै लें देवी सें  
माँगे-मनावें कि रोजी दे!  
सुइया हेराय गेलों खोजी दे।”

### अंतर-मंतर घोंघा-साड़ी

अंतर-मंतर, घोंघा-साड़ी, बुढ़िया थूकै लौंग-सुपाड़ी।  
लौंग-सुपाड़ी सें की होतै, चार दिनों के भूख की जैतै!  
रग-रग टूटै चार दिनों सें, तोर छुटै छै चार दिनों सें;  
जीयै के नै मॉन करै छै, देहों केहनों—जे नै जरै छै!

कोंन उमीदी पर छै टिकलौं, कोय भरपेट्टा, कोय तें भुखलौं!  
खूब विधाता के विधियो छै, कोय नंगा, कोय फर-फर साड़ी!  
अंतर-मंतर घोंघा-साड़ी, बुढ़िया थूकै लौंग-सुपाड़ी।

बड़ा साब कन मौजे देखों, हिन्ने हाही रोजे देखों,  
हुनकों घर आराम चुवै छै, हमरों घर में घाम चुवै छै;  
तहियो दाना लें बिललावौं, कल्ले केकरा लग घिघयावौं!  
के देखै छै केकरों दुख कें, सब पूछै छै अपने सुख कें;  
देवो भी अन्हरों नै देखै, लोर चढ़ावौं रोजे ठाड़ी!  
अंतर-मंतर घोंघा-साड़ी, बुढ़िया थूकै लौंग-सुपाड़ी।

पीरो-पित्तर सब कें पुजलौं, केकरा लुग कहिया नै गेलौं!  
ठिक्के नी सब लोग कहै छै—अपने मरलौं सरंग देखै छै।  
आबें हम्मैं ही कुछ करवै, आखिर कब तक हेने मरवै?  
सब नागै कें दूधो दै छै, ढोढ़बा कें कोय नै पूजै छै।  
आखिर पोसला सें की फायदा—फुलचनिया माय अधकपाड़ी!  
अंतर-मंतर, घोंघा-साड़ी, बुढ़िया थूकै लौंग-सुपाड़ी।

## धान कूटै धनियाँ

धान कूटै धनियाँ, बैठों बहिनियाँ,  
केला के चोप लै कें दौड़े कुम्हैनियाँ।

एकों-एकों पत्ता पर सुपों भर धान छै,  
अभी-अभी बरसा में करलें असनान छै;  
झूमै, मतैलों रं खेतों के धान सब,  
पुरतै किसानों के अबकी अरमान सब।  
पुरवा के झोकों में उठै छै, गिरै छै,  
देखै में हेन्हे कि साँप जेना तैरै छै;  
राघो किसानों के दुलहैनिया टुनकै छै  
अबकी अगहनों में जैवै पुरैनियाँ।

धानों पर बूँदों के मोती छै छिरियैलों,  
हरियैलों धान देखी मनो छै हरियैलों;  
धानों के जड़ी में पानी के रेत बहै,  
मेंढी पर बगुला-बराती के पाँत रहै।  
उड़लै दू-चार, शेष ध्यानो में मस्त छै  
आरो दू-चारों के मछली लें गस्त छै;  
आपना औसारा पर आपनै में बात करै,  
बात करी हाँसै छै साहू-सहुनियाँ ।

## कलि गनेस देवा

कलिगनेस, कलिगनेस, कलिगनेस देवा,  
लडुवन के भोग लागै, संत करै सेवा।

आपने खा, आपने हेनो कें खिलावो,  
लछमी तें साथें छौं-पूँजी बढ़ावो।  
संतै कें देभौ; कि हमरो भी देवा  
कलिगनेस, कलिगनेस, कलिगनेस देवा।  
भूखलो छी कै दिन सें तोरा की कहियो,  
आबें नै मोन करै तोरा तक अइयो;  
रुसवे नी करभें तें हमरो की लेवा  
कलिगनेस, कलिगनेस, कलिगनेस देवा।

छोड़ो ई ठाट-बाट आबें नै चलथौ,  
बैठला सें लड्डू की, रोटियो नै मिलथौ;  
हमरो भी देखभौ, की तोदे बढैवा?  
कलिगनेस, कलिगनेस, कलिगनेस देवा।

हमरे चढ़ैलो तोहें मूसा कें देभौ  
हमरा परसादी लें कब तक तरसैभौ?

है रं जों करवा तें जाने नी लेवा!  
कलिगनेस, कलिगनेस, कलिगनेस देवा।

## के-के जैबे गंगा पार

कन्ना गुजगुज महुआ के डार, के-के जैवे गंगा पार?

गंगा पार में मेला लागतै, पौरके नांखी थियेटर ऐतै;  
फेरू बजरंगी काका के चलतौ वैठां राग मल्हार।  
कन्ना गुजगुज महुआ के डार, के-के जैवे गंगा पार ?

अबकी तें नौटंकी संग-संग लानतै सॉर-सिनेमा भी रंग,  
तरऊपरी पर ऊपर-नीचें जी भर करवै अबकी बार।  
कन्ना गुजगुज महुआ के डार, के-के जैवे गंगा पार?

टिकुली, पाउडर, फीता, लेवै, हिरिया कें जाय कें दिखलैवै,  
चिढ़तै भीतरे-भीतर देखियें, देखतै जखनी मोती के हार!  
कन्ना गुजगुज महुआ के डार, के-के जैवे गंगा पार ?

भागलपुर के बाबू ऐतौ, देखियें की रं आँख दबैतौ,  
बचिये कें तोरा सब रहियें, की रं हाँकतौं मोटर कार!  
कन्ना गुजगुज महुआ के डार, के-के जैवे गंगा पार ?

शह्रों सें जादूगर ऐतै—आँख मूंदी कें नाम बतैतै;  
सूना में चल पूछियै लेवै—कहिया उठतै बाबू के भार?  
कन्ना गुजगुज महुआ के डार, के-के जैवे गंगा पार ?

## एको माथा पर

एको माथा पर तित्तिर बुलै छै,  
कोय नै लै छै मोल;  
तित्तिर धीरै-धीरै बोल ।

खाली तमाशा देखी कें हाँसै,  
केहनौ ई सब लोग,  
आरो आपनौ अच्छा होय के सब पीटै छै ढोल;  
तित्तिर धीरै-धीरै बोल ।

के बोलें केकरौ सें कुछ्छू  
सबके एक्के चाल;  
आपना कें सब तेज बूझै छै, दूसरा कें भुसगोल;  
तित्तिर धीरै-धीरै बोल ।

सब मौका के मारलौ दीदी,  
सब सुक्खौ के यार,  
जेकरा सें कुछ्छु फायदा छै, ओकरे आबें मोल;  
तित्तिर धीरै-धीरै बोल ।

इतियो टा विश्वास करै छै  
केकरौ पर नै कोय,  
बेसिये तें भेड़िये छै दीदी, पिन्हलें भेड़ के खोल ।  
तित्तिर धीरै-धीरै बोल ।

मानलौं कि हमरौ गीतौ में—  
रस नै छै, नै बात,  
सुग्गा के अच्छा लागै छै सबके टेढ़ो लोल!  
तित्तिर धीरै-धीरै बोल ।

## आमों के लकड़ी कड़ा-कड़ी

आमों के लकड़ी कड़ा-कड़ी,  
हथिया दौड़े तड़ा-तड़ी ।

जंगल के छोटका सब सोचै—  
जे अच्छा छै, हाथिये नोचै ।  
बोलें के ? केकरा पड़लौ छै,  
दस के भी आँखे गड़लौ छै;  
सिंह सुधारों में की लगतै,  
देखें हमरा खड़ा खड़ी ।  
आमों के लकड़ी कड़ा-कड़ी,  
हथिया दौड़े तड़ा तड़ी ।  
हे हो, हिन्नें साथें आवों,  
अपनों धुन नै अलग बजावों;  
जों जमात नै अपनों होथौं,  
एकेक करी कें सबकें खैथौं!  
भालुवो कें देखवे नी करै छै  
हर बातों में अड़ा-अड़ी!  
आमों के लकड़ी कड़ा-कड़ी,  
हथिया दौड़े तड़ा-तड़ी ।

## रघुपति राघव राजा राम

रघुपति राघव राजा राम, पतितपावन सीताराम!  
के देशों में सब सें कोढ़ी; पट्टा पर मोटका रँ लोढ़ी?  
के अपनों आराम करै के लोगों सें मांगै छै दाम?  
रघुपति राघव राजा राम पतितपावन सीताराम!



सबसें कोढ़ी धनपति, धनजन, सेहे विषहर, सेहे गेहुअन,  
की मतलब लोगों के दुख से, डँसवै के हिनका एक काम;  
रघुपति राघव राजा राम पतितपावन सीताराम!

के भोरे सें शाम खटै छै? के धरती के पहलें फटै छै?  
केकरों खून नदी के पानी? खेत पीयै छै केकरों धाम?  
रघुपति राघव राजा राम पतितपावन सीताराम!

मॉर मजूरा खेत खटै छै, की मुट्ठी भर अन्न जुटै छै ?  
नमक जुटैथैं मरै मजूर, नमक पचावै नमकहराम।  
रघुपति राघव राजा राम पतितपावन सीताराम!

के देशों में राज करै छै? के शासन के घास चरै छै?  
के छुछे हिन्ने सें हुन्ने दौड़ लगावै बिना लगाम?  
रघुपति राघव राजा राम पतितपावन सीताराम।

कुछ दादा के राज चलै छै, साधू के की दाल गलै छै!  
कोमा सें सब काम निकालै, के पूछै छै पूर्ण विराम!  
रघुपति राघव राजा राम पतितपावन सीताराम ।

## सभ्भे कुछ भूली गेला

हमरा की-की तोहें देतियौ, छोड़ों, घूरी कें तें ऐतियौ,  
तोहें दिल्ली जैथें सब्भे कुछ भूली गेला ।

तोहरों भाषण धुआंधार, 'सब कें जीयै के अधिकार'  
तोहें दिल्ली जैथें सब्भे कुछ भूली गेला ।

'सब कें रोजी रोटी घोर, सब्भे होतै सुख सें तौर'  
तोहें दिल्ली जैथें सब्भे कुछ भूली गेला ।

हमरों घर के फट्टा हाल, तोहें आपने लें बेहाल,  
तोहें दिल्ली जैथें सब्भे कुछ भूली गेला ।

हमरों पैर पकड़वों रोवों, आपनों वोटो लें घिघयैवों  
तोहें दिल्ली जैथें सब्भे कुछ भूली गेला ।

केना तोहरा पर पतियैतौं, तोहें जुतयैवौ, जुतयैतौं  
तोहें दिल्ली जैथें सब्भे कुछ भूली गेला ।

## सिंगार सोलहो

“अबकी ऐवा, तें लानियों सिंगार सोलहो !

सोना के अंगूठी लियों आरो लियों टिकुली,  
हाथों के कंगन लियों आरो लियों हंसुली,  
पासा लियों कानों करों, आँखी करों काजल,  
फीता लियों, बिंदी लियों, पैरों करों पायल,  
आरो सुनों, कीनी लियों—ऐल्ला-पौडरो ।  
अबकी ऐवा तें लानियों सिंगार सोलहो !”

“हों जी, ऐभौं, तें लानभौं सिंगार सोलहो!  
सोना के अंगूठी लेभौं आरो लेभौं टिकुली,  
हाथों के कंगन लेभौं आरो लेभौं हंसुली,  
पासा लेभौं कानों करों, आँखी करों काजल,  
फीता लेभौं, बिंदी लेभौं, पैरों करों पायल,  
आरो सुनों कीनी लेभौं—ऐल्ला-पौडरो,  
अबकी ऐभौं तें लानभौं सिंगार सोलहो !”

“अबकी ऐवा, तें लानियों सिंगार सोलहो!  
नाकी केरों बेसर लियों आरो मँगटिक्का,  
देखी-देखी छूटी जैतै सब्भे केरों छक्का!  
बाजूबन्द बाँही केरों लियों पिया हेनो;  
मुखिया के दुलहैनी पिहनै छै जेहनों।  
चुनी के बुलाउज लियों, साया-साड़ियो!  
अबकी ऐवा तें लानियो सिंगार सोलहो !”

“अबकी ऐभौं, तें लानभौं सिंगार सोलहो,  
नाकी केरों बेसर लेभौं आरो मँगटिक्का,  
देखी-देखी छूटी जैतै सब्भे केरों छक्का।  
बाजूबन्द बाँही केरों कीनी लेभौं एहनों,  
मुखिया के दुलहैनी पिहनै छै जेहनों।  
चुनी के बुलाउज लेभौं, साया-साड़ियो।  
अबकी ऐभौं तें लानभौं सिंगार सोलहो ।”

### करिया झुम्मर खेलै छी

करिया झुम्मर खेलै छी,  
लीख पटापट मारै छी ।

देखलौं यहू राज गे हिरिया,  
खाली झुट्ठे-मुट्ठे किरिया  
खाय छै, पूछवै अगली बेरिया;  
इखनी तें हमें कानै छी ।

पहिला सेँ ई निक्के छै,  
केना कहै छैं—ठिक्के छै?  
हिरिया यहू फिक्के छै,  
एतन्हें हम्मू जानै छी ।

की कहियौ कि एक्के ठैय्यां,  
हम्में बैकबर्ड, फुरबर्ड सैय्यां;  
रोज मरौड़े हमरों बैहियां,  
लोर आँखी सें गारै छी।

जेकरो गोड़ें ढलढल फोका,  
ओकरो वास्तें की पनसोखा!  
तोहीं खेलें औका-बौका,  
दरदों सें हम्में फाटै छी।

## घोगघो रानी कत्तें पानी

घोगघो रानी, कत्तें पानी ? छोड़ों कक्का वहें पिहानी।

हाल सुनावों घर-देशों के, जॉर-जमीनों के केसों के,  
अबकी खेती केहनों रहलौं? दादा ऐलौं की नै ऐलौं?  
हुनका तें पैसे के धुन छै, आरो की हुनका में गुन छै!  
बूढ़ों बाबू आरो माय के, केना चलै छै हुनकों खाय के?  
दादा कुछ भेजे छै की नै? हमरा पैसा मिलथौं जेहनै,  
भेजी देवौं; इखनी तें बस—सौ टाका में पाँच परानी;  
घोगघो रानी, कत्तें पानी ? छोड़ों कक्का वहें पिहानी।  
अभियो की पोखरी में फूलै कमल; गाछ सें बच्चा झूलै?  
अभियों की इसकूल के पीछू निकलै छै गोजरैठों-बिच्छू?  
की अभियों ईमली गाछी पर, भूत दिखै छै रात ऐला पर?  
कुआं खनैलौं की नै अपनों, मंगर का के मॉन छै कैहनों?  
मेला पर दंगल अभियों की लागै छै। देखवों कभियो की !  
काका हमरों देखिया लेला—रात जगै छी, मरौं विहानी;  
घोगघो रानी, कत्तें पानी ? छोड़ों कक्का वहें पिहानी ।

## खुट्टा अगोरनी माय-बाप चोरनी

खुट्टा अगोरनी माय-बाप चोरनी,  
गाँवों में खाली यें आगे लगाय छै,  
एकों कें दोसरा सें खाली लड़ाय छै,  
हेकरा सें केकरो नै कहियो भलाय छै,  
सुसुरमुँही हेनों; जेहनों की माय छै;  
सतरंगी पिहनी कें बनतों की मोरनी,  
खुट्टा अगोरनी माय-बाप चोरनी।

सबके घरों में जाय कनसुवों लेतों,  
ओकरा में थोड़ों मिलाय कें बतैतों।  
ऐथों मुंझौसी तें जल्दी नै जैतों,  
सब्भे घरों के यें खिस्सा उठैतों।  
फाटतों की सब्भै में ई चुगलखोरनी,  
खुट्टा अगोरनी माय-बाप चोरनी।

मरदों सें बात की ठस-ठस सरपट्टा,  
आपनों पुरुषों के नामों पर बट्टा।  
बोलै तें यहेँ सब, चूलो नै छट्टा,  
मौसरी के दाली में इमली के खट्टा।  
कुलों में होलों छै ठिक्के कुलबोरनी,  
खुट्टा अगोरनी माय-बाप चोरनी ।।

### नानी गेलौ पानी भरें

“नानी गेलौ पानी भरें भात भेलों गील,  
दौड़वे तें दौड़ नै तें मारवौ दू कील।”

“मारवौ कैहिनें नी बाबू तोहरे छौं राज,  
जेबिये में कानून छौं, जेबिये में ताज;

पैसा के जोर छौं, की थाना के डोंर,  
कोटो-कचहरी सब तोहरे तें घोंर।  
मारों-जुतयावों—के सुनतै अपील,  
सहले तें ऐलों छी तोहरो दू कील।

“बचपन सें लै कें जुआनी तक आज,  
तोहरे तें डेढ़ी पर करलें छी काज;  
दादा-परदादा सब घरों के जॉन,  
तोहरे तें राखलें ऐलों छौं सब मॉन।  
बढ़ले ही गेलों छौं पाबी कें ढील,  
मारभों कैहनें नी तोंय हमरा दू कील।

“मारों की जारों, नै दौड़बौ पर आय,  
हेनों की भुखलों रही कें कमाय!  
हमरे नी मेहनत पर तोहरो ई शान,  
कत्तें दिन टिकलों छै केकरो गुमान!  
पुरतौं दू हाथ, भले दौड़ों दू मील,  
छोड़ों सपनैबों ई—मारवौ दू कील।

## घुघुआ-घू, मलेल फूल

घुघुआ-घू, मलेल फूल, पढ़ों बेटा का-की-कू,  
वन के हिन्दी में एक होय छै, दू अंगरेजी, हिन्दी दू।

अ सें ऐथौं बाबू कहिया, आ सें आस लै जिये छी,  
ई सें ई रं के दुक्खों सें मरिये जइयों तें अच्छा;  
घुघुआ घू, मलेल फूल, पढ़ों बेटा का-की-कू।

क सें कल्लें-कल्लें आवों, ख सें खड़ा होय लें सीखों,  
तोहरे तें देखी कें हम्मं दिन केन्हौ कें काटे छी;  
घुघुआ घू, मलेल फूल, पढ़ों बेटा का-की-कू।

ग से गेलौ तोहरो बाबू तोरो ऐथैं बीजू वॉन,  
च से चार महीना भेलै, छ से छटपट हमरो मॉन;  
घुघुआ घू, मलेल फूल, पढ़ो बेटा का-की-कू।

ज से जाय के इनरासन से लानभौं परी तोहरा लें,  
त से तोहरो नुन्नू-मुन्नू ऐथौं फिरु हमरो घर में;  
घुघुआ घू, मलेल फूल पढ़ो बेटा का-की-कू।  
थ से थाबुक-थुबुक चलथौं, ध से धरी के हमरो हाथ,  
गिरथौ-पड़थौं कैहवै हम्मै—पा, पा, पा, पा, पा, पा;  
घुघुआ घू, मलेल फूल पढ़ो बेटा का-की-कू।  
ब से 'बाबा आबो' जखनी करे लागथौं तोहरो लाल,  
अँचरा में आँखी के राखी कानवो ऐंगना-औसरा में;  
घुघुआ घू, मलेल फूल, पढ़ो बेटा का-की-कू।

बापो के पूत परापत घोड़ा, नै तेँ कुछु कुछ थोड़म-थोड़ा,  
य से योगी भेस बनाय के छोड़ी नै ज्यो तहूँ भी;  
घुघुआ घू, मलेल फूल, पढ़ो बेटा का-की-कू।

## रघुपति राघव राजा राम

पोकत कद्दू, खिच्चा आम,  
रघुपति राघव राजा राम।  
सड़क चौराहा जामे-जाम,  
रघुपति राघव राजा राम।  
चोरो के दै पुलिस सलाम,  
रघुपति राघव राजा राम।  
साँढ़-बिल्हामो ठामे ठाम,  
रघुपति राघव राजा राम।  
रोज अकासे पर छै दाम,  
रघुपति राघव राजा राम।  
शहर बुलै छै गामे-गाम,

रघुपति राघव राजा राम ।  
कोढ़िया सिर पर सौ ठो काम,  
रघुपति राघव राजा राम ।  
जों बिक्री होतियै नर-चाम,  
रघुपति राघव राजा राम ।  
बड़का पद बैकुंठे धाम,  
रघुपति राघव राजा राम ।  
परिचय, युग रों बड़का वाम,  
रघुपति राघव राजा राम ।  
भितरघात रों चर्चा आम,  
रघुपति राघव राजा राम ।  
माधो में नै सुखै घाम,  
रघुपति राघव राजा राम ।  
चल अमरेन्द्र होलौ शाम,  
रघुपति राघव राजा राम ।

बाबू हो बाबू हो, डोंर लागै छै

बाबू हो, बाबू हो, डोंर लागै छै!  
केकरो डोंर बेटी, केकरो डोंर ?

कैलू दा केकरा सेँ की-की नी सिखतौं,  
भीती में कुछू सेँ कुछू नी लिखतौं;  
देखौ नी अक्षर पर अक्षर ही दिखतौं,  
एकरै की कहौ चुनाव कहै छै?  
बाबू हो, बाबू हो, डोंर लागै छै!

हिन्नें या हुन्नें, तोहें जन्नें भी हेरों,  
देखौ नी खम-खम पुलिसों के जेरों;  
गाँवों केँ लागलै शनिचरा के फेरों,



बोलै छै सब्भे, पर कोय नै सुनै छै।  
बाबू हो, बाबू हो, डोर लागै छै!

हौ देखौ हुन्नै जनानी कॅ बोलतै,  
मरदौ के साथौ पर टुकनी रं उड़तै;  
माय कॅ की डाटै छौ घुघटौ उठैतै,  
यें तै मरदाना कॅ माँत करै छै!  
बाबू हो, बाबू हो, डोर लागै छै!

खाली चुनावे के खेल आबै खेलौ,  
पोलटिस के चक्कर में सबके मन मैलौ,  
मीटिंग के पीछूँ छै सब्भे उमतैलौ,  
की जिन्दा, की मुर्दावाद बोलै छै!  
बाबू हो, बाबू हो, डोर लागै छै ।

जैठां कि है रं, ऊ गाँव में नै जय्यौ,  
भूलौ सें हमरा नै वैठां बिहैय्यौ!  
डोली सें पहलें ही अर्थी उठैय्यौ,  
जिनगी भर हेनौ के दर्द सहै छै!  
बाबू हो, बाबू हो, डोर लागै छै!

## देशों लें सोचौ

कुचछू तें देशों लें सोचौ।  
पैहिलै सें तें छेलौं छौं टा,  
नया साल में फेनू एक टा;  
थाह कहीं पर छौं की, नै छौं,  
ई साल बेटी, ऊ साल बेटा।

भरले रहै छौं हरदम खोचौं,  
 कुचूछू तें देशों लें सोचौं ।  
 साले-साल ई छट्टी भौजी,  
 बीकी जेथौं चट्टी भौजी,  
 केना केकरा पालवौ-पोसवौ,  
 खुलथौं आँख के पट्टी भौजी ।  
 बिलबिल करथों जेहनों मूसों,  
 कुचूछू तें देशों लें सोचौं ।  
 हिन्नं रोकौं, देश बढ़ावौं,  
 ऑपरेशन के लैन लगावौं !  
 पुत्र पावै के छोड़ौं किंछा,  
 ढेंगरा-ढेंगरी घौंज-मौज-बोचौं !  
 कुचूछू तें देशों लें सोचौं ।।

कहला सें, छक सें लागतौ

कहवौ तोरा तें करेजा में जाय छक सें लागतौ !  
 रोज-रोज के एकके खिस्सा देखै छियौ कब सें,  
 की बोलै छौ गाँव भरी, तोहें जाय कें सुनें सब सें,  
 घोल्टी-पलटी-बिरना के संग में पंडित के पूत,  
 औघड़ हेनौं घुरतें रहै छै लेंकें अपनों दूत,  
 घर सें तोहें चल्ली देवैं, होतौ जेहनै भोर,  
 बैजू के टटिया के पीछू की चीलम के जोर !  
 कहवौ तोरा तें करेजा में जाय छक सें लागतौ ।

बंसबिट्टी में साँझ-सबेरे कथी लें तोहें जाय छैं ?  
 ई छुच्छों साँढों रं देह पर कथी लें अगराय छै !  
 केकरो बहू-बेटी रहें तोरों आँख जरै छौ,  
 मेथिया कें कहिनें टोके छैं , तोहरो की वें करै छौ !

कातिक के कुत्ता रं घूमें, की रहलौ तोरों पानी,  
की समझै छैं, तोहरे एकटा लागलौ छौ ई जुवानी!  
कहवौ तोरा तें करेजा में जाय छक सें लागतौ।

कहिने दस ठो छौड़ा के संग तोहे गुरु कें डाँटलै?  
हुनकों सामनैं खैनी खाय कें आपनों फुटानी छाँटलै?  
बाप के पैसा खाय-खाय कें देह दिखावै छै की!  
लुच्चा कट ई जुल्फी बढ़ाय कें तेल चुआवै छैं की!  
दस रंग के कपड़ा पहिनी कें तोहें की छाँटे छैं!  
मरलौ लोगों के सामना में आपनों रंग गाठै छै!  
कहवौ तोहरा तें करेजा में जाय छक सें लागतौ।

पोलटिस तें जानै छैं कुछ नै, पोलटिस बतियावै छैं,  
बड़का लीडर हेनो अपनों कुल्हो मटकावै छैं;  
जे भी जानै छै तोहें, सब जानै छैं अधकचरो,  
अधकचरो सब जानलौ-सुनलौ होय छै बड्डी बातरो।  
खादी कें पिन्हला सें कोय भी नेता बनलौ छै की?  
बोतू या बकरी सें कहीं खेत जोतैलौ छै की?  
कहवौ तोरा तें करेजा में जाय छक सें लागतौ।

## लुक्खी बनरिया दाल-भात खो

लुक्खी बनरिया दाल-भात खो, सैय्यां बोलाय छौ, पटना जो।

पटना में हमरों स्वामी गे, बोलै छै—काफी नामी गे,  
जज केरों चपरासी छेकै, मुद्इ सबके काशी छेकै,  
भले कोट में जज ठो कोय छै, असली तें चपरासी होय छै,  
केहनो-केकरो लाग लगैलकै, की कहियौ कि कत्तें देलकै,  
एम. ए., बी. ए. बैठले सब्भे, हुनका नौकरी मिललै कब्भे,

बड़का सब के साथ नै पूछें, अलगी के कुछ बात नै पूछें,  
पन्दरह-बीस तें बात करै के, सौ-दू सौ कागज देखै के,  
पैरवी के पहिले लै लै छै, फेरू तें जो हो, सो हो।

लुक्खी बनरिया दाल-भात खो, सैय्यां बोलाय छौ पटना जो ।

पटना के मॉर-मिनिस्टर नामी, जिनका सें जिनको कपड़े दामी,  
कहियो-कहियो बोलतौ देसी, सब्भे ठां अंगरेजी बेसी,  
मैटरिक में घुड़कनियां खेलौं, की बुझतै, सबटा उमतैलौं,  
जेन्हें केकरो बात चलै छै, गाली, चप्पल, लात चलै छै,  
तुलसी-सूर भले कोय होतौं, सब्भे पर की भाखन देतौं,  
खाली दौरा-दौरा हिनको, घूस के कुच्छू थाह न जिनको,  
तोरो कोठी भूसौं भरलौं, हुनका में छै सोना धरलौं,  
केकरा-केकरा तोहें दूसभैं, एककें ही भांडी के सब ठो।

लुक्खी बनरिया दाल-भात खो, सैय्यां बोलाय छौ, पटना जो।

पटना के हौसपीटल नामी, गुन के बदला खामिये खामी,  
सेथरो डाक्टर सुविधाभोगी, सबटा पंडा, कुछ-कुछ जोगी,  
सबकें ललका पानी देथौं अपने ताकतो के गोली खैथौं,  
हिनी की पढ़लौं-लिखलौं छै, ई सब तें देवे जानै छै,  
बायाँ आँख में घाव जौं होथौ औपरेसन दायँ के करथौं  
दाँत अगर जौं दुखतें रहतौं, बुद्धि देखै कि नाड़ी देखतौं,  
डाक्टर होय छै की बिन पढ़लैं, की होय छै रब्बड़ लटकैलैं,  
पेट फाड़ी कें पेटे में ही कैंची सिटतौं, येंहें सगरो।

लुक्खी बनरिया दाल-भात खो, सैय्यां बोलाय छौ, पटना जो।

## कवि-प्रिया

है फेरु लेलौ तोहें पोथी आरो पतरा!  
कहाँ के फेनु चलानी ई करलौ?  
कहै छियौं ई कि—अच्छा नै होथौं,  
जों तोहें हेन्हों मनमानी ई करलौ।  
रक्खी दौ तोहें सब पोथी आरो पतरा,  
जाय कें बथानी में बछिया कें देखौ;  
कुट्टी दौ, भोरे सें भुखलौं छै बछिया,  
टूटलौं छै कै दिन सें, खटिया कें देखौ!  
जाय कें ओरांची दौ, छोड़ों कविताई!  
भोरे सें कानी रहलौं छै फुलचनमां,  
ई सब तें कुच्छू सुझैतौं नै खाली  
केला के चौप ले के दौड़े पहुनमां!  
घर के तें एक्को नै काम होतौं—जैथौं,  
खाली तोहें सोहरो सें डायरी कें भरो,  
कन्ने उठैलौ ई पोथी आ पतरा,  
खींची दौ पहिलें नूनू के गनतरों।  
दैयो कहाँ सें उठाय कें ई लानला,  
आपने भर टिकथौं यहाँ पर मूँझौसी;  
रूकी जा, तोहें बनाय कें चाय दिहौ,  
ऐतै सिरपतिया के देवर-ननदोसी।  
सुनलौ नै, बैहरो हेनों की ताकै छौ,  
नौड़ी नै छेकियौं कि तोहें जे चाहवौ  
वही करैवौ; की समझै छौ हमरा,  
आखिर ई कब पिहानी बनैवो!  
चंदा कें देखों पिहानी बनावों,  
मंचों पर जाय-जाय कें सबकें सुनावों;  
जे चीज सें झरकी छै लै दै कें वही,  
उन्हें की टुघरै छौ, इन्हें नी आवों!

झुट्टे के दस कें घंघेटी कें कांय-कांय,  
 रोजके एक खिस्सा, ई खिस्सा उठावों;  
 टीनों सें आँटा निकाली लें थोड़ों,  
 कविता बनैला नी—रोटी बनावों !  
 बारी सें बैगन कें तोड़ी लै आन्हों,  
 कुदरुम कें थोड़ों पटैनें भी अय्यों;  
 हाथों में हमरों परद छै यै वास्तें  
 उसनी दौ धान तबें सम्मेलन में जय्यों ।

## भुदरा-गुनिया

भुदरा-गुनियां बड़ी चिकनियां बसिया भात न खाय,  
 टटका भात में मुड़ी डुलावै, सतुआ गट-गट खाय;  
 पढ़वे-लिखवे में पूछों तें दोनों काठों करों फूल ।

भोरे होथैं लगे छड़क्का खेत-पतारी ओर,  
 संझकी बक्ती छुपलौं-छुपलौं लौटथौं जेना चोर;  
 कुछ पूछों तें गुम्मी साधतौं जेना काठों करों फूल ।

की कहियौं ढीवा रों दादी, ई दोनों के बात,  
 बात चलै छै जत्तें दुन्हू के, ओत्तै दुन्हू के हाथ;  
 पीटी आवै छै केकरो भी दोनों काठों करों फूल ।

केकरो गाछ कें झाड़ी आवै, केकरो लौत-पतार,  
 गारियै दै छै टोला भरी के पाड़े, कैथ, कुम्हार;  
 जों डाँटों तें हाँसथौं किट-किट, दोनों काठों करों फूल ।

गाँव भरी के मौगी-मुंसा की नै कहै छै बात,  
 रोज सुनै छी—वैनें मारलकै, वै दोनों कें लात;  
 कुल में आग लगाय कें रहतै दोनों काठों करों फूल ।

## चकय के चकधुम

चकय के चकधुम मकय के लावा,  
केना केँ कटतै समय हो बाबा !

सियारों-सिर पर चमेली-केसर,  
गिरै छै कारिख गुनी के ऊपर;  
लते मुचरलों, की होतै गाभा ।

मरै तरासों, लू के छै चाटों,  
सुखी केँ सुइया नदी के पाटों,  
लहू देहों रों जरी केँ रावा ।

की अदरा पुरबा, छै मनझमाने,  
कहूँ नै पछियो केरों ठिकाने,  
की जे बरसतै, दखनाहा दावा ।

यहाँ-वहाँ बस सौ गो वैतरणी,  
कहाँ नै ढाढ़स केरों सुमरनी!  
ठोरों पेँ सुलगै पञ्जैलों आवा ।

## कोसा-कोसी

कोसा कोसी, भादों मासी,  
हिरिया के बीहा कन्ने ?

जहाँ कर्ण रों राज विराजै,  
बिहुला आरो बाला राजै,  
चन्दनबाला के माँटी जे,  
वासुपूज्य रों वाणी बाजै;

ऋष्यशृंग रों जन्मभूमि आ  
तपोभूमि छै जन्नें;  
हिरिया के बीहा हुन्नें ।

कोसा कोसी, भादों मासी,  
जिरिया के बीहा कन्नें ?

जहाँ हिन्दी रों पहिलों आखर  
लिखलें छेलै ज्ञान दीपंकर;  
जहाँ बैठी सौ ग्रंथ लिखलकै  
सरहपाद, शबरपा धुरन्धर;  
विक्रमशील महाविद्यालय  
कभी विराजै जन्नें;  
जिरिया के बीहा हुन्नें ?

कोसा कोसी, भादों मासी  
खखरी के बीहा कन्नें ?

जहाँ विष्णु नें मधु हनलकै,  
रुद्रासन अभियो भी झलकै;  
जहाँ राम नें मूर्ति विष्णु रों  
स्थापित करी पूजा देलकै;  
चौदह रत्न दुहैवाला  
मन्दार विराजै जन्नें;  
खखरी के बीहा हुन्नें ।

कोसा कोसी, भादों मासी,  
खखरा के बीहा कन्नें ?

जहाँ उठै सब भोर-विहानै;  
एक्को बाँध नै कोशी मानै;



भैरो काका भरी जाल में  
किसिम-किसिम के मछली छानै;  
माय कताने बूली-बूली  
लोरी गावै जन्ने;  
खखरा के बीहा हुन्ने ।

## पाला पर रौद

### ई नाटक लें

महाभारत के ई प्रसंग कें बाल नाटक के रूपों में रचै के बात हममें सालो सें सोची रहलौ छेलियै, मतरु नै हुऐ पारै। दरअस्त यैमें प्रश्न कै एक ठो हेनो छै कि बच्चा लायक नै बुझावै । कि 30 नवम्बर कें पुत्र अभिनंदन नें कहलकै, जो पाँच पृष्ठों के कोय बाल रचना मिली जैतियै, तें पक्के पूरा-पूरी चौदह फर्मा के किताब बनी जैतै, नै तें हममें बचलौ पृष्ठ पर तोरौ परिचय दै देभौं। कि हमरा वहा युधिष्ठिर-यक्ष-संवाद याद ऐलै आरो रात भरी रुकै के बात हममें पुत्र कें कहैलियै। साँझ हुऐ पर छेलै। लेखन शुरू होलै आरो आठ बजे रात कें पूरा। आचरज यहू कि जे छन्द रूप कभी कर्ण काव्य रचै के क्रम में रचै के बात सोचलौ छेलियै, आरो नै हुऐ पारलौ छेलै, हौ यहाँ पूरा होलै। यानी कविता के चरण तें छंदबद्ध छै, मतरु तुकबद्ध नै।

फेनू जे कारण ई नाटक रूपों में एत्तें समय्यो बाद पूरा नै हुऐ पारलै, ऊ पाँच घंटाहै में ओरियैतें चललौ गेलै। हौ प्रश्नो हटतें चललौ गेलै, जे ई नाटक कें बाल नाटक होय दै में दिक्कत लानै। खाली ओरी आरो आखिरी के दू ब्यस्क प्रश्न कें रहें देलें छियै।

ई बाल नाटक मात्रिक वर्ग के अखंड छंद में बद्ध छै। ई अभिनंदनो के इच्छा छेलै कि हेनो कोय बाल कविता दौ, जे छोटों छंद में रहें। अखंड सें छोटों छंद की हुऐ पारें, तें हममें पूरा नाटक आठ मात्रा के छंद में रची देलियै। सच पूछौ तें ई प्रसंग यै लेली बालनाटक रूपों में बान्है लें चाहै छेलियै कि यक्ष के है पूछला पर 'सुखी के छै?' आरो युधिष्ठिर के है कहवों कि जेकरों ऊपर रिन नै; जे घरों में सागे-पात खाय कें रहै छै, आरनी-आरनी... ई उत्तर हममें कभियो नै भूलें पारलियै, जे बेचैनी आखिर में मौका पैहें मुट्ठी भर समय में उतरी ऐलै, बहाना बनी गेलै पुत्र अभिनंदन।

—अमरेन्द्र

(30/11/20)

## पाला पर रौद

(चलते-चलते यधिष्ठिर रुकी जाय छै आरो हिन्ने-हुन्ने देखते बोलै छै।)

**युधिष्ठिर :** (स्वगत)

आखिर कन्ने  
गेलों होतै,  
चारो ठो के  
चारो भाय ही!  
गोड़ों के तें  
छाप दिखै नै;  
शायत हुन्ने  
गेलों होतै।

(वही दिस आगु बढै छै। नगीचे में एक जलाशय दिखै छै, जेकरों सीढ़ी सिनी पर चारो पांडव के शरीर लुढ़कलों मिलै छै, जै पर आँख पड़हैं युधिष्ठिर बोली पड़ै छै।)

अरे यहाँ तें/चारो भाय ठो/मरलों होलों;/के मारलकै?/की पानी में/विष भरलों छै,/जैसे चारो/भाय मरलों छै?/पर माहुर के/कोइयो चेन्हों/दिखै नै देह पर;/कोय यहाँ पर/दिखतौ नै छै,/जे उत्तर दें;/बस उपाय छै/आबें देखौं/पीबिये पानी!

(जलाशय रों नगीच पहुँची कें चुरु में जेन्हें पानी पीयै लें चाहै छै कि बगले में बगुला रूपों में बैठलों यक्ष बोली पड़ै छै।)

**यक्ष :**

रुकों-रुकों, तोंय;/जल नै छूवों,/नै तें तोरो/तोरे सब टा/भय्ये नांखी/मिरतु लिखलों।/जल पीयै के/एक नियम छै—/उत्तर दै लें/होथौं तोरा/हमरों सबटा/प्रश्नों करों।

(युधिष्ठिर घुरीकें देखै छै, आरो हौले-हौले बोलै छै।)

**युधिष्ठिर :**

ई बगुला की/बगुले छेकै?/नै आरो कुछ!(जोरों से) के छेकौ तोंय?

**यक्ष :**

जलचर पक्षी/नै बूझों तोंय/यक्ष छिकां, हों,/हर्मीं तोरों/चारो भाय कें/मारलें छियौं।/चाहै छेलै/पानी पीयों/बिना देलें ही/प्रश्नो करों/उत्तर कोय्यो।/तोहूं चाहों/जों पीयै लें;/उत्तर दै लें/पड़थौं तोरा,/हमरों सबटा/प्रश्नों करों।

**युधिष्ठिर :**

तैं पूछों तों/कोशिश करभौं।

**यक्ष :**

के सुरजों कें/उदित करै छै?/के चारो दिस/एकरो घूमै?/अस्त करै छै/कौनें एकरा?/केकरा में ई/इस्थित? बोलों।

**युधिष्ठिर :**

सुरजों कें छै/ब्रह्म उगावै;/ऊ सुरजों के/चारो दिस ही/देवता घूमै।/धर्म छेकै/अस्त करै छै;/सत्य छिकै ऊ,/जैमें इस्थित।

**यक्ष :**

ठिकके कहलौ!।/आबें बोलों—/हेनों के ऊ,/जे इन्द्रिय सें/अनुभव ही नै;/सांसो लै छै/सम्मानित छै/लोको सें, पर/प्राणी होय्यो;/प्राणी नै छै?

**युधिष्ठिर :**

जेकि देवता,/आत्मो करो,/ऐलों अतिथि,/माय-बाबू के,/सेवको करों—/ई पाँचो के/करै नै पोषण/ऊ प्राणी नै/प्राणी होय्यो।

**यक्ष :**

ठीक बोललौं,/बुद्धिमान छों!।/आबें बोलों-/के महिमा में/सबसे भारी?/पृथ्वियो सें?/आकाशों सें/की छै ऊँच्चों?/हावाओ सें/तेज चलै के?/रेतों सें भी/बेसी की छै?

**युधिष्ठिर :**

सुनों यक्ष, तोंं!/एकरो उत्तर—/मैय्ये छेकै/जे बढ़िये कें/पृथ्वियो सें।/आकाशों सें/ऊँच्चों होय छै—/बाबू रों पद।/हावाओ के/गति सें बेसी/मन के गति छै/ आरो चिन्ता/बालू सें भी/बेसी जग में।

**यक्ष :**

साधु! सही छों! आबें बोलों—/के सुतियो कें/पॉल नै खोलै?/जन्मी कें भी/हिलै-डुलै नै?/हौ के छेकै/हृदय नै जेकरा/आरो हौ के, बहै वेग सें?

**युधिष्ठिर :**

इक मछली ही/सुतलौ पर भी/पॉल नै खोलै।/अंडाहे ऊ/जन्मी कें भी, हिलै-डुलै नै।/पथलों में ही/हृदय हुऐ नै;/आरो नदिये बहै वेग सें।

**यक्ष :**

(स्वीकार में चोंच हिलैतें हुऐं) अच्छा बोलों—/परदेशों में/मित्र के छेकै?/फिरू वहा रं/मित्र घरों में/के कहलावै?/रोगी करों/कहों मित्र के?/आरो मृत्यु के/वक्ती में के/मित्र कहावै?

**युधिष्ठिर :**

एकेक करी कें/एकरो सब के/उत्तर जानों—/जतरा-संगी/यंगी होय छै,/परदेशों में।/घर के तिरिया/घर के संगी;/जे रं होय छै/वैद्य रोगी लें।/मरै वक्त तें/दाने संगी।

**यक्ष :**

उत्तम! उत्तम! हों/ई तें बोलों—/धन्यवाद के/जुकुर पुरुष में/की गुण छेकै-/सबसे बढियां?/सबटा धन में/धन की उत्तम?/सब लाभों में/लाभ की उत्तम?/होनै सुखों में/सुखो कौन ठो?

**युधिष्ठिर :**

दक्ष कला में,/बड़ी श्रेष्ठ गुण;/आरो धन में—/शास्त्र-ज्ञान ही;/लाभों में जों/बस नीरोग ठो/आरो जेना/सब सुखों में,/संतोषे सुख।

**यक्ष :**

(डैना फैलैतें) उत्तम! उत्तम!/की तोहें है/बोलें पारों—/लोकों में छै/श्रेष्ठ धर्म की?/के फलवाला/धर्म हमेशे?/केकरों वश सें शोक हुऐ नै?/केकरों सार्थे/होलों संधि/नष्ट हुऐ नै?

**युधिष्ठिर :**

एकरो उत्तर/यही छेकै कि/ई लोकों में/एक दये ठो/श्रेष्ठ धर्म बस।/वेद-वचन ही/फल देवाला/सद्दोखिन छै।/शोक हुऐ नै/मन जो वश में।/साधु सिनी सें/संधि अखम्मर।

**यक्ष :**

धन्य, धन्य छी/सुनी कें उत्तर! मुदा प्रश्न तें/अभियो बाकी/बोलों-  
बोलों—/कौन चीज ऊ, जे तेजलै सें/पुरुष सुहावै?/की तेजला  
सें/शोक हुऐ नै?/आरो हौ की/जे तेजों, तें/अर्थवान छों?

**युधिष्ठिर :**

जानै छेलियै/पूछवौ तोहें/यहू प्रश्न सब, तें जानी ला—/मान-त्याग  
सें/पिय हुऐ नर;/क्रोध-त्याग सें/दुख सें मुक्ति;/काम-त्याग पर/  
अर्थवान छों;/लोभ-त्याग पर सुखे सुख छै।

**यक्ष :**

हरखित होलां!/धन्य-धन्य छी!/बस अंतिम में/ यहू कही दा—/कौन  
पुरुष छै/सुखी यहाँ पर?/की हौ छेकै/अचरज यै ठां?/मार्ग की  
छेकै?/वात्ताहौ की?

**युधिष्ठिर :**

जौन पुरुष पर/कोय्यो नै रिन/आरो नै ऊ/परदेसों में;/जेकि घरों  
में/सागे-पाते/केन्हों खाय छै/वही सुखी छै।/के नै जानै/मरना  
निश्चित,/तहियो किंछा—/रहौं अखम्मर!/एकरा सें की/बढ़ी कें  
अचरज?/धर्म केरों/तत्व मार्ग नी/वात्ताहौ की?/जीव-ब्रह्म के/बाते  
ही तें!/आवें तोहें/यहू बोलवौ/चारो भाय में/कोय एक्के ठो/जीत्तों  
होतै/जेकरा चाहों,/तें नकुले कें/हम्मों चाहौं,/भले भीम रं/अर्जुन  
वीरो/पर सोची ई—/जे धरमों कें/केन्हों नाशैं/तें धर्म ऊ/कर्ताहौ  
कें/नाशी दै छै/आरो जे भी/धर्मों केरों/हित में ठाड़ों/धर्मों  
ओकरों/हित में ठाड़ों;/सब्भे लेली/एकभाव जे/परम धर्म ऊ/ई  
लोकों में।

**यक्ष :**

(बगुला रूप तेजी कें बोली उठै छै।)

भरतश्रेष्ठ तोंय

लै जा अपनों

चारो भाय कें!

एक भाय नै।

(यक्ष के बोलतहैं निष्पंद पड़लौं चारो पांडव ठाड़ों होय जाय छै आरो  
युधिष्ठिर के संकेत पैथें साथें एक दिस बढ़ी जाय छै।)

